

# CIPIDI CYÀ

## MUNTU MUPWÀNGÀNE



Twasàkidila, Mwanèètù Neville. Mukalenge ànjì àkubènèshè.

Mbîmpè be bwà kwikala baalùkile cyàkàbìdì mu tabernacle mu dindà emu. Nyèwù nnewèla mwoyi wa ngàsà mu dindà emu wa “beetwabu,” nwènù bônso. Ne ndi ngiitabuujà ne neciikale ditùkù dinène bwètù bônso, mu—mu Bwikadi bwà Mukalenge wetù. Nènku mpindyewu ndi ne dìleesònà mu dindà emu. Ndi muswè kuya buludì ku dìleesònà diinè edi, bwalu didi... Ngeela meeji ne ndyà mushinga wàbùngì. Ne didi... Nènku bwà kwepela bwà musumbà wa bantu kabàtambi kwikala batàcishiibwe, nudi bamanyè’s, benzèjiiibwe bwà kushààlabò mukùngulù mule, bààbùngì biikàle kacya ànu biimànyina kuulu. Nèmbwelè buludì mu dìleesònà.

<sup>2</sup> Nènku mpindyewu, dilòòlò edi, ndi muswè kwakula pa cyena-bwalu cyà *Mulombodi Wa Mwoyi Wanyi*. Nènku ndi ntèkemena ne bààbùngì bàdì mwà kwikala ne mùshindù, bùngì bwònsò bùdìbò mwà kwikala abu, nebiiikalèpu dîbà adi, bwà dilòòlò edi. Kàdi, pawikala ne webè ekèleeziyà, tudì... mu bushùwà bwà bwalu, tudì baswè wikalè ku—ku ekèleeziyà webè. Aci’s mbujitu bwèbè bwà kwikalakù, kùdì kèèbè kaaba kàà mudimu aku, bwà wèwè kukenkesha bukènkè bwèbè.

<sup>3</sup> Mpindyewu, tudì tutùngunuka ne kutèkemena ne, misangu wònsò unwikalà mwà kwalukila awu, netwikalè ne mwaba mutàmbidileku kaaba aka. Kàdi tudì ne lutàtu ne cyòcì aci, kaa, myaba yònsò. Kasumbù kàà balubuludì aku nkakebulule bushùwà mu byònsò. Nènku badi bacituma mu mwaba kampànda, abu baciitaba; pashiishe bacituma mwaba mukwàbò, bacikàndameena. Nènku bacipingaja, bòbò bàciitaba lwà *apa*, ne bàcipingaja. Kaa, ncikondo kaayi citudì bapicile’s wè! Kàdi, nudi bamanyè’s, Sàtaanà ùtu misangu yònsò ànu mulwishi wa cintu cidì cimpè. Vùlukàayi ànu ne, nwènù nutu misangu yònsò ànu babinge pa bìdì bitàngila... .

<sup>4</sup> Mwawa ndikonka kùvwa usanganyibwa, Anthony. Ndi mmòna ne nwàpecyànganyi ne tatwèbè. Nènku ngàtùmu mèsù lwà kwàka, mu batèeleji amu. Yèyè wàmbi ne wèwè uvwa musòmbè mwaba awu. Tudì ne disànka dyà kwikala neenù wèwè ne tatwèbè mwab’ewu, Mwanèètù Milano wa ku New York. Ndi ntèkemena ne, pàngàayà dyàmwàmwà dyà mbù misangu ewu, nèngèlè cidya cikwàbò, mpicila mu New York, lwà kwine aku mu mwaba kampànda, bu Mukalenge mwà kwanyisha.

5 Ne pa nàнку tudi ne disànkà dyàbùngì bwà muntu ne muntu wa kunùdi. Bidi ànu—ànu bimpè bu munùdi mwab'ewu.

6 Nènku tudi bapicìshe cikondo cyà dicyònkómoka dilòòlò dyà makèèlèlà awu, anyi bwànyì mèmè bivwa nàнку. Mwwa ne. . . [Disangisha dìdi dyàmba ne: “Amen.”—Muf.] “Ne Yeshààyi mu ntempèlù.” Ne pa nàнку nwènù. . .

7 Nènku mu dindà emu, tudi baswè kwakula pa cyena-bwalu, anyi kulongesha's we, twètù ne mùshindù, cyà ne: “Kwibaka kwà Tabernacle udi ne mwoyi; kwibaka—kwibaka kwà Tabernacle udi ne mwoyi wa cisòmbedi cyà Nzambi udi ne mwoyi, Muntu mupwàngàne; Tabernacle udi ne mwoyi wa Nzambi udi ne mwoyi, mùdiYe musòmbèle.” Nènku bu. . .

8 Ndi muumvwe ne bàdi ne yimwè yà ku misambu mimpè eyi mwab'ewu. Mèmè ncìtu mpetaku mùshindù wa kuyitèèleja to. Nènku dilòòlò edi, nènditácishèku bwà kupweka kùneeku. Mukajàànyì mmundondele bwà Mwanèètù Ungren kampànda, ngeela meeji ne ki civwà dìnà dyèndè, wa ku—ku Tennessee. Kàdi, yèyè ùvwa mwab'ewu dilòòlò dyà makèèlèlà awu. Ncyèna mmumòna mu dindà emu to, kàdi ndi ncinka ne ùdi usanganyiibwa kaaba kampànda mwab'ewu. Nènku ndi njinga kuumvwa wimba dilòòlò edi, mèmè ne mùshindù, wimba, anyi *Mutuùlùke Ùfùmina Mu Butùmbì Bwèndè*, anyi *Mùshindù Mwinè Wùdi Munène's Wè*. Ndi njinga kuumvwaku cyòci aci. Mbanganyì bàdi bajinga kuumvwa Mwanèètù Ungren? [Disangisha dìdi dyàmba ne: “Amen.”—Muf.] Kaa, mèmè—mèmè ntu muswè ngimbilù mulenga awu. Nènku Meda ùvwa wamba ne ùvwa ne dìyi bu dyà alto. Nènku cidi cìmvùlwija Mwanèètù Baxter; ùtu kangimbà, yèyè pèndè, bu mutùdi bònsò bamanyè. Nènku *Mutuùlùke Ùfùmina Mu Butùmbì Bwèndè*, anyi *Mùshindù Mwinè Wùdi Munène's Wè*. Ngeela meeji ne ngàmumònu mwaba ùdiye mpindyewu, lwà mu. . . Bìdi mwà kwikala bimpè anyi, Mwanèètù Ungren, dilòòlò edi, bu wèwè mwà kuswà, pawikale mwà kushààla too ne pa dībà adi? Neùshaale, anyi neùditácishè bwà kushààla too ne pa dībà adi bwà disangisha dyà dilòòlò anyi? Èè, ndi—ndi. . . Èè, kwikadi. . . Nyàwù nnwàmbila, kàdi citwàmbà ncinganyì bwà eci, bu twètù. . . Ncyèna muswè kupà muntu lutàtu to. Kàdi mbwà cinyi kubènga kulwa, pa nàнку, twètù mwà kwikala ne mùshindù, mu cikondo cyà *Bitampì Mwandamutekètè*, patwàbiyiishà, bu wèwè mwà kulwa. Ndi njinga kubikwàta pa mikàbà yà mèyi, nudi numòna's, bwà kubipeta: *Mùshindù Mwinè Wùdi Munène's Wè*, kàbìdi, ne: *Mutuùlùke Ùfùmina Mu Butùmbì Bwèndè*, mu ciine cikondo aci.

9 Kaa, kí mbilenga bwà kukwacila Mukalenge mudimu anyi? Ncyèna mumanyè cìmvwà mwà kwenza to bu ne ncìvwa mwena Kilistò! . . . ? . . . Mbimpè be bwà kwikala mwena Kilistò. Ndi ndyùmvwa mwà kwikala ànu ntupika nya muulu ngàlukila ne

ngeela mbilà, mbilà yà mikolè ayi. Kwikala mwena Kilistò, anji elàayi meeji, mwele lwongo mu Kilistò ne mwanyi mwònsò!

<sup>10</sup> Ndi mumanyè ne ntu ànu ntu pakana dîna dya muntu ewu misangu yònsò. Didi anyi S.T. anyi T.S., anyi cintu bu nàнку awu. Sumners, Mwanèètù Sumner. Yèyè. . . Ndi njinga kubèèlà twasàkidila yèyè ne mukàjèndè wa mushinga mukolè awu. Ngeela meeji ne mukàjèndè mmwenze ngondo bu, mùvwàbi bimwèke, bu yisambòmbò nàнку, bwà kutuuta ku màshinyi mukàndà ewu wà *Bikondo Mwandamutekètè Byà Èkèleeziyà*. Nènku mpindyewu tukàadi babipetè batùpingajilebi, bituuta byònsò ku màshinyi, bifike mu mùshindù wa dibikòntonona, bwà kubyènza mukàndà, *Bikondo Mwandamutekètè Byà Èkèleeziyà*. Mwanèètù wa bakàji Sumner, kwònsò kùdì usanganyibwa aku, wànyishèku bushùwà tükufutè bwà cyòci aci. Bwalu, ncyangate mudimu wàbúngi be. Mòna's, udi *mòna* bunène. Mbifwànyine kungangata ngondo mitwè ku yisambòmbò bwà kuwùbala kuumukila ànu kuntwadijilu too ne kundekeelu, katùyi twamba bwà dibyumusha pa mikàbà yà mèyi, ne pashiishe kubikùdimuna ne kuumushamu mèyi à dyamba-dyambulula, ne kubyènza mukàndà. Netùbilongòlòle bwà kubitùma dyàkàmwè ku byamu byà dyenza mikàndà, bwalu tudi twela meeji ne ncintu cidì cikèngela bwà bantu kupetelabò ku byanza mpindyewu mene, nènku nudi mwà kuwùlonga. Nènku Billy mmufùme ku dindeeja, pàngàabwelèdi paanyimà pàapa, kwàpici tusunsa ndambù ne—ne—ne bikaavwa—bikaavwa bimana kulongolola mpindyewu bwà kuyabi kùdì mwenji wa mikàndà ku byamu. Pa nàнку, wèwè mwanèètù wa bakàji, tabernacle neàkufutè bwà cyòci aci. Ncyèna ntekemena ne wikale mubyènzè peebè ànu bwà cyanààna to. Nènku—nènku anyi tudi. . . Twètù bapete mukàndà ne biikàle ne cyà kuwùtwila mushinga, anyi cintu kampànda, netùtwe mushinga ùdì mwà kukupetsha cintu kampànda dîbà dyònsò diikalàbo ne cyà kuwùpaana, cyònsò ciikalàku aci. Wèwè yikilàngàna ne kasùmbù kàa balubuludi, anyi ne bàmwè bàà kùdìbo kuntwaku, nènku bòbò nebatàngile bwalu bwèbè. Mukalenge atàmbe kukubènèsha.

<sup>11</sup> Mwanèètù Mukùlumpè mukesè wa balùme Kidd ne Mwanèètù wa bakàji bàdì basòmbe mwab'ewu aba, bàdì ne bidimu mwinshi mwà lukàmà kakesè, ànu kakesè menemene. Nènku nyèwù ngàatuutakèenyi ne mukàjèndè kwènji katanci, ki yèyè ne: “Èè, pàmwàpa ewu musangu ngwikalà wà ndekeelu wùndi mupete mùshindù wà kukumòna, Mwanèètù Billy.” Yèyè ne: “Nkaadi ngènda nkulakaja be.”

<sup>12</sup> Mèmè ne: “Kaa, ekèlekèle! Ncyènà muswè kuumvwa wamba aci to. Nwènu's nudi ànu bu maamù ne taatù banunu kùndi.” Twètù tudi banange Mwanèètù wa balùme ne Mwanèètù wa bakàji Kidd. Twètù, muntu ne muntu, tudi babànage. Nènku bidi ànu. . .

<sup>13</sup> Bidi bingenza mèmè cintu kampànda pàndi mbàmòna bàbwela mu èkéleeziyà, biine abu babàka bàbidi bakulàkàji mùshindù wàwa. Kàdi anji elààyikù meeji, bôbò aba bàkaavwa bayiisha Èvànjeeliyò kumpàla kwà mèmè kulediibwa. Kàdi nyewu nkaadi muntu mukùlumpè. Eyo, anji elààyibi meeji, bôbò bàkaavwa bàyiisha kumpàla kwà mèmè kulediibwa. Kàdi ki mèmè ewu mpindyewu, ndi mufike too ne ku didyàmbidila ne nkàadi mubange kukùlakaja. Nkàavwa ànu pabwîpi ne kwela meeji bwà kulekela. Pàndi mmona Mwaneetu wa balume ne Mwaneetu wa bakaji Kidd babwela: “Butumbi kudi Nzambi’s we! Aleluuyah!” Mèmè ne: “To, mèmè’s ndi ndyùmvwa bîmpè.” Èyowà’s, mukalenge. Pa kubàmòna, mùshindù ùdìbo mwà, mùshindù mwine ùdìbo cyà bushùwà bàkusonsola’s!

<sup>14</sup> Dìbà adi ufika ku dyumvwa ne, pabwîpi ne bidimu bìndi naabi ebi, misangu yìbidi, cibi batùngùnuke ànu ne kuya mu budimi bwà bwambi. Mbalwè mu dindà emu balòmbe mikàndà, bwà ne kwòkù mùshindù wà kwangatabò mikàndà bwà kuya kayipàana. Bàkèba mikàbà yà mèyi, bwà bôbò kumòna mwà kupàtuka, kuya kapeta misùukà ku dyela dyà mikàbà yà mèyi ayi, pàabò ne bidimu bitwè ku lukàmà lujimà. Mpindyewu ènù “mapwàpwa àbidi” atùvwà twamba makeèlèlè dilòlò awu àdi penyì? Èyowà’s. Mèmè nkàavwa mubange kudyàmbidila ne: “Àanyi mèmè àdi penyì?” pàmbye cyôci aci—cyôci aci makeèlèlè awu. Ukàadi wèwè ne bidimu bingà, Mwanèètù wa bakàji Kidd? [Mwanèètù wa bakàji Kidd ùdi wamba ne: “Ndi ne bidimu makumi mwandamukùlù ne cìmwè.”—Muf.] Makumi mwandamukùlù ne cìmwè. Ukàadi wèwè ne bingà, Mwanèètù Tom? [Mwanèètù Kidd ùdi wamba ne: “Makumi mwandamukulu ne bibìdi.”] Bidimu makumi mwandamukùlù ne cìmwè ne makumi mwandamukùlù ne bibìdi, cibi biikàle ànu benza mudimu ne mapwàpwa àbò awu, miikàle ànu mu mudimu, bènda bàya ànu kuya.

<sup>15</sup> Bwalu kabùyì bwenda bîmpè mu Ohio, bùdi Mwanèètù wa bakàji Kidd mumanyè, tèlefonè ùdi ùdila kwànyì kumbèlu. Ditùkù dikwàbò, yéyè kubiikila ku tèlefonè, nènku mwànà mukèsè wa mu dibòko, mwànà mukèsè wa bakàji, ngeela meeji ne mmuvwàbi’s, ùvwa mulediibwe, mwikàle ne mala pambèlu. [Mwanèètù wa bakàji Kidd udi wamba ne: “Kalòndò kàà mènnyi.”—Muf.] Kalòndò kàà mènnyi, kiikàle pambèlu pàa mubidi wà mwànà wa mu dibòko awu. Ki ngàngàbukà kupangaye cyà kwenza pa bwalu abu, kupetaye bwòwà bwà kubanga mene dimupanda. Twètù kusambila. [“Wàkamupanda, Mwanèètù Branham, ne wàkabyàluja, bwalu, bàvwa bàmba ne: ‘Kì mmufwànyine kushààla ne mwoyi to.’ Kì kwalujabo mala èndè awu munda.”] Kwalujabo mala munda, ku dimupanda adi, biikàle bàdyàmbidila ne kàvwa mwà kushààla ne mwoyi to. Kàdi’s wàkashààla ne mwoyi bulelèlè. [“Kakùyì njila to.”] Kakùyì njila dìbà adi bwà—bwà bi—...kakùyì njila wa

bunyawu to, bwà byàkudyà kupìcilabi mwömò. Ki Mwanèètù wa bakàjì Kidd kubiikilaye cyàkàbìdì. Twètù kwela cyàkàbìdì disambila, nènku mpindyewu's yèyè ùkaadi ne njila wa byàkudyà kupìcila ànu pa yèyè. S'ki yèyè ewu, bu ntemu; kàbìdì, ne mwine ngàngàbukà awu. Nwamònu anyi? Mbujaadiki bwà ne Mukalenge Yesù, ki Mufùki munène! Nudi numòna civwà Sàtaanà ùteeta kwenza anyi? Kukòsoloja mwoyi wa mwànà awu's. Nènku pashiishe, nwamònu's, dībà adi ngeela meeji ne ki pàdì inàbànà awu mulwè kùdì Mukalenge. ["Mmwalukile kùdì Mukalenge, ànu kwànyì kumbèlu aku mene."] Mwalukile kùdì Mukalenge. Mwanèètù wa bakàjì Kidd ki wàkamulombola bwà kwalukilaye kùdì Kilistò, paanyimà pàà cishimà cinène eci cyenzèke bwà mwanèndè wa mu dibòko awu.

<sup>16</sup> Mvwa mupete dibìikila dyà ku tèlefonè dyùmukila ku Californie, makèèlèlè awu, mwanèètù mutekète mwambi wa kwòkò aku, wa bwena ùmvwà nendè pàngàakayà musangu wa kumpàla ku Californie, kùkaadi bidimu. Mwikùlwèndè wa balùme ùvwa mulediibwe ne—ne. . . mijilu yà nshibàshibà yinaayi ànyì yisàtù yà mu mwoyi wèndè mijibàkane. Ki mèmè kumulondela bwine bwalu abu. Mèmè kwamba ne: "Nzambi mwine uvwa mukumbàne kufùka cikwàbò eci ne kucilongolola awu, ùdì bulelèlè mwà kwondopa mwikùlwèbè wa balùme awu." Ambila ànu nsongàalùme awu bwà kukoleshayè mwoyi.

<sup>17</sup> Nènku yèyè nsongàalùme ewu ùvwa mu disangisha dyà pàngàakayà musangu wà kumpàla ku Californie, kukaadi bidimu bitwè ku dikumi ne mwandamukùlù mpindyewu, kukaadi bidimu dikumi ne bisambòmbò, kwakenzekadi. Nènku mvwa nsanganyibwa mu Californie. Nènku yèyè ùv- . . . Ki disangisha adi kwikaladi ne bwenzeji pa nsongàalùme awu mu mùshindù wà ne. . . Pààkapètàbo mwànà awu, pààkamulèlèbo, ne pààkalwàbo kumòna ne cintu kampànda kacivwa bimpè to, mwànà mwenze bleu, bàteeta kumutèeka ku bòmbonè, ne bikwàbò byònsò. Nènku kàvwa ànu ùmwèka bu ne ùvwa mwà kupànda to, ki bangàngàbukà kumwenzabò mateeta, ki kusanganabò ne mijilu yà nshibàshibà yisàtù yivwa mijibàkane mu mwoyi wèndè amu. Kayiyi mitùbùlùkekù to nànsha kakesè, nwamònu's, ànu—ànu mujilu wa lushibàshibà ùmwèpelè ngùwà utùma mashi. Ki yèyè kubiikila tatwèndè, wàmba ne: "Papa, biikilà Mwanèètù Branham, ànu patùdì twakulangana apa. Umwambile ne byònsò. . . 'Alombè ànu Kilisò cyanàànà. Yèyè neàcyenze.'" Ki cyòci aci's. Kaa, ekèlekèle! Bwenzeji abu's, cìdibò bàmòna, nwamònu's, twàkùlù pa bwalu abu, makèèlèlè dilòòlò. Cintu cìdì cikèngediibwà pa dībà didì dikèngediibwà.

<sup>18</sup> Èè, tudi ànu batungùnuke ne kwakula, bafwànyine katùciyikù mwà kubwela mu dìleesònà to, kì mmwòmò anyi? Cyenze ànu bu musabusabu wà nsùkaadi's mu dìndà dyà mashika makolè, ùdì ùkwàtàkana ne mwàwù mwònsò, nudi bamanyè's, mwikàle ùlamakanangana wònsò. Tudi ne disànkà

dyàbùngì dyà kwikala ne bwobùmwè bwà mùshindù awu. Èyowà's, mukalenge.

<sup>19</sup> Nènku mpindyewu twánjàayi kutuuyiishakù cilunji tǔng, mpindyewu, nènku tǔyaayi ku dileesònà mpindyewu. Pàmwàpa netùye. . . Ncyèna mumanyè ní nudikù mwà kumòna cyòci aci anyi kanwèna mwà kucimòna, ku mbòdi kwàka. Pàmwàpa mèmè mucikùdimwine mu mùshindù ewu, mu katanci kakesè, mòna's, netwikalè ne mùshindù, mpindyewu, bàmwè bàà kunùdi, wà. . . [Mwanèètù Edgar “Doc” Branham ùdi wàmba ne: “Udi muswè tutwepù mwéndù wa bukènkè bukolè anyi?”—Muf.] Wamba ne? [“Udi muswè bwà tutwepù mwéndù wà bukènkè bukolè anyi?”] To, ncyèna ngeela meeji nàнку to, bwà mpindyewu ewu, Doc. Pàmwàpa pààpitàku katanci. [“Ànu lwà panshi pàpa, ndi mwà kupàtwa mwéndù wà bukènkè bukolè.”] Èè, netù—netwènzè cyòci aci pàngààpetà ndambù wa. . . Udi mene ne mwéndù wà bukènkè bukolè mwaba ewu anyi? Mbìmpè. Enzaaku tutwepù mwéndù awu. Nudi mwà kumòna anyi lwà mundekeelu mwàmwa? Nudi mwà kumòna anyi? Panwikala mwà kumòna, elàayi cyanza muulu, panwikalà mwà kumòna mbòdi wàwa nàka, mwà kubala bidipu byàbya. To. Bìmpè. Angàtaku mwéndù awu. Mpindyewu, pàcidìbo bàdìlongolola bwà cyòci aci apu. . .

<sup>20</sup> Nyèwù mbanga dìbà dipite mu dindà emu; anyi, to, to, tusunsa tutwè ku dikumi ne tùtaanu kumpàla kwà dìbà. Pa nàнку, dìbà adi, netwàngate ànu dìbà dyàbùngì mpindyewu, bwalu katwèna baswè kubwela mu dilwijakaja to. Paùdi ulwijakaja, ki paùdi unyangakaja ànu menemene bintu biinè byúvwà ujinga kwamba. Mpindyewu, mvwa ntèeleja mukàbà wà mèyi kampànda, ditùkù adi, ànu bu mǔngánwám̀bìdi amu, kàdi mèmè kudyumvwa ànu mèmè mwinè bundu be; kabiyi bwà bímvwà ngàm̀ba abi to, kàdi mùshindù mwinè wúmvwà mbyàm̀ba lubilulubilu's, nènku ciikàle ànu dÛyì dyà muntu mubìndùluke's. Ndi ndyumvwa bu ne bìdi bikèngela kwikala kwindilaku. Cyòci aci. . .

<sup>21</sup> Mvwa—mvwa ànu mumòne ditùkù adi mwaba ùvwàbo bakeba kwibakila lupangu lwà kulaminamu nyama yà mwitu, munkaci mwà Louisville emu. Nènku Mukalenge Brown, ngeela meeji ne ùvwa nyèyè, kwìnè aku, kufilayè mùlìyò mujimà wa ndola bwà lwìnè lupangu lwà nyama alu. Èè, bu mèmè ewu naayi yòyi ayi, nùнку ndi mufwànyine kubàpèeshayi bwà kulekelelabò nyama ayi. Mèmè—mèmè nçitu ngùitabuujya dyela dyà cintu mu nsànji mùshindù awu to. Ndi ànu. . . Ndi nya ku lupangu alu mmòna nyama ayi mikwate ne byà luse, ours, ne ntambwe, ne bikwàbò, yèndakana yàtwa kumpàla yàtwa paanyimà, myela mu bùlokò bwà kashidi, nudi numòna's. S'̀bìdi bikwenza ne bibi. Twamb'eku twamb'eku, mbayikwàte kùdi meeji à muntu bu mùdìye yèyè ne meeji matwè mayipite yòyi. Nwamònu anyi? Nènku bàdi bàyikwàta ne bàyitèeka mu bupika.

<sup>22</sup> Nènku ndi ngèèla meeji awu: ki citù dyabùlù wènza. Ûtu wàngata bantu bàà mushinga mukolè bàvwà ne cyà kwikala bèndákana mu nyaba minène yà Nzambi, ne mu madimi à bwambi, ne—ne bintu byà mùshindù awu, kàdi kumwela mu nzùbu wa lukànu lwà dīngumba kampànda, anyi twitabàayi kampànda, anyi cintu kampànda, nènku ùmuswikilamù. Aci's ncintu cibi kumòna's.

<sup>23</sup> Ne mèmè mwinè ncitu munangèku mpangu yà dilamina nyamà yà mwitu ayi to. Kàdi ndi ndyùmva cintu kampànda bu umwe wa ku nyama ayi, paùdi mwela yònsò mu nsànji ne mwikàle uteeta bwà kubàfúkamù's, nudi bamanyè's, bwà—bwà kupàtuka kuya kenza cintu kampànda apu.

<sup>24</sup> Mpindyewu, kumpàla kwà twètù kuseemena ku Diyì, twànji tusemenàayi kùdi Mwena Diyì mwinè, patùdi twinyika mitù yètù mpindyewu mu disambila apa.

<sup>25</sup> Taatù wètù wa mu Dyulu wa ngàsà, tudi badisangishe cyàkàbìdi mu dīndà emu mu Dīnà dyà Mukalenge Yesù, Mwànà Webè wa mushinga mukolè. Nzambi, mwandamuke mubidi, wàkalwa pa buloba, bwà difuta dyà cibawu cyà mpèkaatù yètù, ne wàkafwà, Mwakàne awu; bwà twètù, ku bwakàne Bwèndè, twètù babì aba, twamòna mwà kuvwijiiibwa bapwàngàne mu Yèyè. Tudi tulwa biikàle tutonda ne katwèna bakùmbànyine to, Mukalenge. Kakwèna cintu cimpè kutùdi eku nànsha cimwe to. Ne twètù biinè tudi bònsò mu nzùbu munène wa bùlokò umwèpelè. Nànsha twètù biimànyine mu ditumba kaayi, tucidi bònsò ànu mu bùlokò. Kakùyiku udi mwà kwambulwisha mukwèndè to. Kàdi, Nzambi, mu luse Lwèndè lùdi kalùyi mikàlu alu, wàkatùùluka e kukàngula biibi byà bùlokò abu, bwà kutushiya badishikàmīne. Bwà mpindyewu katùcyenà kàbìdi beela mu nsànji to. Katwèna mu lupangu lwà kulaminyina nyama lwà maalu à pa buloba to, kàdi mpindyewu tukàadi badishikàmīne. Tukàadi pambèlu.

<sup>26</sup> Kaa, mùshindù mwinè utùdi baMunange ne biikàle tuMukuukwila's wè! Mùshindù mwinè utùdi mwà kwenda twátwa eku twátwa eku mu madimi manène à milayi Yèndè, biikàle tuyimòna mimwènèshiiibwe kumpàla kwètù! Nènku ne mèsù ètù àbìdi, tudimwèna Nzambi munène wa Cyendèlèlè awu ùdivungulula Yèyè mwinè kumpàla kwètù, mwikàle ùdivwija Yèyè mwinè mulelèlè, bu mwàkenzàYe kùdi bapròfetà bàà kale. Biikàle bamanyè bwalu ebu ne, bôbò abu mbashàale biikishe ne ditwishiiibwa dyà ne, dīngà ditùkù netwàlujuludiibwè, piikalà mwoyi ewu mujikè, ku dibiiishiiibwa dyà ku lufù, bayè ku Mwoyi wa Cyendèlèlè wikalà kawùyì mwà kwimanakù awu. Mibidi yètù kayàakukùlakaja to. Ne twètù katwàkufwàku to. Ne katwàdyàkuumvwaku nzala to. Ne katwàdyàkukèngèlakù cintu to. Kàdi netwikale twendakana Nèndè. Tudi baswè kuMuumvwa wàmba ne: “Bwelaayi mu masànkà à Mukalenge, àvwa manùlongolwela kacya ku difùka dyà dyulu ne buloba.”

Kale wàwa pàvwà mpèkaatù kàyiku mwanji kubwela to, mùshindù wàkenzàYe diinè dilongolola adi, bu bwà Adàmà ne Evà, bwà kabàyiku ne cyà kusaama anyi kupeta lutàtu to. Nènku mpindyewu Yèyè mmucilongòlole bwètù twètù, ne Yèyè ùkaavwa mudyànjlè kumanya ne twètù aba netùlwe. Mpèkaatù ki wàkenza cipùmbishi cinène aci, kàdi mpindyewu mpèkaatù ùkaadi mumane kuumushiiibwa, kùdi Mashi à Yesù. Mpindyewu, tukàadi mu njila batàngile ku Buloba bulaya, ku mulayi wà Nzambi, ùdi wà Cyendèlèlè awu.

27 Ûtùbènèshèku mpindyewu, Taatù, patùdi tulonga Dìyì Dyèbè apa. Tudi baswè kumanya ne tudi ne cyà kwikala bantu bàà mùshindù kaayi, bwà kwikala Kwòkò aku. Ûtùkwàcishèku leelù ewu mu kàlaasà aka, bwà twamòna mwà kwikala ne Mulongeshi wa Cikunda awu pàmwè nèètù, Nyumà Mwìmpè, udi mufwànyine kutùuluka bwà kùDibuulula kutùdi awu, ku Dìyì Dyèndè. Bwalu tudi tulòmba nùnkù mu Dìnà Dyèndè ne bwà butùmbi Bwèndè. Amen.

28 Mpindyewu, dyàmbedi, ndi njinga nubuululeku pàmwè nàànyì mu Peetèlo Mwibìdi, nshapità 1. Ndi muswè kubala citùpà cyà Mufùndu ewu, Peetèlo Mwibìdi, nshapità 1. Nènku mpindyewu nwènù bàdi ne crayons yènù ne mabèji. . .

29 Nenku ngeela meeji mbangabile mu dindà emu ne—ne kudi misangu mikwàbò, pàndi ntuma mutù ku luseke ngùumusha kwòkò aku, bìdi bipwekesha dìyì pa mukàbà wà mèyì. Mu bushùwà bwà bwalu ncyèna ncyèza ku bukòlè to. Nènku ndi ngeela meeji ne, musangu kumpàla, bu twètù mwà kwelakù meeji à kupeta ci—cikolokolo cidì cyumvwa nseke yònsò, kucilembelejila lwà muulu mu cisàsà kaaba aka, dībà adi nànsha wèwè usanganyiibwa mwaba kaayi, mbifwànyine kwikala ànu bìmpè, mbifwànyine kwikala bipwàngàne, ku nyungulukilu ànu kwònsò, ànu cikolokolo cyanààna muulu mu cisàsà.

30 Nènku mpindyewu, bu pàndi ngàakula apa; nènku nwènù, paanyimà pàà disangisha, anyi panwikala baswè, bu nwènù mwà kuzolaku lùkàsàlùkàsà dizòla dìdi apa edi. Pashiishe ndi kàbìdi mudìtuucishe ku cyamu mwaba ewu. Nèngàngatè kasono bwà kudìpoopela lwà kumpàla eku, panwikala bajinge kucyèza musangu kumpàla. Nùlwàyiku kumpàla kwà dībà ndambù mu mapingaja emu, bwà twàpetakù mùshindù wà kuumvwa.

31 Mpindyewu tukàadi twenda tuseemena pabwìpi ne *Bitampì Mwandamutekètè*. Nyèwù twafùmu ku dijikija dyà *Bikondo Mwandamutekètè Byà Èkèleeziyà*. Nènku eci n'Diyiisha pa dilongesha, dìdi dìswikilà muntu lwà munda, muntu wíkala mwà kupikudiibwa ku Mashi à Mukalenge Yesù awu, ne wíkala mu ciine cikondo cyà Èkèleeziyà aci, cikondo cyà Cyendèlèlè cyà Èkèleeziyà aci kundekeelu kwà Bitampì. Mpindyewu tudi bamanyè ne tudi ne Mpungi Mwandamutekètè, Bipùpù Mwandamutekètè, Mpànzà, ne bikwàbò, mutùdi tukabwela,



patùdì twenda tuya kumpàla apu. Kàdi tudi bindile bwà kupeta myaba yàbùngì bwà bantu bààmòna mwà kusòmba.

<sup>32</sup> Mpindyewu, nènku mvwa ngeela meeji ne eci ncifwànyine kuswikakana ànu mu mwaba menemene wùmvwà mutèkèmene awu. Ncivwa mutèkèmene ne nêngènzè dizòla edi to, kàdi ditùkù adi mvwa ne balunda bàànyì bakwàbò bàà mushinga mukolè, ba-Cox, lwà mu Kentucky mwàmwa. Mvwa mumùpwekè, ngeela meeji pàmwàpa ní mvwakù mwà kupeta ditùkù dikwàbò dyà kuya kalemba nshindì kumpàla kwà muvù kujikawù. Nènku mvwa nsanganyiibwa mwitu amu ne mulunda wanyì, Charlie, udi mwimane pààpa wàwa, ne Rodney, mwanààbò wa balùme. Ncyàkamòna nànsha nshindì umwe to. Ngeela meeji ne mvwa muyìkwàcishe bwòwà muyinyeemèshe yònsò, dîbà dîmvwà mubange kwela mbila mikolè mwinè mwitu amu adi. Cyòci eci ki cívwa cimvwile's, balùmyànà wa yààya, ne—ne Mwanèètù wa bakàji Nellie ne Margie, ne pàmvwà munwàmbile ne nènùlondèlè mu dyàlumingu pàngààfikà ku cyòci aci apu. Ki cívwa cimvwile, pa diyiisha dîmvwà ne cyà kuyiisha. Ne mùshindù úvwà bikwàbò byònsò biswikakane menemene ne cyòci aci! Nènku, kaa, ndi muswè aci. Mémè kupeta nyumà wa—wa dikèma—wa dikèma wa dyela dyà mbilà, mwinè mwitu amu.

<sup>33</sup> Pa nàнку mpindyewu, tùbalààyaaku mpindyewu, Peetèlò wa Kumpàla, anyì . . . Peetèlò Mwibìdì, yèyè awu's wè, nshapità 1, citùpà Cyèndè.

*Simona Peetèlò, musadidi ne mùpostòlò wa Yesù Kilistò, kùdì aba bàdì bapete diitabuuja dyà mushinga mukolè dyà mwomùmwe ne dyètù twètù ku bwakàne bwà Nzambi ne Musungidi wetù Yesù Kilistò:*

<sup>34</sup> Ndi munange mùshindù ùdì bwalu abu bwambiibwe mwaba awu, bwalu cyena-bwalu cyànyì cyònsò nkòong mu dindà emu ncishindàmèene pa diitabuuja. Nwamònu anyì? Anyishaayi mbalululèku cyòci aci. Tèèlejàayi ne ntèmà.

*Simona Peetèlò, musadidi ne mùpostòlò wa Yesù Kilistò, kùdì aba bàdì bapeta—bapetè diitabuuja dyà mushinga mukolè dyà mwomùmwe . . . ku bwakàne bwà Nzambi . . . Musungidi wetù ne Yesù Kilistò:*

<sup>35</sup> Mònaayi, yèyè ùdì wàmba, ne: “Ndi mupetè diitabuuja edi, ne eci ndi ngàmbila aba bàdì bapetè diitabuuja dyà mushinga mukolè dyà bwena dyòdì adi.” Ndi muswè . . . Kí nkùdì bantu bàà pambèlu to. Eci nkùdì Èkèleeziyà, nudi numòna's, aba bàdì mu Kilistò.

*Ngàsà ne ditalala binuvudijìbwe ku dimanya dyà Nzambi, ne (ku) dyà Yesù Kilistò Mukalenge wetù,*

*Bu mùdì bukolè bwèndè bwà bunzambi bwikàle butùpe bintu byònsò . . . bukolè bwèndè bwà bunzambi mpindyewu bwikàle butùpe bintu byònsò bidì bitàngilà*

*mwoyi . . . difwàndà dyà Nzambi, ku dimanya dyà ewu udi mutùbùikile ku butùmbi ne bukolè:*

*Ku byòbì ebi nkutùdì twètù bapèèbwe . . . bapèèbwe milayi minènaanènààle ne yà mushinga mukolè: bwà ku yòyi eyi (milayi eyi) twètù twamòna mwà kwikala baabanyanganyi bàà ngùikàdìlù wa bunzambi, . . .*

<sup>36</sup> Mpindyewu lekèlaayi aci cibwelè too ne mu ndòndò menemene mpindyewu. Ncyèna nyiisha mu dindà emu to; tudi tulongesha dileesònà edi cyanààna. “Ngùikàdìlù wa Bunzambi.” Anyishaayi mbalululè mvensà mwi<sup>4</sup> awu mpindyewu, bwà kiikadi wàlwa kunùpita. “Ku byòbì ebi nkutùdì bapèèbwe . . .”

*Ku byòbì ebi nkutùdì bapèèbwe milayi minènaanènààle ne yà mushinga mukolè: bwà ne ku yòyi eyi (miinè milayi eyi) twètù twamòna mwà kwikala baabanyanganyi bàà ngùikàdìlù wa bunzambi, bamane kupànduka ku dinyanguka dìdì pa buloba ku lukùkà.*

<sup>37</sup> Nwamònu’s, “maalu à pa buloba,” twètù tukàadi bapàndùke ku cyòci aci mpindyewu. Eci ùdi ùcyàmbila Èkèleeziyà. Ki bwà cinyi tudi kaaba aka mu dindà emu, mbwà kujandula njila ne ngwèpi, ne mushingà wa Nzambi ùdi cinyi. Kakwènakù muntu kaaba aka mwikàle munange Nzambi, kàdi kayi muswè—muswè kulwa mutàmbe kufwànàngana ne Kilistò to. Mpindyewu cyòci aci ncidi cyadija kaaba aka eci. Mwena Kilistò yònsò! Mémè ewu ndi nkolomù wa kale. Tàngilàayi Mwanèètù wa balùme ne Mwanèètù wa bakàjì Kidd bàdì mwab’ewu aba, pàmwàpa bóbò mbàdì batàmbe kwikala bakùlumpè mu nzùbu emu. Kàdi bu mémè mwà kubàkonka ne: “Dijinga dyà mwoyi wènù didi cinyi?” Ndifwànyine kwikala ne: “Kutàmbe kwikala pàmwè ne Nzambi.” Paùdi uyila maalu à Kilistò, kùdi cintu kampànda kùdiYe aku ciikàle cyà dinanga dyà dikèma, mu mùshindù wà ne ùdi ùditàcisha bwà kubwela munda Mwèndè menemene.

<sup>38</sup> Fwàyikù luse bwà dīyì dīndì ngàmbe edi. Mvwa mwabile mukàjàanyi, mwab’ewu kī nkwanji kupita ntàntà mule to, yèyè. . . twètù bònsò bàbìdì babange kukùlakaja, ki mémè kumwambila, kwamba ne: “Ucitu munnange mùvwà munnange kale amu anyi?”

Yèyè ne: “S’ncitu ànu mukunânge bulelèlà.”

<sup>39</sup> Nènku mémè kwamba ne: “Udi mumanyè’s, mémè ntu mukunange bikolè mu mùshindù wà ne ntu ngùmvwa ànu mwà kukwangata kàdi kukukokela munda mwànyì emu, bwà twamòna mwà kwikala ànu, mu bushùwà bwà bwalu, kwikala umwe, bipite.”

<sup>40</sup> Mpindyewu, cyòci aci, vudijaayi aci ku mìliyò lukàmà, nènku dībà adi nenùjandulè mùshindù ùdì mwena kwitabuujà, udi mukwàcike dinanga bwà Kilistò awu, ùjinga kubwela munda Mwèndè, bwalu cintu ndinanga. Nenku mwab’ewu Yèyè neàtùleeje mùshindù ùtùdì, ku milayi eyi, bafwànyine

kwikala baabanyanganyi bàà ngiikàdilù wa Bunzambi wa Kilistò. Mibidi eyi, yà cifwàkà eyi, mùshindù utùdi mwà kwikala baabanyanganyi.

<sup>41</sup> Ndi mufwànyineku kwamba cintu kampànda mwaba ewu. Cidi cyènta ne ngiitabuuje. . . Kàdi muntu kampànda ùvwa mungumvwe bibi bitàmbe, kí nkwanji kupita ntàntà mule to. Ndi mupetè mukàndà mumfùndila kùdi nsangilu wa bambi, wàmba ne mèmè ntu ngiitabuuja ne kùvwa. . . “Twètù aba tuvwa misùùkà milamàkàne. Nènku tudi ne cyà kushiyàngana ne bakàji bèètù anyi baabàyèètù pìikalàbi ne katùvwa naabò misùùkà milamàkàne, bwà kusela anyi kusèdiibwa kùdi muntu mukwàbò utùvwà nendè musùùkà mulamàkàne.” Kaka, ekèlekèle!

<sup>42</sup> Mèmè kwamba ne: “Mèmè ncyèna ne dipiila pa dipambuka bu nàntu to.” Mèmè ntu kwònsò eku ndwishangana ne cyòci aci. Mèmè—mèmè nciitabuujakù to. Nànsha kakesè. Mèmè ntu ngiitabuuja ne Nzambi ùdi útùpa mwena dyètù. Aci ki cyà bushùwà. Nènku dībà adi mpatùdi tushààla muntu mwikàle citùpà cyà mukwèndè. Aci ki cyà bushùwà. Nènku kumpàla kwà muntu kubwelayè mu dibàkà, bidi bikèngela ànji kwela meeji bikolè pa maalu aa, alonge bwalu ebu.

<sup>43</sup> Nsongàalùme kampànda kunkonkayè ditùkù adi, wàmba ne: “Udi welakù meeji, Mwanèètù Branham, ne mèmè ndi mwà kusela, bikèngela nsele mwànà wa bakàji *kampànda* anyi?”

Mèmè ne: “Utu umwelela meeji kaayi?”

Yèyè ne: “Kaa, ekèlekèle, ndi mumunange be.”

Mèmè ne: “Èè, pawikalà kùyì mwà kwikala ne mwoyi wèwè kùyì nendè to, dībà adi mbìmpè ùmusèle. Kàdi pawikalà mwà kwikala ne mwoyi nànsha kùyì nendè, kí mbìmpè ùmusèle to. Nènku, kàdi byòbi ne udi wamba kufwà, mbìmpè—mbìmpè nùtùngunuke too ne ku disèlangana,” mungàakambà. Nènku cìmvwà nteeta bwà kumufikisha ku dyumvwa, ncyòci eci, ne, wèwè mumunange bikolè menemene!

<sup>44</sup> Mpindyewu, bwà mpindyewu ewu, kumpàla kwà nwènù kusèlangana, byònsò bidi ànu bilèngèlèngèlààyì. Kàdi paanyimà pàà nwènù bamanè kusèlangana, ki ntàtu ne mateeta byà pànu kunùbwelelabi. Dībà adi ki pàdi pàkèngela nwènù kwikala mu dinanga dyà menemene bwà nùfike ku mùshindù wà muntu ùmvwa mukwèndè. Paùkaadi umvwa ne mukàji wàkutekèshì mu mabòko, anyi mukàji ùmvwa ne wèwè wàmutekèshì mu mabòko, nudi ànu nutùngunuka ne kumvwangana muntu ne mukwèndè.

<sup>45</sup> Ki mùshindù ùdibi ne Kilistò. Nwamònu anyi? Bikèngela twikale menemene mu dinanga Nendè, mu mùshindù wà ne twètù balòmbe cintu kampànda, kàdi Yèyè kàyì mutùpèeshèci to, aci kaciyì mwà kutùnyungishakù to nànsha kakesè. Nwamònu anyi? Nwamònu anyi? Bwà cinyi? Ne mùshindù ùmwèpelè

unùdì mwà kwenza nànkù, ngwà kushààla baabanyanganyi bàà ngìiklàdìlù Wendè wa Bunzambì, dìbà adi neúmfwè bwà cinyi Yèyè kèna mwà kukupèèshacì. “Baabanyanganyi bàà ngìiklàdìlù Wendè wa Bunzambì.”

46 Kàdì tàngilààyì kùnu, “Bamane kupànduka ku dinyanguka didì pa buloba ku lukùkà.” Bapàndùkekù! Nudi numòna bàdìbo bàmbila abu anyì? Badi bàmbila Èkèleeziyà, aba bàdì mu Kilistò, bàkaadìbo bamane kubàndisha kumutu kwà bintu ebi. Kabiyì ne mmudibàndishe yèyè mwinè to, kàdì Kilistò ngudi mumufikishe kuulu aku.

47 Bwà bàna bèètù bàà balùme ne bàà bakàjì bàà bafiike bàdìpu mwaba ewu mu dindà emu abu, ncyèna ngàmbe bwalu ebu ne meeji a kutàcishangana to. Kàdì, kùvwa mmu disangisha kampànda kùkaadi matùkù, ncyèna mumanye ní nkààdikù mwambe bwalu ebu mu tabernacle emu anyi to. Nkaadi mubwàmbàmbe mu myaba yàbùngì. Kùvwa mwanèètù kampànda wa bakàjì wa bafiike wákamba ne: “Ndiku mwà kupeta bujaadiki, anyì kufila bujaadiki anyì?”

“Cyà bushùwà’s, mwanèètù wa bakàjì, tùyaaku tǔng.”

48 Yèyè ne: “Ndi njinga kufilaku bujaadiki ebu bwà butùmbi bwà Nzambì.” Yèyè ne: “Nudi bamanyè’s, mèmè—mèmè ewu ncyèna cidì cikèngelà mèmè kwikala to,” kàbìdì kwambaye ne: “Ncyè—ncyèna cìndì njinga kwikala to, kàdì,” yèyè ne, “cintu cìmwè cìndì mutwìshìbwe, ncìcyena cìmwà kwònsò eku aci to.” Nwamònu anyì? Ùkaavwa muumùke mwaba kampànda. Ùkaavwa mumanè kufikishìbwa kuulu.

49 Mùshindù awu ki utùdì tumanya ne tukàadi buumùke ku lufù bayè ku Mwoyi. Tudi tutàngija mèsù paanyimà ku ciinà cìvwàbo batùpàtùle aci. Nwamònu anyì? Katwèna citùdì tujinga kwikala; katwèna nànsha cidì cikèngela twètù kwikala to; kàdì cintu cìmwèpelè citùdì naaci ne kusàkidila ncyà ne, katùcyena kàbìdì citùvwà kwònsò aku aci to. Ncyà bushùwà. Tudi mu njila.

50 “Nènku bamane kupànduka ku dinyanguka dyà pa buloba.” Bamane kupànduka ku cyòci aci, ku lukùkà ne dinyanguka dyà pa buloba, nukàadi kumutù kwà byòbì abi. Mpindyewu aci—mpindyewu aci ki mùshindù wà muntu udiYè wàmabila, muntu ukàadi mupàndùke ku bintu ebi, nwamònu’s, ku dinyanguka dyà pa buloba.

*Nènku pa kuumusha cyòci eci, biikàle badifile ne cisùmì cyònsò, ku diitabuuja dyènu nùsàkidile bukolè; ne ku bukolè dimanya;*

*Ne ku dimanya didikànda; . . .ku didikànda lutùùlù; . . .ku lutùùlù difwànà dyà Nzambì;*

*Ne ku difwànà dyà Nzambì dinangangana dyà bwànà bwètù; ne ku dinangangana dya bwànà bwètù dinanga.*

<sup>51</sup> Mpindyewu Yèyè nyéwù wátùpèèshi dizòla mwab'ewu dyà cyà dyenza, kumanya mwà kucyenza. Mpindyewu, bu mûngâmbì, twètù bônso tudi tuditacisha bwà kutâmba kuseemena pabwîpî ne Nzambi. Ki bwà cinyi ndi musungule diyiiisha edi mu dindà emu, bwà èkèleeziyà, bu mûndi mumanyè ne bantu bàdi bènza lwendu. Bwalu makèlèlèla dilòlò, mvwa mwambe ne: “Mbanganyi kaaba aka, bàdi bafùmìne pambèlu pàà cimenga?” Bantu batwè ku makumi citèemà ne mwandamukùlù pa lukàmà, bafùmìne pambèlu pàà cimenga. “Mbanganyi kaaba aka bàdi bafùmìne mu ntaantà wa kilomeeta lukàmà ne makumi àsambòmbò?” Mona's, kupitabi, ngeela meeji, makumi mwandamukùlù pa lukàmà. “Mbanganyi kaaba aka bàdi bafùmìne mu ntàntà wa kilomeeta mipite pa nkàmà mwandamukùlù?” Pabwîpî ne cyà—cyàbisàtù cimwè cyà bantu bàvwà kaaba aka mbafùmìne ku kilomeeta mipite pa lukàmà ne makumi àsambòmbò, mipite pa nkama mwandamukùlù. Anji elàayi meeji tûng, bwà bantu bàdi benza lwendu abu. Èè, bantu abu kabèèna bàlwa mu èkèleeziyà ànu nàнку awu bwà bàbàmònè to. Kakwèna... bu cidì bantu bàà pambèlu bafwànyine kumòna ne ki bulenga bwà mwaba mwìnè ewu aci to. Bwònsò mbantu ànu bèètù bàà pàtupù aba, bapèle, bavwàle bilàmbà ànu byètù byà pàtupù ebi. Kamwèna miyengà minène myela kùdi cisùmbu cyà beena misàmbu bàdi mwà kudyàmba bu ne ncyà Banjèlo to, bisanji byà orgues byà mbungu, ne màdidiishi kampànda a mmwènu yà meekala. Bwa kupeta ànu cibàsà ciinè cyà disòmba nyewu bidì ànu lutàtu kunùdi ne diimana mene dyà kuulu biikàle nwenda nulonda cimanu. Kabèna bàvwila biinè byà nàнку awu abi to. Kàdi bàdi bàlwa ànu bwalu munda mwàbò mùdi cintu kampànda cidì cimòna bulenga bùdi dîsù dyètù dyà mubidi edi kadiyi dimònakù to. Dîsù dyà nyumà ki didì dimòna bulenga bwà Kilistò. Ki bwà cinyi bàdi bàlwa.

<sup>52</sup> Pa nàнку, matùkù kumpàla kwà twètù kwenza disangisha, ndi nsambila dîbà dyònsò. Ndi nya mu diitu, ngeela mu mpaaya... Ngambila mukàjàànyì ne: “Nyààya mu ditwà dyà buluwà bwà nshindi mu dindà emu.” Nèku ngeela crayon ne ndambù wa mabèji mu mpaaya. Kwisù kùdi ànu kwenza ne kwàtòòku kukùmbàne kwà muntu mufwànyine kumòna, ndi nsòmba mweyèmène ku mucì mwaba kampànda, byanza byela muulu, ngàmbe ne: “Mukalenge, cìndi mwà kwenza leelù ncinyi? Cyùdi Wèwè muswè kumpa bwà bàna Bèèbè ncinyi?”

<sup>53</sup> Nèku pàndi nkafika pa cintu kampànda cidì cimwèka bu cidì citeema kapyà munda, ciikàle cilwa cintu kampànda bu nùнку ewu. Pàdi Bwikadi Bwèndè buseemena, ndi mbanga kuumvwa cintu kampànda cyènze bu cidì mu ntàntà mule, cintu kampànda bu cyà mùshindù ewu. “Ìbidì kuvudija ku ibidì mwomùmwè ne inaayi.” Bitàmbe kuseemena: “Ìbidì kuvudija ku ibidì mwomùmwè ne inaayi. Ìbidì kuvudija ku ibidì mwomùmwè ne inaayi.”

Ànu nàнку, ànu nàнку, ànu nàнку, mùshindù awu. Mbwikadi Bwende budi bwènda bulwa abu.

<sup>54</sup> Udi udilekelela, nènku paanyimà pàà mutanci upàtuka mu wèwè. Ki cikèèná-kumòna cilwalwà aci: “Nda ku mwaba *kampànda*, ne cintu *kampànda*.” Nwamònu anyi? Cìdi cibanga, bìbangila ku dyelangana dyèbè dyà meeji dishindàmeene pa Nzambì, mupàtùke mu maalu à pa buloba, muye kule ne bàà pa buloba, mupàtùke muye mu mwaba wa cipèèlà, pàà nkàyeebè.

<sup>55</sup> Ki Cyòci kubanga kulwa: “Ùmwè, ùmwè. . .” Ndi ngàmba, nomba yònsò nàka, anyi cintu kanà cyònsò, cintu cibanga ànu ku ndambù ku ndambù, cìbwela bitekètebitekète. Pashiishe cìdi cibanga kulwa lùbilulùbilu, lubilulubilu. Udi usòmba mwaba awu mwele byanza muulu, kùyi wamba bwalu to, kacya ànu wèla byanza muulu. Katanci aka anyi, wèwè yònsò mujimà wangaciibwa. Pashiishe udi umòna bintu bìdìYe muswè bwà wèwè kumanya, mwikàle ukuleeja bintu bicilwalwà.

<sup>56</sup> Misangu mikwàbò cìdi cikafika pa kaaba kampànda, too ne pa kaaba kampànda, cishiisha cìmana. Kacyèna cìya mu cikèèná-kumòna to. Dìbà adi Mifundu yibanga kulòka ànu bu mvùla. Ndi mbàkula crayon wanyi, bwà nciikadi ngàlwa kubìpwa mwoyi, nènku mbìfùnda, mbìfùnda.

<sup>57</sup> Nènku ngààlukila kumbèlu ne nkeba mwaba ùdìbi, mbìlonga. Pàmwàpa kabyèna nànsha byumvwika to pàndì munkaci mwà dibìlonga apu. Kàdi pashiishe, paanyimà pàà katanci, ki cintu ncyòci eci pwà! Cìdenga, cimvwila kàbìdi. Pashiishe ngangàta kàlupè kakesè mùshindù *ewu*, nènku mbanga kufùnda lùkàsàlùkàsà, ànu ne mwanyi mwònsò, bìdìYe ùngambila abi. Mémè kudyàmbidila ne: “Mukalenge, nènye ku tabernacle nkabàmbilè. Nê- . . . ‘Lwàyaayaaku.’ Bu mùndì mupete cintu kampànda bwàbò bòbò.” Èè, awu ki mùshindù ùtùci cilwa. Ànu nàнку menemene. Ànu too ne pìikalàYe mucìmpèèshe, dyàmbedi, pàtupù ncyèna mwà kucifila to.

<sup>58</sup> Pa nàнку, dìbà adi, mpa tuumazola tukèsè etu panùtu nummòna nta pa dísu apu. Nènku cyòci eci, dyàmbedi, pàngààbangì, ncivwa mwanji kupeta eci citùpà to, ngaalu kucipeta kukaadi ditùkù dìmwè anyi àbìdì, mu diitu mwàmwa.

<sup>59</sup> Mpindyewu, bantu aba bàdi—bàdi. . . Peetèlò ùdi wàmba, mwaba ewu, mutùdì ne cyà kwikala baabanyanganyi bàà ngiikàdìlù Wendè wa Bunzambì. Mpindyewu, muntu ne muntu wa kutùdì ùdi ùteeta bwà kukola too ne mu cipidi cyà Nzambì.

<sup>60</sup> Mpindyewu, paanyimà pàà twètù bamanè kujikija Bitampì Mwandamutekète, nènku, mu cikondo aci cyà dyela dyà mpungi wa Cìtampì cyà Mwandamutekète, anyi dikùtulula. . . Mu bushùwà bwà bwalu, tudi bamanyè ne cìtampì nciyì, mbwà kupàtula mudimu wà bwambi, kukùtulula Bitampì Mwandamutekète. Nènku netùmonè cyòci aci pa dizòla. Nkukùtulula Muckenji kampànda, cintu ciikàle citwà cìtampì.

61 Dilòlò dya dyàlumingu dyàshàadi edi, mvwa muyiishe pa: “Nsapi.” Ne nsapi ndiitabuuja. Diitabuuja ndidi dikwàte nsapi, ne nsapi m’Mufundu. Ne Kilistò ki Ciibi. Nwamònu anyi? Pa nàнку diitabuuja didi dyàngata ndungilu mikesè yà Mufundu kàdi kukàngula matùmbi ne bwimpè bwà Nzambi, dibikangwila cisàmbà Cyèndè. Nwamònu anyi? Pa nàнку, didi, diitabuuja ndidi dilamè nsapi idi ikàngula Kilistò bwà cisaàmbà; ikàngula cyôci eci, icibuulula.

62 Pa nàнку, leelù ewu, netùteetè bwà kwangata yôyi nsapi yimwèyimwè ayi, bwà kukàngula njila wa kulwa mwena Kilistò wa bukolè mu cipidi cyà Nzambi, bwà ne, ikalè Tabernacle udi ne mwoyi bwà Nzambi udi ne mwoyi wàmòna mwà kusòmbelamù.

63 Vùlukàayi ne, Nzambi ùdi ùDibuulula mu mìshindù yisàtù. Musangu wà kumpàla, Yèyè wàkaDibuulula mu Dikunji dyà Kapyà, aci cyàkabiikidiibwa ne m’Buutaatù. Pashiishe Nzambi umwèumwè awu, mumwènèshìibwe mu Yesù Kilistò, uvwaYè mwibàkile mubidi, mwenzè mubidi ewu. Musangu mwisàtù, kupicila ku lufù lwà mwinè mubidi awu, Yèyè kujidila Èkèleeziyà bwà Yèyè kumòna mwà kusòmbelamù. Civwa n’Nzambi kumutù kwètù; Nzambi neetù; Nzambi munda mwètù; Nzambi umwèumwè awu.

64 Ki bwà cinyi cyàkabiikidiibwa ne n’Taatu, Mwànà, Nyumà Mwimpè to. Kì Nzambi yisàtù to; midimu yisàtù yà Nzambi umwèpelè. Bu nànsha bapetè miinè meeji awu ku Nsangilu wa Nicée, nunku katùvwa mwà kwikala mu cibwejàkàji cyònsò eci to, kí mmwòmò anyi? Mmwòmò. Kì nanzambi yisàtù to. Bantu kabàvwa mwà kubyùmvwa mùshindù ùvwà Yesù wàkula ne Taatu, ne Yèyè ne Taatu bàdi Umwe to. Ee, ki mwaba awu ùdi bwalu mu kaabujimà busanganyibwa’s. Cyà bushùwà, ùcivungulula ànu nàka. Cyà bushùwà. Nwamònu anyi? Kì n’Nzambi yisàtù to. Midimu yisàtù! Mìshindù yisàtù yà dimwènèshiib- . . .

65 Ncinyi aci? Nzambi mwikàle wènza bu udi upweka milongo too ne kùdi bufùki Bwèndè. Nzambi mmuswè bàMukuukwilè. Mwàkù ewu *Nzambi* ùdi ùmvwija ne “cintu cyà dikuukwila.” Nènku n’Nzambi ùteeta kuteeka bantu Bèndè mu ngiikàdìlù udi ùkèngediibwa, bwà Yèyè amòne mwà kupeta kùdìbo cyàkabàfùkilàYe. Kàakakwenza bwà wìkale cingà cintu pa kuumusha mwànà wa balùme ne wa bakàji wa Nzambi to. Wèwè mupangile aci, mupangile kwikala mwànà wa balùme ne wa bakàji wa Nzambi, udi mupangile kiipàcilà.

66 Nènku “kupangila,” mwàkù ewu *m-p-è-k-a-a-t-ù* ùdi ùmvwija “kupangila kiipàcilà,” kupangila kiipàcilà. Nènku, mèmè ngaasa cintu ciludikila, ngeela dizaaji mu ntàntà wa mètres makumi ànaayi ne mwandamukùlù, mpindyewu ngàasa; ngàngata cingoma cyànyì ngàasa, kàdi mpangila cyôci aci, mu ntàntà wa centimètres dikumi anyi dikumi ne yisàtù,

cidi cyenzèke ncinyi? Bikèngela bàjaalamije ndudi yà cingoma cyànyi aci. Kùdi katanyi mwaba awu. Nènku mèmè mupangile diitabuuja mu Nzambi, mèmè mupangile kwikala mwena Kilistò. . . Nzambi wàkakutèèka mwaba ewu bwà wèwè kwikala mwena Kilistò. Wèwè museesùke muyè ku luseke lùmwe, alùkilà bàkujaalamijilè ndudi. Nènku kùdi cintu ànu cìmwèpelè cidi mwà kukujaalamijila ndudi, ki Mifundu. Nyumà Mwimpè mu Mifundu, ùkujaalamija, ùkupingaja cyàkàbìdi buludi ku cintu ciludikila aci. Ncyà bushùwà.

<sup>67</sup> Mpindyewu netùlongè Díyi Dyèndè. Stefano wàkamba, mu Byenzedi 7, kàbìdi ne mu. . . Twànjàayi kubala cyòci aci. (Citùdi twamba mpindyewu eci, tudi twakula bwà Tabernacle kampànda wa Nzambi.) Mpindyewu, Stefano wàkamba ne. . . (Mùdibi ne, neciikale Tabernacle kampànda udi ne mwoyi wa Nzambi udi ne mwoyi.) Stefano ki udi mwàmbe, mu Byenzedi nshapità wa 7, ne ndi ngeela meeji ne tudi. . . mu Byenzedi 7, kubangila ku mvensà wa 44:

*Baataatù bèètù bàvwa ne tabernacle wa bujaadiki mu cipèèlà, bu mwàkadiye mutume díyi bwà kwenza, wàmbila Mòsà, bwà ne ùvwa ne cyà kumwenza bilondèshile mùshindù wàkamònaye.*

*Yèyè mene awu wàkapetàbo kùdi baataatù bèètù, baataatù bèètù bàkalwà paanyimà kumubwejabo ne. . . Yesù mu bukòòkeshi bwà bàà Bisàmbà byà bendè, bàvwa Nzambi mwipàte kumpàla kwà baataatù bèètù, too ne ku ditùkù dyà Davidi;*

*Yèyè wàkapeta dyàkalenga kumpàla kwà Nzambi, ne kujingaye bwà kupetela Nzambi wa Yakòbò tabernacle.*

*Kàdi Solòmò ngwàkamwibakila nzùbu.*

*Kàdi Mutàmbe bunène wa mu Dyulu kàtu ùsòmbela mu ntempèlù myenza ne byanza nànsha; bu mùdi mupròfetà wamba ne,*

*Dyulu dìdi nkwasà wanyì wa butùmbi, ne buloba bùdi citèekedi cyànyi cyà makàsà, nanzùbu kaayi unwàngübakilà nwènù? mùdi Mukalenge wamba, anyi mwaba wà ciikishilu cyanyi ngwèpi?*

<sup>68</sup> Mpindyewu mu. . . Mpindyewu, “tabernacle,” ùdi, mu bushùwà bwà bwalu, mwaba utùyaaya bwà kwikishilamù, mpindyewu, kupetelamù citaleela, ne bikwàbò, bu mùdi diikisha dyà patùdi tulààla tulù, anyi bikwàbò. Mpindyewu, Ebèlù 10, ku mvensà mwi5, Pòlò nyèwù ùcibwejamù.

*Ki bwà cinyi pàdiye ulwa pa buloba, ùdi wamba ne: Mulambu wa mashi. . . (N’Kilistò awu). . . Mulambu wa mashi anyi mulambu wa bintu wèwè kwèna muswè to, kàdi udi mundongòlwele mèmè mubidi:*



69 Mpindyewu Tabernacle ncinyi? Mubidi kampànda, Nzambi mwikàle musòmbèle mu Mubidi kampànda.

70 Nzambi musangu kampànda, lwà kuulu kwàka, pààkatùlukàYe pa mukùnà, nànsha bu—cimpàngà cyà ngombe anyi ngombe yêyè mulenge mukùnà awu, úvwa ne cyà kushipiibwa. Nzambi ngwa cijila.

71 Makèèlèlà dilòòlò, pàvwà Banjèlò abu babwikile mpàla Yàbò. Bàselàfimà bàà cijila ne mpàla yà cijila, kabàyi bamanyè nànsha mpèkaatù mwinè ne ncinyi to, kàdi bikèngela bwà Bòbò kubwikila mpàla Yàbò, mu Bwikadi bwà Nzambi; bàbwikila makàsà Ààbò, mu didìpwekesha.

72 Mpindyewu, Nzambi wa cijila kàtukù mufwànyine kulekela mpèkaatù pèndè ànu nànkù to, pa nànkù cintu nànsha cimwè kacivwà mwà kulenga ku mukùnà kúvwà Nzambi aku nànsha.

73 Pashiishe Nzambi kudyenza mubidi ne kusòmbaYè munkaci mwètù, mu mmwènekeli wa Yesù Kilstò, Mwan'Èndè wa balùme, bufùki Bwendè. Pashiishe Mwànà awu kufilaYè mwoyi Wèndè, ne Kabùlù kàà Mashi kàà Nzambi kutaayikakù, bwà Mwoyi kupàtùkawù mu Mashi awu, bwà kulwawù kutùdì.

74 Ku Mashi awu nkutùdì bakezùdìibwe. Nènku mashi ètù twètù mpindyewu, mwoyi wètù twètù, wà bwena wàkafùmà ku dijinga dyà disangila dyà mulùme ne mukàji awu, ki wàkapàtula wètù mwoyi wà pa buloba. Mashi à Yesù Kilstò ngàdi àtùkezula, àshintulula ngiikàdilù wetù, mu kutùma kwà Nyumà Mwimpè pambidi pèètù; dîbà adi tudi tulwa mu ngiikàdilù wa Bunzambi wa Nzambi, dîbà adi tudi tulwa cisòmbedi cyà Nzambi. Yesù wàkamba ne: “Mu ditùkù adi nenùmanyè ne Mémè ndi munda mwà Taatù, ne Taatù munda Mwànyi; Mémè munda mwènù, ne nwènù munda Mwànyi.” Nwamònu anyi?

75 Kumanya mùdì Nzambi mu Èkèleeziyà Wèndè. Èkèleeziyà mpindyewu ùdi ne cyà kwangata kaaba kàà Kilstò, mwikàle ùtùngunuka ne mudimu Wèndè wà bwambi. “Ewu udi ungiitabuuja Mémè, byenzedi bìNdì ngenza yêyè neàbyènzè pèndè. Ànu mu katanci kakesè emu, bàà pa buloba kabàakuMmòna kabìdì to; kàdi nwènù nenùMmòne, bwalu Nèngiikalè neenù, munda mwènù mene, too ne kundeekeulu kwà buloba.” Nwamònu anyi? Ki bwalu mbwòbù abu, kutùngunuka ne mudimu Wèndè.

76 Mpindyewu, Nzambi, anyi Bible ngudi mwàmbe mwaba ewu, cyòci aci. Stefano wàkaakula bwà pàakaasà Solòmò ntempèlù ne: “Nènku Mutàmbe bunène wa mu Dyulu kàtu ùsòmbela mu ntempèlù myenza ne byanza to. ‘Bwalu Dyulu didi Nkwasa Wanyi wa butùmbi, ne buloba bùdi citèekedi Cyanyi cyà makàsà. Kàdi mwaba wa ciikishilu Cyanyi ngwèpi?’ Kàdi Wèwè udi mundongòlwèle Mémè Mubidi.” Amen. Nwàfikì's.

77 “Wèwè udi mundongòlwèle Mémè Mubidi.” Nzambi ùdi ùsòmbela mu cipidi cyà muntu kampànda, mwikàle ùdileejila

Yèyè mwinè mu Kampànda awu. Dikuukwila dipwàngàne! Nzambi munda mwètù twètù, twètù biikàle Tabernacle Wendè, Nzambi ùdìmwènesha. Kaa, s'tudi bafwànyine kushààla pa cyòci aci too ne panwìkala bafwàne kupeta cipwìdiji mu nzùbu emu, bwà luuyà. Tàngilàayi numòne, ne, Nzambi misangu yònsò, dìbà dyònsò, ùtu ànu uDileejila mu muntu.

<sup>78</sup> Ûvwa n'Nzambi munda mwà Mòsà. Mutàngilaayi yèyè awu, mulediibwe mulombodi; Kilistò. Cikondo cyàkamulelèbo kùvwa dikèngesha dyà bânà, bakeba bwà kumupeta yèyè; ncintu cìmwècìmwè aci cyàkenzeka bwà Kilistò. Kàdi yèyè wàkalwa—wàkalwa kusungidiibwa mu ciinè cikondo aci; ke mùvwà Kilistò pèndè. Yèyè wàkadi mufidi wa mikenji; ke mùvwà Kilistò pèndè. Mòsà wàkabànda ku mukùnà, matùkù makumi ànaayi, ne wàkapeta mèyì matùma, ne wàkatùùluka ku mukùnà. Kilistò wàkaya mu cipèèlà, matùkù makumi ànaayi, ne wàkaalukila, wàmba ne: "Nwàkuumvwa bantu bàà kale bàmba ne: 'Kwendi masandi.' Kàdi, Mèmè ndi nzwàmabila ne, ewu yònsò ukàtàngidi mukàji, bwà kumwalakana, wàmanyi kwenda nendè masandi." Nwamònu anyi? Miine maalù ónsò mashìleshìilàngàne aa, cìvwa, Nzambi udileeja Yèyè mwinè.

<sup>79</sup> Tàngilàayi Yòzefù, mulediibwe mwànà wa balùme wa nyuma munkaci mwà—mwà cisumbu cijimà cyà bânà bààbò. Bònsò bàvwa bantu ànu bìmpè, bònsò abu bankambwa. Kàdi, pàakalwà Yòzefù, ùvwa yèyè mushìilàngàne. Ûvwa yèyè mwà kumòna bikèènà—kumòna, kuumvwija bilòòtà, kàdi bàakamukina kùdi bânà bààbò bwà ciinè aci. Ànu bwà mudimu mene ùvwà Nzambi mumutèèkèle pa buloba bwà kwenzaye, bânà bààbò kumukinabò bwà ciinè aci. Nwamònu anyi? Ne biinè byònsò abi bìvwa bifunkuna nkùrusè. Nènku, tàngilàayi, bàakamusumbisha ku binjana byà mfranga bitwè ku makumi àsàtù, kùdi bânà bààbò. Kumwimanshabò mu dijìmbà, bwà kufwàye, kùdi bânà bààbò. Bàakamupàtula mu dijìmbà adi, kuya kasòmbayè ku dyàbalùme dyà Pàlò. Ne muntu nànsha umwe kàvwakù mwà kulwa kùdi Pàlò to, mwine uvwa ne bukontononyi bwà buloba bujimà mu diinè ditùkù adi awu, muntu nànsha umwe kàvwa mwà kulwa kùdi Pàlò to, ànu yèyè mupicile kùdi Yòzefù. Muntu nànsha umwe kèna mwà kulwa kùdi Nzambi to, ànu mupicile kùdi Kilistò. Nènku pàvwà Yòzefù ùmuka mu nzùbu wa bukálenge, kumpàla kwà kuumukayè, kùvwa mpungi udila, ne batùmiibwe bàà ne mikenji bàvwa bàya lubilu kumpàla kwèndè, bènda bèèla mbila ne: "Twàyi cinù! Yòzefù nyàwù wìya!" Nànsha wèwè usanganyibwa penyì, anyi mwikàle wenza cinyì, nànsha mudimu wèbè ne mushinga wa bishi; uvwa ne cyà kupòna pànshì ku binù too ne pàvwà Yòzefù ne cyà kufika mwaba awu.

<sup>80</sup> Nènku pàadilà mpungi, dimwè dyà ku àdi pànshì aa, cinù cyònsò necitwe pànshì ne ludimi lwònsò nelùjikulè patòòke. Kilistò, wetù Yòzefù, pàashiyaYè Butumbi ne kulwa Yè, mudimu

wèbè kawàkwikala ne mushinga dîbà adi to. Cinù cyònsò necitwe panshi, ne kujikula ne Yèyè ki Mwànà wa Nzambi. Ncyà bushùwà.

<sup>81</sup> Kàà, mùshindù mwinè utùdi tuMumòna mu Davidi's wè! Mùshindù ùvwà Davidi, mfùmù mubèngiibwe awu, bamutònkòle mu nkwasa wèndè wa butùmbi, kùdi bânà bààbò, mwanèndè mulela wa balùme, kusòmbayè pa Mukùnà wà Olèvà, pàvwàye wènda ùbànda apu, ku lusongo lwà Mukùnà wa Olèvà, waluja mèsù pa Yelusàlèmà kàdi kwasayè mwadi; bwalu mwómò amu bantu bàà cisàmbà cyèndè sungasunga, bàvwàye mukwàcilekwàcile mudimu ne mulongeshe Nzambi, bantu bàà cisàmbà cyèndè sungasunga bàmusàka kule bènda bàmwasa mangùlùbà, bàmutwila matè ne bàmwelulwila, pàvwàye wènda ùbànda mukùnà mwikàle mubèngiibwe. Kaa, cimfwànyì kaayipu cipwàngàne cyà Mwànà wa Nzambi, pààkapitàku bidimu nkàmà mwandamukùlù; Mfùmù mubèngiibwe, munkaci mwà bantu bàà cisàmbà Cyèndè sungasunga, musòmbe pa mukùnà ùdila Yelusàlèmà, mwikàle Mfùmù mubèngiibwe.

<sup>82</sup> Cìvwa ncinyi? Nzambi mwikàle ùdileejila Yèyè mwinè mu baprófeta abu, biikàle baleeja Kilistò.

<sup>83</sup> Pashiishe kulwakù Kampànda uvwa bupwàngàne bwà Nzambi. Ùvwà Nzambi munkaci mwètù.

<sup>84</sup> Ne kubangila ku cikondo aci, Yèyè mmudiileeje Yèyè mwinè mu Èkèleeziyà Wèndè, luseke lwà dyà kùneeku kwà Kàlvariyò elu. Pa nàнку, nudi numòna's, tudi bònsò tudyènzeja bwà kuya kafika ku diikala cisòmbedi eci, Tabernacle ewu wa Nzambi udi ne mwoyi. Mpindyewu kùdi bàmwè bantu. . .

<sup>85</sup> Tudi tumòna apa, mmwàmbe ne: "Kumpàlampàla tudi ne diitabuuja, bukole, dimanya, didikànda, lutùlù, bwimpè anyi difwànà dyà Nzambi, ne dinanga dyà bwànà bwètù." Bìmpè. Dinangangana dyà bwànà bwètù, ne pashiishe kusàkidila dinanga. Anyishaayi ncibalè, cyònsò, ncibalùlùlè cyònsò, bwà nwikale batwishiiibwe ne nudi bacyùmvwè mpindyewu. Mpindyewu netùbàngile ku mvensà mwi5.

*Nènku pa kuumusha cyòci eci, biikàle badifile ne cisùmì cyònsò, ku diitabuuja dyènù nùsàkidile bukole; ne ku bukole dimanya;*

*Ne ku dimanya didikànda; ne ku didikànda lutùlù; ne ku lutùlù difwànà dyà Nzambi;*

*Ne ku difwànà dyà Nzambi dinangangana dyà bwànà bwètù; ku dinangangana dyà bwànà bwètù luse, lùdi lwikàle dinanga.*

*..bintu ebi byòbi munda mwènù, ne biikàle bivulàngàne, bìdi byenza ne kanwikadi baatùke anyi kanùyi nukwàma mamuma mu dimanya dyà Mukalenge wètù Yesù Kilistò.*

86 Mpindyewu, Peetèlò ùdi munkaci mwà kutùzòlela cintu kampànda mwaba ewu, mùshindù wà kufika kwìnè aku.

87 Mpindyewu ndi njinga kwamba cintu eci, ne, kùdi bàmwè bantu bàdi ne ndambù wa bwinè bukolè ebu, dimanya, lungènyi, lutuùlù, ne bikwàbò, bàtù kabàyiku nànsha badyàmba ne mbeena Kilistò to. Mpindyewu tudi ànu . . .tudi tulongesha kàlaasà kàà dyàlumingu. Kàdi's ncyà bushùwà. Kùdi bàmwè bantu bàtu ne ndambù wa byòbi ebi, kabàyiku badyàmba mùdìbo beena Kilistò to. Kàdi aci kacýena . . .Aci kacýakukùmbaja bwalu to. Aci cidi ànu bu mùdi nyuunyi mufiike ùteeta bwà kudisomeka masàlà à nyuunyi wa kayiba mu mapwàpwa èndè awu, bwà kumuvwijawu nyuunyi wa kayiba. Cìdiye ùdi ùdifwisha ànu bundù cyanàànà. Mbipicìbwe ne yéyè mushààle ànu nyuunyi mufiike awu. Nwamònu anyi? Pàdiye ùteeta bwà kudyenzeja ne biine bintu ebi yéyè pèndè kàyì mwena Kilistò apu, s'ùdi ànu mu mwaba ùdi kawùyì wèndè to.

88 Mbyenze ànu mùdi mucì wà sycomore ùdyenzeja bwà kwenza ma-pommes. Kawèna mwà kucyènzakù to, nwamònu's, nànsha mudìwu pààwù mucì amu. Kàdi kawèna mwà kwenza ma-pommes to.

89 Mbyenze ànu mùdi kampundu kàteeta bwà kukwàtàkaja myòsà yà mùkòòkò, kaditàcisha bwà kwikalaku mùkòòkò kàdi pààkù kiikàle myòsà yà mùkòòkò, anyi, kiikàle kampundu. Nudi numòna's, kakèèna mwà kukwàtàkajakù myòsà yà mùkòòkò to. Kakèènakù mwà kuyènta to. Myòsà ya mùkòòkò ndipà dipèèsha mùkòòkò, kí ndipèèsha kampundu to. Nkafwànyine kudyenzeja bwà kwenza maalu bu mùkòòkò, kàdi kòkò kàdi ànu kampundu. Nwamònu anyi? Pa nànkù, ke kòkò aku ne: “Èè, mèmè's ndi mwà kudya bu mùkòòkò. Ndi mwà kwenza *cikampànda* bu mùkòòkò.” Nènku nànsha wèwè mwà kwenza ní ncinyi ní ncinyi, bìkèngela wikalè mùkòòkò bwa wèwè kwikala ne myòsà yà mùkòòkò.

90 Nènku anyìshaayi ngìmane ndambù kaaba aka. Mùkòòkò kawùtu ukwàtàkaja myòsà to. Ùtu ne myòsà yà mùkòòkò bwalu mmùkòòkò. Bantu bààbùngì bàtu bàteeta kwamba ne: “Èè, nènditacishè bwà kulengela. Nènditacishè bwà kwenza *cikampànda*.” Wèwè kukwàtakaji cintu nànsha cimwè to. To, kwèna mwà kucyènzakù to. Mùkòòkò kawèna ùcyènta to, kabèèna bàwùlòmba bwà kucyènta to, kabèèna batèkemena ne newùkwàtakaje myòsà to. Wòwò ùtu ùtòloka myòsà ayi, ne wòwò mwìnè ùtu uyitòloka bwalu mmùkòòkò.

91 Nènku paùdi mwena Kilistò, udi ukwàma wèwè ànu cyanàànà mamuma à Nyumà. Kwèna—kwèna uàkwàtakaja to. Kwèna uditàcisha bwà kuàkwàtakaja to. Udi uteeta . . .Wèwè kùdyènjiku cintu kampànda cyùdi kùyì to. Wèwè udi ulwa ànu cidi cikèngela bwà wèwè kwikala aci, nènku pashìishe cyòcì aci necidyènzèkèlè nkààyaaci. Nukààdikù bumvwe bantu bàmba ne: “Èè, s'nyàwù nkwambila. Ndi . . .ngàdyènjì mwena

èkèleeziyà. Bi—bikèngela bulelèlè ndèkelè mashimi aa”? Ki wèwè udi uteeta kukwàtàkaja kàbìdì cintu kampànda awu, bwà mpindyewu. Kwèna mwà kucyènzakù to, pa nàнку kabyèna bikèngela kuditàcisha bwà kucyènza to, ànu mùdìbì ne—ne—kampundu kakèèna mwà kufika ku diditòlwesha myòsà yà mùkòòkò to. Kakèèna mwà kucyènzakù to.

<sup>92</sup> Anyì, ciminyì citeeta bwà kudyà pàmwè ne nkuci, ciminyì citeeta—ciminyì citeeta bwà kwikala nkuci. Nudikù mwà kudifwànyikijila kabangu nyuunyi pambèlu pààpa, kàmba ne: “Udi mumanyè’s, mémè ewu’s ndi nkuci,” udisomeka ndambu wa masàlà, kàmba ne: “Mònaayi, ngáfwannganyi ne...” Nwamònu anyi? Yèyè’s mmufwànyine ànu kwikala mu mùshindù ùdì kawùyi wòwò to. Awu ki—ki muntu udi udyàmba mùdiye cintu kampànda pàdiye kàyì cyòci aci to. Nwamònu’s, kwèna mwà kucyènza to.

<sup>93</sup> Kwèna mwà kwamba ne: “Mpindyewu mònaayi, bìdì bikèngela bwà mémè kwikala ne bukolè, pa nàнку ndi muswè kwikala ne bukolè. Bu mùdìbì bikèngela bwà mémè kwikala ne nsòmbelu wa difwàna dyà Nzambi, pa nàнку nèngiikalè ànu ne cyà kwikala naadi.” Mòna’s, wèwè’s udi ànu uteeta bwà kudisomeka masàlà. Nànsha mùdìbì ne àdì pabwipi pàà wolola cyanza ulenga, kàdì kwèna mwà kwasa masàlà pa nyuunyi udi kàyì mwenawù to. Nwamònu anyi? Kabyàkukùmbanaku to. Ne byòbì biine bìdì bileeja ànu mùshindù kaayi ùdì nyuunyi awu mwena lubombo. Nwamònu anyi? Nudikù mwà kudifwànyikijila kabangu nyuunyi kakulàkàjì kàteeta kwangata masàlà àbìdì à nkuci, kàmba ne: “Tàngilàayi kuneeku, nwamònu’s, ndi nkuci”? Nwamònu anyi? Mòna’s, twètù bònso’s tudi bamanyè ne nkabangu nyuunyi. Nwamònu anyi? Nwamònu anyi? Kwàjikì. S’mbimwèke patòòke ne yèyè nkabangu nyuunyi.

<sup>94</sup> Ee, mpindyewu mùshindù awu ki ùdìbì, kuteeta bwà—bwà kukwàtàkaja bwena Kilistò. Kwèna mwà kucyènzakù to. Cintu cyà kumpàla cidì cikukèngela kwenza, nkulediibwa cyàkàbìdì. Bikèngela ùshintuludiibwè. Nwamònu anyi? Nènku paùdì mushintùlùke, udi ulwa cifùkìibwà cipyacipyà. Mpindyewu udi wenda ulongoloka, mpindyewu. Nwamònu anyi? Mpindyewu kabyèna bikèngela bwà wèwè kuditàcisha bwà masàlà to, nebìdyènzèkèlè, pa—pawàlediibwa cyàkàbìdì. Èyowa’s, mukalenge.

<sup>95</sup> Ànu múnkaadi mwambàmbe. Wangata ngu—ngulube, umunyaanuna kàdì kumuvwadika nkooçi wa ntùkàseelò, to, nkooçi wa ntùkàseedò, kumuvwadikaye, kàdì kumulekela kuyaye pambèlu pààpa; yèyè’s uyaaya ànu buludi mu ciinà cyà bitoci ùkadìvwàdamù. Bwalu, udi umona’s, kì ncifwànyine kwikalakù ne dikwàcisha nànsha dyà kànà to. Yèyè nngulube. Wendè ngiikàdilù’s nyèyè awu. Kudìvwànda kwà mu bitoci’s ki wendè ngiikàdilù. Bikèngela ùshintulule ngiikàdilù wendè awu, nènku (yèyè) bikwàbò byònsò abi nebìdyènzèkèlè.



paùdì kùyi ne diitabuuja to. Ncyà bushùwà. Pa nàнку, nudi numòna's, pa dizòla dyànyi apa, ndi ne cishìmikidi cyena diìnà, diitabuuja ki cishìmikidi cyà byònsò abi. “Bwalu kakùyi diitabuuja kabyèna mwà kwenzekakù bwà muntu kusànkishayè Nzambi to. Ewu udi ulwa kùdì Nzambi udi ne cyà kwitabuuja ne Yèyè ùdikù, ne m'Mufuci wa aba bàdì bàMukèba ne lukunukunu.” Nwamònu anyi? Ki cidìye ne cyà kwikala. Nènku paùdì mwena mpatà ku Bible, paùdì mwena mpatà ku ne Dìyì ndilelèlè, abi's mbipicìbwe ne wèwè mushàadile paanyimà too ne pawànji kucìtabuuja.

<sup>103</sup> Mpèkaatù ncinyi? Bupidyà. Kùdì bintu ànu bibìdì bìdì bikòntonona muntu. Cìdì anyi mpatà anyi diitabuuja, eci anyi eci. Udi mukwàcìbwe kùdì cìdì cìkòòkesha nsòmbelu wèbè. Mbilàale ànu ku búngì bwà diitabuuja dyùdì naadì, mwaba wùdì mwà kubànda kufika awu.

<sup>104</sup> Kàdì, dyàmbedi, bìdì bikèngela cìikalè diitabuuja. Anyishaayi nganji nshaaleku pa cishìmikidi aci ndambù. Mpindyewu, diitabuuja ncyùdì ne cyà kwitabuuja aci. Diitabuuja didi. . . “Diitabuuja ndilenga dyà bintu bitèkemena.” Bidi ne, wèwè ukàadi mumane kwikala ne cintu paùdì ne diitabuuja, bwalu mbibuulùdìbwe mu diitabuuja. “Diitabuuja ndilenga dyà bintu bitekemena,” Ebelu 11, nwamònu's, “cileeeji.” Ncinyi ciinè aci? Ncileeeji cyà mùshindù kaayi? Cileeeji cyà cijila.

<sup>105</sup> Ki bwà cinyi, paùdì wamba ne: “Mwanèètù Branham, ndi ngitabuuja ne Nzambi m'Mwondopi.” Èè, pawìkalà mwitabuuje cyòci aci, ne pashìishe muMwitabe bu Mwondopi webè, ne kuyi udinga to, kàdì mwitabe mu bulelèlè ne ku mibundàbundà Yèndè udi mwondopiibwe, kakwènakù cintu nànsha cìmwè cìikalà mwà kukuumushaku to. Cikaadi cintu cimana kujikija. Kadi wèwè udi mufwànyine kwikala ne ditèkemena, mutungùnùke ànu ne kwepela kuya ku *cikampànda* ne kwepela kuya *cikansanga*. Kàdì paùdì ne diitabuuja, wèwè udi mumanyè ne udi naadì, bwalu ki cileeeji mene. Ukàadi mumane kucipeta. Mwà. . .

<sup>106</sup> Mbanganyi, nì nganyi nì nganyi, bàvwàku batèèlèje Oral Roberts mu dindà emu, pàvwàye uyiisha mu dindà emu, Oral Roberts? Mémè—mémè mvwa mumuumvwe wamba cintu kampànda nàнку awu cyà ne kudi diitabuuja kampànda, dyà disùngidiibwa, kusambila disambila dya diitabuuja, dyà disùngidiibwa. Kwambaye ne: “Enza ditwàngana dyèbè mu kulenga kwà cisanji, enza ditwàngana dyèbè mu kulenga kwà cintu kampànda, bwà. . .” Muluma awu uvwa wenza nàнку, bwà cyòci aci cyàmòna mwà kupa bantu cintu kampànda bwà bàmone mwà kutèkapù byanza. Cintu kampànda, cyà wamba ne: “Ngàcipeci mpindyewu, bwalu yèyè wàngambidì bwà mémè kulenga cisanji cyànyi. Ngàcipeci.” Nwamònu anyi? Mpindyewu, abi bidì anu bimpè. Kàdì, mpindyewu, diitabuuja dilelèlè dishùwashùwàlè kadyèna ne bwalu bwà kulenga nànsha

cimwè cyà ku bintu abi to. Kàdi, ncyèna mpiisha Mwanèètù Oral to, nànsha kakesè. Yèyè udi munkaci mwà kwenza mudimu munène, ne yèyè mwinè mmuntu wa difwàna dyà Nzambi, nènku bulelèlèlè mèmè—mèmè ndi ntwà Oral Roberts mushinga wàbùngì. Lutàtu ndwà ne katwèna naabò bàà bu yèyè awu bààbùngì to.

<sup>107</sup> Kàdi cìndì nteeta kwamba, cìdì—cìdì ne, diitabuuja kadyèna dikèngela cintu kampànda to. Nwamònu anyi? Diitabuuja didi diitabuuja Dìyì dya Nzambi. Bwalu diitabuuja didi difùma ku “dilenga anyi”? To. “Diitabuuja didi difùma ku dyumvwa, ne ku dyumvwa dyà Dìyì dyà Nzambi.” Aci ki cìdì cìdyèlesha lwongo. Didikù. Nwamònu anyi? Nènku diitabuuja, bu mùdìbì byambiibwe emu, kaditu ne ntàntà to. Diitabuuja mmpindyewu mene. Diitabuuja ng’apa mene. Mpindyewu bu ne kùdì muntu kampànda . . .

<sup>108</sup> Mwànà mukesè wa mu dibòko awu, ditùkù adi. Maamù wa bwena uvwa Mwanèètù wa bakàjì Kidd ne bakwàbò biikàle bàmba awu, uvwa ne mwànà mukesè wa mu dibòko mwikàle ne mala pambèlu, ne njila wa bunyawu kayi muunzuluke, wa byàkudyà kwikalabì bipicila. Mpindyewu, inàbànza ewu, pàakumvwaye Mwanèètù wa bakàjì Kidd ne bakwàbò abu bàfila bujaadiki, kwitabuujayè ne bu yèyè ànu mwà kubwela mu ditwàngana, ne mèmè musambidile mwànà wa mu dibòko awu. Mpindyewu, nwamònu’s, Nzambi ùtu ùtùpeesha bantu . . .

<sup>109</sup> Bàmwè bàà kutùdì batu bènza malabula ne Nzambi, à—à bushùwà menemene mu mùshindù wà ne Nzambi ukaadi ànu bu ne nkuya mwaba ewu, ànu bu ne, nkwakula ne Mwanèètù Neville anyi ne muntu kampànda ùdì wèwè mumanyàngàne nendè. Nenku tutu misangu mikwabo tulomba biine bantu abu bwa kutusambidilabo. Ki citudi ne cya kwikala twenza’s. Dìbà adi twètù ne diitabuuja dyà ne muntu mulùme awu anyi mukàjì awu, udi utùsambidila awu, bwà ne ùdì wàkula ne Nzambi, dìbà adi diitabuuja dyètù didi dyèla nzadi dikwàta. Didi dikwàta ndendende. Bwalu mbujike.

<sup>110</sup> Bwalu mbwebu. Mwena Loomo awu wàkaya bwà yèyè kupetangana ne Yesù. Ki kwambayè ne: “Mèmè—mèmè ncyèna mwakànyine bwà Wèwè kulwa mu wanyì nzùbu to. Ncyèna—Ncyèna. Ncyèna—Ncyèna mwakànyine to. Nènku nci—nciwa . . . Ncyè—Ncyèna ndibala mu mùshindù awu to. Kàdi,” yèyè ne, “mwanàànyì wa balùme udi usaama be. Nènku Wèwè amba ànu Dìyì cyanààna, wamònu’s, mwanàànyì neikalè ne mwoyi.”

<sup>111</sup> Cìvwa ncinyi? Ntàntà kàvwa ne cìvwaye ùshintulula to. Nwamònu anyi? Bwalu, Nzambi utu myaba yònsò. Nzambi utu wa bukolè bwònsò. Ne mwaba wònsò ùdì Nzambi ùsanganyibwa awu, ngulu yònsò yìdì mwaba awu. Ne Nzambi mwinè, bu mùdìYe myaba yònsò, bìdì byènza ne Nzambi ikalè myaba yònsò, kwònsòkwònsò. Nwamònu anyi? Nzambi mmunène mu



Àlèmanyè, mu Suisse, ne mu Àfrikè mwàmwa, mu kasunsa kàmwèkàmwè aka, ànu mùdiYe mwaba ewu emu. Kaa! Kàdi's ki bwalu mbwòbù abu.

112 Ki mpindyewu yéyè kwamba ne: “Ncyèna mwakànyine bwà Wèwè kulwa ku wanyì nzùbu to. Ambà ànu Dìyi cyanàànà.” Cìvwa ncinyì aci? Cìvwa ndiitabuuja dyà mwena Loomò awu. Wàkaciitàbuuja.

Ki Yesù kwamba ne: “Kwàta njila ndààku. Mwanèèbè ùdi ne mwoyi.”

113 Ki yéyè kwasa lwendu kuya, lwendu lwà matùkù àbìdi. Nènku pàakacyàbu, kumpàla kwà kufikayè kumbèlu, yéyè kusambakeena ne bàmwè bàà ku beena mudimu bèndè bènda balwa. Ki bòbò kwamba ne: “Mwanèèbè ùdi ne mwoyi.”

114 Ki mwena Loomo awu kutupikaye bikolè ne disànka, e kufikayè ku dyamba ne: “Mpa díbà kaayi dyà ditùkù dyàbangiye kuumvwa bìmpè adi? Cìvwa citùpà kaayi cyà ditùkù?”

Awu ne: “Tukààvwa twipacila pa díbà dyà dikumi ne òmwè, ki pààbangiye kusànguluka.”

115 Ki mwena Loomò awu kumanyayè ne pàvwa mpa díbà adi menemene pàvwa Yesù mwambe ne: “Mwanèèbè ùdi ne mwoyi,” ne yéyè mwitabùùje apu. Amen.

116 Wa bukolè bwònsò, mwikàle myaba yònsò, mumanyi wa byònsò, kayi mikàlu, ki Nzambì nyawu. Nènku, pàdibo babiikila ku tèlèfonè bàmba ne: “Sambila!” Ditwangana adi's! Nènku diitabuuja dyèbè ndìdi ditwàla Nzambì. Ki cintu cìdi cifikisha disambila ne Nzambì ku ditwilànganà, cyàpàmwè, mu cyalu. Disambila's! Diitabuuja dìtu dishintuluka dyùmuka *apa* diya *apa*. Dyòdì ndìdi difikisha byòbi abi ku ditwilànganà.

117 “Amba Dìyi. Cyònsò cìndi nkeba bwà Wèwè kwenza nkwamba Dìyi, ne byònsò nebilongolokè.” Nùdi numòna's, kabìvwa bikèngela ànu Yèyè mwikàlepù to. “Ambà Wèwè ànu Dìyi cyanàànà.” Bwà cinyi? Nzambì ùtu myaba yònsò. Ùtu wa bukolè bwònsò. Yèyè ùdi ne bukolè mwinshì mwà buloba ànu mùdiYe naabù kumutù kwà buloba, anyì luseke lukwàbò kanà lwònsò. Yèyè ùdi Nzambì. “Nènku cintu cìmwèpelè cìdi cìkèngela Wèwè kwenza nkwamba ànu Dìyi cyanàànà,” mwàkambàye.

118 Nènku, mpindyewu, diitabuuja dìdi dyènza bikwàbò bìdi bishààlè abi. Diitabuuja dìdi dyènza bikwàbò bìdi bishààlè abi. Pa nàнку udi ne cyà kwikala ne diitabuuja bu cishìmikidi. Bwena Kilistò bwònsò, cyònsò cyùdì aci, cyònsò ciwìkalàku aci, ncishindàmèene pa diitabuuja mu Dìyi. Ki bwalu kaayi mèmè ndi ngiitabuuja Dìyi. Nwamònu anyi?

119 Ncyèna mwà kutèèkakù dyànyì diitabuuja pa cìngà cintu nànsha cìmwè to. Mèmè mwambe ne nditèèkè pa èkèleeziyà, mpa èkèleeziyà kaayi pangàaditèèkà: ngwa Katòlikè anyi, ngwa ba-

Luthériens anyi, ngwa ba-Méthodistes anyi, ngwa ba-Baptistes anyi, anyi ngwa beena Mpenta? Mpa cinyi pândiku mufwànyine kuditéèka? Ncyéna mumanyè. Bòbò bwònsò's nyawu bàdi bèèlakana ne bikwàbò byònsò, nshinga mijingàkànàngàne, ne bikwàbò byònsò.

<sup>120</sup> Kàdi pândi nteeka diitabuuja dyaànyì mu Dìyì Dyèndè, ndyéle lwongò. Muntu nànsha umwe kèna ùDyùmvwijakù to. Ki Dyòdi edi: EMU MMÙDÌ MUKALENGE WÀMBA. Dìbà adi Cyòci aci ki cìndi ngìtabuuja. Ki cishimikidi ncyòci aci.

<sup>121</sup> Ngàngàbukà mukwàbò wa maalu mîmpè lwà kwìnshì eku mu cimenga emu, mulunda wanyì, Ngàngàbukà Sam Adair. Tudi bakole pàmwè kacya ku bwànà. Nwènu bwònsò nutu bamanyè Sam. Nènku ùvwa ùngambila, wàmba ne: “Bill. . .” Paanyimà pàà difika dyà cikeena-kumòna aci, pàmvwà mumwambile mwaba ùvwàye mwà kwashila nzùbu wendè awu, mùshindù ùvwà mmwènèkelu wa nzùbu awu. Mpindyewu ndàâyimù, numukonkàâyì musangu mukwàbò piikalà bwalu abu kabùyi bulelèlè. Bidimu bìbìdì anyì bisàtù kumpàla kwà kwenzekaci, mèmè kumwambila mwaba ùvwà nzùbu awu mwà kwikala. Mèmè ne: “Newàngate ntàntà mutwè ku mpangu yinaayi ayi.” Nènku kùdi cintu ànu cimwèpelè pankaci pèndè yèyè ne cyòci aci, ki mwaba wà dyalujulwilangana bukòlè awu. Ngàngàbukà Adair mmwàngate citupà cikwàbò cìvwà cishààlekù aci, ne nzùbu wa dsenzela manga. Kwàjiki's. Ngàngàbukà Adair mmuuje cyònsò aci ànu menemene, cikeèna-kumòna aci. Piinààpu, ùvwa mmwaba ùvwàye yèyè wàmba ne: “Muntu kèna nànsha mwà kupàlengakù to munda mwà bidimu makumi àbìdì ne bitaanu. Mmwaba ùdi ne bilumbu ku tuumilaadi.”

<sup>122</sup> Mèmè ne: “Ngàngàbukà, Mukalenge ùdi ùkupà mwaba awu, bwà didìpwekesha dyèbè.”

Yèyè ne: “Mèmè wa bwalu ncìyi nànsha ne bwakàne bwinè.”

<sup>123</sup> Mèmè ne: “Wèwè's udi nkùvu. Udi ne cizubu lwà pamutù, cizubuzubu mùdi utàngìdila balunda bèèbè pambèlu apa, kàdi lwà munda wèwè's udi muntu wa bushùwà. Patuka mu cizubu aci.” Mèmè ne: “Nzambi wàkupèèshi mwaba awu.”

<sup>124</sup> Yèyè ne: “Kacya ncìtu mukwelèku wèwè ewu mpatà to, Billy, kàdi bwà aci bìkèngela mèmè kucyèlakù mpatà.”

Mèmè kwamba ne: “Ndààku ku bìrò byèbè.” Ki kupàtùka e kuyayè.

<sup>125</sup> Dìndà dyà pàakacyàbu, yèyè kumbiikila ku tèlèfonè, wàmba ne: “S'ki mèmè ufwàfwa ne mashìka ewu.”

<sup>126</sup> Mèmè ne: “Mbwalu kaayi abu?” Tuvwa lwà mu ngondo bu wa mwandamutekète nànkù. Mèmè ne: “Mbwalu kaayi's, Ngàngàbukà wa yààyà?”

127 Yèyè ne: “S’nkaadi mumane kusumba mwaba awu, Billy. Bénji cisangilu makèèlèlè dilòòlò awu mu Boston, nènku nkàadi mumane kusumba mwaba awu mu dindà emu.”

Mémè ne: “Mémè’s mvwa mukwambìle.”

128 Mvwa muyèku ditùkù adi, mémè kuyiikilangana nendè, pàakantaayikila cingoma mumpàla apu. Yèyè kwamba ne: “Ndi ndifwànyikijila ne nkàadi mubùlondèle bantu cinunu bàtù bamvwile mwaba ewu, mùshindù awu.” Ncinyi ciinè aci? Mpindyewu, pàdi Nzambi wamba bwalu kampànda, bùdi ne cyà kwenzeka.

129 Makèèlèlè dilòòlò balunda bakwàbò bàvwa bamvwilè. Bàvwa búmvwe bwalu búmvwà mulonde bwà cikeena-kumòna cyà nyama wa kashà wa nsengu mapànda uvwa ne nsengu bule bwà mètre mujimà awu, ne ours munène wa lwonji mufikùlùke. Ncyèna mumanyè búngì bwà bantu bàvwa balwè kwànyì to, bàjinga kumòna cyòci aci. Mémè ne: “Mètre wa kupima nendè nyèyè ewu. Tèèkaayi pa lusengu apu.” Yèyè ùkaavwa muumvwe balonda bwalu abu kumpàla kwà kwenzekabù. Nwamònu anyi? Bwà cinyi? Pàdi Nzambi wamba bwalu kampànda, bùdi ne cyà kwenzeka. Ki cidi cyèenza ncyāci, ncijaadikiibwe.

130 Mpindyewu, ndongamu wa lupàndu’s ki yèyè ewu. Nènku ewu piikalà cikhèèna-kumòna Cyèndè ncyùle ànu menemene, ànu mùshindù menemene ùdibi byambiibwè ne nebyènzekè, ne èkèleeziyà ewu mumanyè ne mmwòmò, kàdi netwàmbè bìshi bwà Dìyì Dyèndè? Nwamònu anyi? Dyòdi adi’s didi ne ditwishiiwa kupita dyà cikeena-kumòna. Piikalabi ne cikhèèna-kumòna kacivwa cyakùle mùmwe ne Dìyì to, nàнку’s cikhèèna-kumòna aci ncyà mafi. Kàdi bikèngela Dìyì, kumpàla, bwalu Dìyì ki Nzambi. Nwamònu anyi? Pa nàнку, Yèyè udi myaba yònsò. Yèyè ùvwa mucyàmbè kaaba aka, kàdi kwenza ne cyùle mu Canada. Amen. Nwamònu’s, Yèyè ùdi myaba yònsò. Èyo.

131 Dyàmbedi, udi ne cyà kulediibwa cyàkàbìdi. Ne pashiishe paùdi ulediibwa cyàkàbìdi, udi ne diitabuuja; udi witabuuja Dìyì. Paùdi kùyi ànu mwanji kulediibwa cyàkàbìdi to, newikalè ànu wela Dyòdi adi mpatà. Pawikalà ànu ne meeji à butèndèlèèdi cyaanàà, ne—ne mwikàle ne kaa—kaa—kaadimanya kakesè kàà buntu kàà ne bikèngela wenza maalu mímpe, kwàdyakwikalakù ne mùshindù wà kwitaba cidi Dìyì dyà Nzambi dyàmba to. Kwàdyakucyènzakù to. Bikèngela ulediibwe cyàkàbìdi. Nènku, mulediibwe cyàkàbìdi, aci ncidi cilela diitabuuja. Eyo. Dìbà adi, paanyimà pàà wèwè mupete diitabuuja, edi didi *apa* edi, d-i-i-t-a-b-u-u-j-a, diitabuuja, dìbà adi wàfikì ànu pa kaaba kàà kubangila dikola.

132 Mpindyewu, bantu bààbùngì bàtu bàya ku cyoshelu, basambila, bàmba ne: “Mukalenge, mfwilèku luse.” Nènku dilabula dinène dyà dijidiibwa dibàvwila, ne bikwàbò. Mwaba awu ùmba ùpeta dicyònkomoka, ùjuuka ùya ku cyoshelu

aku, wela mbila. Wêwè udi walukila, wamba ne: “Nzambi àbènèshiibwe, ngàmuceci.” To, wêwè udi ànu mubange cyanààna mwaba wa wêwè kumòna mwà kukola. Kwèna mwanji kwenza cintu nànsha cimwè to. Wamònu anyi? Cintu cimwèpelè cyùdi mwenze cidi ànu kutèeka kwà cishimikidi.

<sup>133</sup> Mpindyewu wêwè udi uya bwà kwasa nzùbu, nènku ùpòngolola cishimikidi cyà shàmendà, wêwè ne: “Balùmyàna wa yààya, mèmè’s ngàapeci nzùbu.” Wamònu anyi? Ciwapeci ncishimikidi bwà kwashilapù nzùbu webè. Mpindyewu bikaadi bikèngela bwà wàsè nzùbu.

<sup>134</sup> Mpindyewu mwaba awu ki ùdi cintu cibwela, mu dindà emu, citwikala mwà kwakwilapù mpindyewu. Èyo. Bwà nzùbu, cishimikidi eci ncidi cilwa dyàmbedi. Cishimikidi cyà bwena Kilistò ncinyi? Diitabuuya mu Dìyi dya Nzambi. Ki cishimikidi cyèbè ncyôci aci. Mpindyewu ubanga kwenda kukola. Pashùshe ubanga, ubanga kusakidila ku cishimikidi eci.

<sup>135</sup> Mpindyewu, paùdi wasa nzùbu, udi wasa makunji èbè ne bikwàbò byònsò. Mwanètù Wood, ne bàmwè bàà ku benji bàà misàkà yà nzùbu ne benji bàà makumi a byà dyasa naabi bàdi apa aba mbafwànyine kutwàmbila mùshindù wùdi mwà kwasa nzùbu webè. Wamònu anyi? Kàdi mèmè nènkwambilè mùshindù wà kwasa nzùbu webè wa nyumà, mùdi Nzambi mwà kusòmbela. Yèyè mmuswè kusòmbela munda mwèbè. Mmuswè kukuwija mudiYe Yèyè mwinè. Mmuswè bwà wêwè kwikala muleejiiibwe, to, wêwè uleeje CidiYe Yèyè.

<sup>136</sup> Nudi bamanyè’s, mu bikondo byà kale pàvwàbo ne ciibidilu cyà kwenza ngòlò, kumpàla kwà kupetabò cyamu cidi cyèngulula bwà kumwoshabò ne kundeelelu, bàvwa ne ciibidilu cyà kwikala kutuuta ngòlò, batuuta bwà kuumusha bisòta, cyamu cifiike ne cyà kalaabi ne bikwàbò bintu, babyuumusha, batungunuka ànu ne kutuuta, bamukudimuna emu ne emu, bamutuuta. Ba-Indiens bacitu bacyèna too ne mpindyewu, kutuuta kwà ngòlò, bamutuuta. Nudi bamanyè mùvwàbo mwà kumanya ne cyamu cifiike cyònsò cyùmùkù, ne bukooya bwònsò ne bikwàbò, ne bisòta byònsò byùmùkù mwòmò anyi? Mpàvwà mutuuci awu mwà kumòna cimfwànyì cyèndè yèyè mwinè cimwènekelamù, cyenzè bu mu lumwènu, mwòmò amu. Úvwa ushaala mukezùke ne mutòoke bikolè mu mùshindù wà ùleeja cimfwànyì cyà mutuuci awu.

<sup>137</sup> Mùshindù awu ki ùdi Nzambi wènza. Ùdi wàngata ngòlò udiYe musangane mu buloba, ne Ùmutuuta, ku Nyumà Mwimpè, ùmukùdimuna emu ne emu, ùmukùdimuna, umukudimuna kabidi, umutuuta too (ne pàdiYe upeta) ne pàdiYe mwà kumòna cimfwànyì Cyèndè. [Mwanètù Branham ùdi ùtuutakaja byanza misangu yàbùngì pàdiye wàmba cyambilu eci apu—Muf.]

<sup>138</sup> Nènku ki citùdi twètù ne cyà kwenza, kuleeja Mwànà wa Nzambi. Nènku mpindyewu tudi ne cyà kwenza mudimu

Wëndè. Mmwambe ne: “Ewu udi ungiitabuuja Mémè. . .” Yone Munsantu 14.7: “Ewu udi ungiitabuuja Mémè, byenzedi bindi Mémè ngènta neàbyènzè pèndè.” Wèwè udi ubanga kuleeja byenzedi byà Kilistò.

<sup>139</sup> Kàdi bààbùngì bàà kutùdì bàtu bàteeta kwenza byenzedi byà Kilistò kumpàla kwà kuleeja kwà Kilistò kwikalakù munda mwètù. Mpindyewu’s ke lutàtu ndwòlò alu. Tudi tusangana bintu abi byènzeka. Nutu bamanyè nànkù. Mémè ntu mumanyè nànkù. Tutu tumòna byòbì ebi, bilendwishi njila mujimà. Tudi tusangana mishiki ne mishiki yà bambi badishinde, yà beena Kilistò, biikàle bungwija mishiki njila mujimà, mbwalu kabàvwa babwelemu mu mùshindù ùvwa ùkèngediibwa to.

<sup>140</sup> Nènku ki bwà cinyì ndi mwaba ewu mu dindà emu, mbwà kuteeta kulongesha kaaèkèleeziyà kakesè aka, ne mémè mwinè, mùshindù utùdì mwà kulwa cisòmbedi cyà Nzambi udi ne mwoyi. Mbanganyì bàdì baswè kwikala cyòcì aci? Cisòmbedi cyà Nzambi udi ne mwoyi!

<sup>141</sup> Mpindyewu citùdì twenza ncyòcì eci. Cintu cyà kumpàla ncinyì? Kwikala ne diitabuuja ne kulediibwa cyàkàbìdì. Ki kuteeka kwà cishimikidi nkwòkù aku.

<sup>142</sup> Pashiishe, paanyimà pàà twètù batèèke cishimikidi, ciibìdì udi usàkidila ku cishimikidi cyèbè aci. “Nusàkidile ku diitabuuja dyènù,” mùdì Peetèlò mwàmbe apa. Usàkidile ku dyèbè. . . Dyàmbedi udi ne diitabuuja, pashiishe udi usàkidila bukolè ku diitabuuja dyèbè adi. Edi ki dikunji dìdì dilonà. Dyàmbedi, pòngolola nshàmendà bwà cishimikidi cyèbè: diitabuuja. Pashiishe, ku diitabuuja dyèbè, sàkidila bukolè.

<sup>143</sup> Mpindyewu, ànu mwaba awu ki ùdì wèla bààbùngì bèètù cibula. Eyowà’s, mukalenge. Èyo. “Nusàkidile bukolè ku diitabuuja dyènù.” Aci kí mbwena kwamba ne kusòmba nsòmbelu wa buuvirgo to, nudi bamanyè’s, bu mùdì mukàjì anyì mulùme, ne bikwàbò. Aci kaciyèna ne dipetangana nànsha dimwè ne cyòcì aci to.

<sup>144</sup> Bible mmwambe, tudi tubala mwaba ewu mu Mukàndà wà Luuka, mwaba udi Wu mwambe ne: “Bukolè bwakapatuka munda Mwende.” Mmwòmò anyi? Patwikala tukeba bwà kwikala bu Yèyè, tudi ne cyà kwikala ne bukolè, dìbà adi. Tudi ne cyà kwikala naabù, bwà kwikala bu Yèyè. Ki musambu wà kumpàlampala wùnkaadiku munange, mu—mu misambu, ùmwè wà ku yidì mitàmbe bunène, ùvwa wà ne: *Kwikala Bu Yesù*. Èè, pàngiikala nkeba bwà kwikala bu Yesù, bikèngela ngiikale ne bukolè, ne njila udibu mwà kupicila buumukila kùndì buya kùdì bantu. Bwalu: “Bukolè bùvwa bùpàtuka munda Mwèndè buya kùdì bantu.” Bukolè! Nènku kumpàla kwà wèwè kubùpatula kuyabù s’bidi bikèngela wànji kwikala naabù dyàmbedi. Wèwè kuyi naabù to, kabwàkupàtuka nànsha. Kakwèna cintu cidibu mwà kupàtùkilamù to.

145 Twámbebi tǔng bu muntu úteeta kukòka bukolè mu twètù, kàdi kabèji kàà shekè kaalukila bafunde ne “mfranga kí mmikùmbàne to”? Nwamònu anyi? To, to, kamwèna kantu nànsha kàmwè mudibo mwà kubùkokela to, shekè mmwaluja. Muntu ùkutàngila mumòne bu ne wèwè udi mwena Kilistò, kàdi mààlabà ukumòna pambèlu apa wenza maalu à lukutukutu bu ngènzàmpèkààtù, kakùyì bukolè bwinè bwà nsongo bùdi mwà kukòka ku ciinè aci to. Nwamònu anyi? Èyo.

146 Bukolè bùdi ne cyà kwikala munda mwètù. Nènku patùcìdi ànu katùyì banji kupeta bukolè to. . . Nènku patùdi tupeta bukolè bwà bushùwà, kí patùdi mwà kubùsàkidila ku diitabuuja dyètù. Kí cimanu cyà cishimikidi cìdi cìlonà. Mpindyewu, dyàmbedi udi ne cyà kwikala ne diitabuuja. Diitabuuja nkààyaadi kadyàkukùmbaja bwalu to. Bìkèngela wèwè. . . Peetèlò mmwàmbe ne: “Pashìishe nùsàkidile bukolè ku diitabuuja dyènù.” Udi ne cyà kwikala ne bukolè, bwà wamòna mwà kubùsàkidila ku diitabuuja dyèbè.

147 Mpindyewu, pashìishe, mbifwànyìne kwikala ne, cyùdi kùyì ubùpetela, mbwalu èkèleeziyà yàbùngì yà leelù ewu yìdi yìlongesha ne kabyèna bìkèngela kwikala naabù to, anyi ne matùkù ààbù àkaadi mamanè kupìta. “Kabyèna ànu bìkèngela kwikalabo naabù to. Cintu cimwèpelè cìdi cìkèngela bwà wèwè kwikala naaci nkudishiya mwena èkèleeziyà. Èyowà, matukù àkaadi mamanè kupìta.”

148 Bukolè, muntu yònsò ewu mmumanyè cìdi mwàkù ewu bukolè umvwija, nwamònu’s, nènku bìkèngela ànu bwà twikale naabù. Pìikalàbi ne bukolè bwàkapàtuka munda Mwèndè, bwà kwondopa mukàji uvwa usaama awu, Yèyè’s mmuswè bwà bukolè bùmwebùmwe abu kwikalabù mu Èkèleeziyà Wèndè, bwalu Yèyè nguvwa cileejilu cyètù. Nènku pìikalàbi ne Yèyè ùvwa ne bukolè bwà kupà bantu, Yèyè mmuswè bwà twètù kwikala ne bukolè bwà kupà bantu. Nènku bukolè mene ncinyi? Bukolè ndikàndà, ngulu.

149 Bàmwe bàà kùdìbo kabàtu nànsha bìitabuuja bukolè bwà Nzambì to. Badi bàmba ne: “Aci—aci—aci cikaadi cimane kupìta. Cintu cimwèpelè cìdi cìkèngela bwà wèwè kwenza cìdi ànu kufùndisha dìnà dyèbè mu mukàndà wà cibungu, ne kukùmyaminabò màyi pa mutù, anyi kukupòngòlwelabò màyi, anyi kukubàtiizabò, anyi ní ncinyi cikwàbò. Kí cyònsò cìdi cìkèngela bwà wèwè kwenza ncyòci aci.”

150 Kàdi Peetèlò yèyè mmwàmbe apa ne: “Nùsàkidile bukolè.” Mpindyewu, Peetèlò udi wàmba bwà diibaka dyà Nzùbu wa Nzambì, nwamònu’s, Ntempèlù wa Nzambì, umujaadika mu mwaba kampànda. Nènku paanyimà pàà wèwè mupete bukolè, udi ne cyà kupeta. . . Paanyimà pàà wèwè mupete diitabuuja, udi ne cyà kupeta bukolè pàmwe ne dyòdi adi. Ncyà bushùwà. Kupeta bukolè bwà kwabanyina buloba bujimà.

151 Ntu muyiishe diyiisha kampànda kùkaadi bidimu bitwè ku makumi àbìdì, ngeela meeji, pa Révérend Mukalenge Mbata. Mbata, mpaasàtá. Mvwa mudìpàtule mu mèyi àdì mu mwaba ùdì Yesù mwámbe ne: “Londeshaayi mbata, mùdiyi kayìyi nànsha yikwàta mudimu mukolè anyì yiluka. Kàdi ndi nzwàmbila ne, Solomo mu butumbi bwèndè bwònsò kààkavwàlakù bu umwe wa ku yôyi ayi to.”

152 Tàngilàayi mbata. Ùdi ùpatukila lwà mwinshi menemene mwà bitocì mwàmwa. Nènku kasunsa ne kasunsa kònsò kàà ditùkù aka yèyè ùdi ànu ne cyà kwikala ubùkoka mu buloba. Nwamònu anyì? Kàdi cidiye wènzà ne bukòlè ebu bùdiye ùkòka ncinyi? Ùdi ùwàbanyinangana. Ùdi ùmwèka cintu cilenga cyà dikèma bwà mubandidi. Ùdi ùdìvùngulula bwà bwìci, bwà lubùlùbùlù kulwalù kwangata walù ndambù. Kèna ùdyàbakeena to. Ùdi yèyè ànu naabù, bwà wàbànyinangana. Ambabi túng bu lubùlùbùlù mwà kubwelamù; mfranga kayiyi mikùmbàne to, kamùyì bwìci? Lubùlùbùlù lukesè alu ndùfwànyine kudikoonya ku mutù ne kwamba ne: “Ewu kàdi ki mbata wa mùshindù kaayi mwinè ewu’s?”

153 Bu muntu mwà kulwa, ukèba bwà kupeta lupàndu, kàdi ùya ku èkèleeziyà udi witabuuja ne matùkù à bishimà àkaadi mamanè kupìta?

154 Bu mwàkambà Jack Coe musangu kampànda. Ùbwela mu nzùbu wa cidiilu, wangata dibèji dinène dyà ménà a byàkudyà; ubanga kubibala too ne kwinshi, bifwètekè ne bikwàbò. Yèyè ne: “Ndyàdya bifwètekè.”

“Ee, aci civwa bwà matùkù à kale. Katwèna naaci to.”

155 Bipìciibwe ne mutèèke dibèji dyà ménà à byàkudyà adi panshi mupàtùke’s, nwamònu’s, ncyà bushùwà, bwalu nyàwù kabàyi ne cintu nànsha cimwè cyà didyà to, twamb’eku twamb’eku. Pa nànkù mbipìciibwe ne wèwè muyè ku mwaba ùdì nzùbu wa cidiilu mwikalekù ne cintu kampànda cyà didyà.

156 Nènku muntu wa nyumà, wènda ùkola, ùdi dijinga ne cintu kampànda cyà didyà. N’Dìyi dyà Nzambi. Mémè ndi ngìtabuuja Dìyi dyònsò dyà ku Dyòdi adi.

Nzambi udi ne meesa maadija kudi bansantu  
bàà Nzambi bàdìishiibwa,

Yèyè udi ùbìikila bantu Bèndè basungula ne:  
“Lwàyi nùdye.”

Yèyè udi ùdiishangana ne Manà Èndè, Ùdi  
ukumbaja dijinga dyètù dyònsò,

Kaa, mbilenga be bwà kudyà didyà dyà dilòlò  
ne Yesù díbà dyònsò!

157 Ncyà bushùwà. Èyowà’s, mukalenge. Yèyè ùdi naaWù. Èkèleeziyà ùdi naaWù, Èkèleeziyà wa Nzambi udi ne mwoyi, ùdi mwibàkiibwe mu muntu mupwàngàne ewu, wa dimanya dyà

Kilistò. Mpindyewu, mpindyewu wêwè udi ne cyà kwikala ne bukolè.

<sup>158</sup> Pashiishe mémè kwamba ne, cyà kumpàla, kùdi muntu utu munange kuumvwa dipembu. Yèyè kàtu ne citù to. Útu ne dipembu. Kumpàla kwà yèyè kumòna mwà kwabanyinangana diinè dipembu adi, bikèngela kwanjiye kwikala naadi. Kumpàla kwà kwabanyinangana bwìci, bikèngela kwanjiye kwikala naabù. Kumpàla kwà yèyè kwabanyinangana bulenga bwà kwìsù, bikèngela kwanjiye kwikala naabù.

<sup>159</sup> Kumpàla kwà wêwè kwabanyinangana bukolè, bikèngela wikale naabù wêwè. Pa nàнку, ku diitabuuja dyèbè, sàkidila bukolè. Amen. Nudi búmvwe anyi? Tudi bafwànyine kushàala pa cyòci aci ntàntà mule, kàdi díbà ditùdi naadi ndifwànyine kutùkèèpela. Kusàkidila bukolè ku diitabuuja dyèbè. Mpindyewu, dyàmbedi ndiitabuuja, pashiishe bukolè.

<sup>160</sup> Nènku pashiishe, ciisàtù, udi usàkidila dimanya. Dimanya, mpindyewu, kí mbwena kwamba ne ndimanya dyà maalu a pa buloba to, bwalu adi didi dicimbàkàne kumpàla kwà Nzambì; kàdi ndimanya dyà kujingulula, kujingulula (cinyi?) maalu mímpe ne maalu mabì. Udi uàjimgilula bìshi, mwaba awu, pawikalà ne dimanya dyà bwena Kilistò ne bukolè bwèbè ne diitabuuja? Udi ujingulula bwà kumanya ne Díyi ndilelèlà anyi ndyà mashimi. Nènku bu wêwè mwà kutèeka ku luseke twitabàayi yèbè yònsò, ne bupidyà bwèbè bwònsò, byònsò byùdi ulaka mukana wamba ne udi mwenze abi, díbà adi udi ne dimanya dyà kwitabuuja ne Nzambì kèna mwà kushima to. “Díyi dyà muntu yònsò diikalè mashimi, kàdi Dyànyì diikalè dilelèlà.” Nwamònu anyi? Mpindyewu udi wenda upeta dimanya. Adi ki dimanya dyà kumutù kwà mamanya. Kabyèna ne mushinga bwà wêwè kwikala ne mapòlomè ànaayi à mu tulaasà tutùmbùke kampànda, anyi cintu bu nàнку awu, bwà kudìpeta to, bwalu makolè miinè ónsò aa Nzambì ngudi ukupèeshawù, bwà kuàtèeka pa cishimikidi cyà diitabuuja dyèbè, bwà wamòna mwà kufika ku cipidi mu kaabujimà cyà muntu mulelèlà udi ne mwoyi wà Nzambì. Èyowà’s, mukalenge.

<sup>161</sup> Sàkidila, sàkidila dimanya, bwalu, dimanya dyà Díyi Dyèndè. Udi ne cyà kudìtabuuja mu mùshindù ewu. Cileejilu, udi ne cyà kwitabuuja leelù ewu ne . . . ne kuciitaba ne, matùkù à bishimà kí mmanji kupita to. Dimanya dyà ne cidì Nzambì mwàmbe, Nzambì mmukùmbàne bwà kucyènta.

<sup>162</sup> Abraham wàkiitabuuja cyòci aci. Ne pàkaavwàye ne bidimu lukàmà, yèyè kààkatenkàkanakù ku mulayi wà Nzambì ku bupidyà to. Tàngilàayi numòne mùvwà Díyi adi dimwèka dicimbè. Ki muntu nyèwù, wa bidimu lukàmà, mwindile dileediibwa dyà mwànà mu díkù dyèndè, ùmulela ne mukàji wa bidimu makumi citèemà. Nwamònu anyi? Bidimu bitwè ku makumi àtaanu byà kàciyi utwa panshì, yèyè ukaavwa



musòmbè ne mukàji awu kubangila pacìvwàye—mwànà wa bakàji mutekète, anyi ku bunsongaàkàji. Ki yèyè ewu, musùlù weendè wa mwoyi mumanè kufwà. Ne matrice a Sarah pààwù akaavwa mamanè kufwà. Ne ditèkemena dyònsò dimanè kuya, bwà twètù bambe kwakula bwà ditèkemena. Kàdi, nànsha nànkù, mutèkemene cìvwà kacìyi kutèkemena, wàkiitabuuja mu ditèkemena, bwalu ùvwa ne dimanya dyà ne Nzambì ùvwa mukùmbàne kushààla mukwàte ku cyònsò cyàkalayàYe.

<sup>163</sup> Mpindyewu, wèwè naadi mùshindù awu, díbà adi kaayi ùdisàkidile ku diitabuuja dyèbè. Paùdì ne bukolè bwà cyà bushùwà, ùbùsàkidile ku diitabuuja dyèbè. Paùdì mwà kupàtuka pambèlu apa mu mùsèsù, kwikala ne nsòmbelu bu mwena Kilistò, kwenza maalu bu mwena Kilistò, kwikala mwena Kilistò, sàkidila aci ku diitabuuja dyèbè. Paùdì ne dimanya. . .

<sup>164</sup> Wèwè udi wamba ne: “Èè, mèmè ncyèna mumanye mpindyewu Mufùndu ewu ní mmujaalàmè menemene anyi kì mmujaalàmè to. Mpindyewu ki Byenzedi 2.38 ewu, ncyèna mumanyè mùshindù wà kuwùkumbajangana ne Byenzedi 28.19 to, ncyèna mumanyè to.” Èyo. Kùsàkididi cintu nànsha cìmwè to—to, bwalu kwèna mwanji kwikala naaCì to. Wamònu anyi? Ciwènza ncinyi? Bwalu, kwèna mwanji kupeta dimanya dikùmbàne bwà kumanya pa bìdì bitàngila Nzambì to, ne, Bible kàtu wenza kwamba maalu àbèngangana Nendè to. Lekela cintu aci ànu mùdici amu. Kùbwákùlù kàbìdì to. Wamònu anyi? Cilekèle wèwè ànu mudici amu.

<sup>165</sup> Kàdi pawìkala mwà kumòna ne Mifùndu kayèna yìbèngàngana, ne ki cyùdì wèwè mwà kwamba; ne udi mwà kumòna, ne, ku dibuulula dyà Nzambì, Díyi dyònsò nkòong ndifùndiibwe mu maalu masokoka, ne ànu dimanya dyà kùdì Nzambì ndidì mwà kuDibuulula; pashìishe paùdì upeta ne wamba, utwà “amen” ku Díyi dyònsò dyà Nzambì, díbà adi sàkidilàaku cyòci aci ku diitabuuja dyèbè.

<sup>166</sup> Kaa, ukàadikù wenda ushààla muntu mwìmpè bwà mpindyewu ewu. Wamònu anyi? Ukàadi wenda ubànda, wamònu’s. Ne cinyi? Ne diitabuuja, pashìishe ne bukolè, pashìishe ne dimanya. Nudi numòna mudì cyòci aci cyènda cìbaka muntu ewu anyi? Nudi mwà kumòna ne kakwènaku mùshindù wà kucyèpuka to—to. Ewu ki mùshindù wà kulwa mu cipidì mu kaabujimà cyà Kilistò. Èyowà’s, mukalenge.

<sup>167</sup> Kujingulula, kujingulula mu mùshindù mujaalàmè. Kujingulula ní mbìmpè ní mbibì, bwà kwitabuuja Díyi dyà Nzambì. Kujingulula ní mbìmpè ní mbibì, ní bìvwa bikèngela bwà mèmè kukwàcila twitabaayi mudimu anyi kukwàcila Nzambì mudimu. Kujingulula ní mbìmpè ní mbibì bwà ne, bìvwa bikèngela bwà mèmè kulediibwa cyàkàbìdì anyi kuya kashààla mwena èkèleeziyà. Díbà adi ukàadi ubanga. Ujingulula mùshindù mujaalàmè, pàdì muyiishi wamba ne: “Matùkù à

bishimà àkaadi mamanè kupita.” Bible mwâmbe ne: “Yesù Kilistò umwèumwè awu makèlèlè, leelù, too ne kashidi.” Mpindyewu ciwitabuuja ki cyèpi?

168 Paùdi wamba ne: “Ndi ngàngata Nzambi.” Mpindyewu, kwèna ucyàmba ànu bwà kwamba cyanààna ne: “Èè, ndi—ndi ncyàngata’s,” cifùmina ànu mu mwoyi wèbè nàka. Kàdi, cintu kampànda munda mwèbè amu, diitabuuja dyèbè ndidì dipàtukamu adi. S’ki bwalu abu. Diitabuuja dyèbè dyàmba ne: “Mèmè ndi mumanyè ne Yèyè udi umweumwe awu. Amen. Nkàadi ne bujaadiki bwà ne Yèyè udi umweumwe awu. Kakwèna cidi mwà kucyùmusha kùndi to. Ndi mumanyè ne Yèyè mmulelèlè.” Amen. Dîbà adi sàkidila aci ku diitabuuja dyèbè. Citèèkaaku pa cishìmikidi apu. Wenda ubànda mpindyewu, wenda ànu ubànda mutàngìle ku Bukalenge. Wáfiki pa kaaba kampànda mpindyewu. Èyo.

169 Mpindyewu, cintu cidi cìlondà, muyiishi neàkwambilè, ne bantu bààbúngì bàmba ne: “Kùdì. . . Bintu byùdi ubala mu Bible ebi, bìvwa mbwà ditùkù dikwàbò. Mpindyewu, mèmè nènwwàmbilè ne mbwà cinyi. Mbwalu, katwèna dijinga ne bintu abi leelù ewu to. Katwèna naabi dijinga to. Wamònu anyi? Kabìvwa bikèngela bwà twètù kwikala naabi dijinga to. Kabyèna bikèngela bwà twètù kwenza bintu abi to, dyondopa dyà kùdi Nzambi adi. Katwèna twenza dyakula dyà mu myakulu to, mu èkèleeziyà, bwà—bwà kulama èkèleeziyà wètù mululamè. Nènku katwèna twenza *cikampànda* to.”

170 Netùfikè ku cyòci aci. Ndi ne Mufùndu kampànda mufùnda mwaba ewu pa cyòci aci, nwamònu’s, bwà ne bìvwa bikèngela twètù kutùngunuka ne kucyènza anyi kubènga kucyènza, mpindyewu.

171 Kàdi apa mmwâmbe ne: “Ncyèna mumanyè. Kabìvwa bikèngela twètù kucyènza leelù ewu to. Cintu cìmwèpelè cìndi mèmè ngèèla meeji ne cìvwa cikèngela twètù kwenza, bìvwa bikèngela bwà twètù kuyiila mwà kwakula ngaakwilù wa kapelu kumpàla kwà musumbà wà bantu. Bìvwa bikèngela bwà twètù kuya kambila ngàngàbukà wa mitù bwà kutùteetayè mitù, bwà kumòna ní tudì bakùmbàne bwà kwikala bakùmbàne mwà kuditèèja anyi, ne cipidi cyètù cyà dimanya ncibànde mu cipimu cikùmbàne bwà kucyènza, ne—ne bikwàbò byà nàнку awu. Ndi ngeela meeji. . . Ne twètù’s mbàdi ne masangisha matàmbe bunène. Twètù mbàdi biibaka bulongolodi bwètù.”

172 Twètù katwèna twibaka bulongolodi kampànda to. Ncyèna kaaba aka mu dindà emu bwà kwibaka bulongolodi kampànda to. Kilistò kàtukù muntùme bwà kwibaka bulongolodi nànsha. Kilistò mmuntùme bwà kwibaka bantu nkààyà ne kubàfikisha mu cipidi cyà Yesù Kilistò, bwà kwikalabò nzùbu udi utùma nzembu ne cisòmbedi cyà Nyumà, ku Dìyi Dyèndè. Ku Dìyi Dyèndè, nwamònu’s, kwibaka muntu ne kumùfikisha pa kiinè

kaaba aku. Kí nkwiwaka bulongolodi ne kubùfikisha mu mùshindù wà dingumba ditàmbe bunène to, kàdi kwibaka bantu nkààyà kubàfikisha ku bânà bàà balùme ne bàà bakàjì bàà Nzambì. Ke mmwènenenu nyáwù. Nwamònu anyi? Ku diitabuuja dyèbè, sàkidilà bukolè; ku bukolè bwèbè, sàkidilà dimanya. Èè, mpindyewu ukàadi ufika pa kaaba kampànda.

<sup>173</sup> Mpindyewu, pàkaadìbo bàbanga kwamba ne: “Èè, kabyèna bikèngela bwà twètù kwitaba aci leelù ewu to. . .” Wèwè kaayi bìdi bikèngela bwà wikalè naaci. Cìdi ne cyà kwikalakù.

<sup>174</sup> Mifùndu kayèna mwà kushima to. “Ne Yôyi kayèna yà muntu ùdyùmvwijila pàà nkààyendè to,” mùdi Bible mwàmbe. Udi uCiitabuuja wèwè ànu mùshindù ùdìbo baCifunde Mwómò amu awu. Nwamònu anyi? Bikèngela wikalè ne bintu ebi. Ne mùshindù ùmwèpelè wà wèwè kwikalakù mukùmbàne kwikala naabi, nkwikala ne dimanya dilela kùdi Dyulu. Ne dimanya dilela kùdi Dyulu ki dyàshindika Dìyi. Nwamònu anyi?

<sup>175</sup> Bìdi bikèngela wìtabuuje, kí nkuciitabuuja kwà budingibudingi to. Nànsha cimwè cyà ku byòbi ebi kacyèna cyà diitabuuja dyà budingibudingi to, wamònu’s, paùdi uteeta kwamba ne: “Ndi naaci apu.” Kwikadi nyuunyi mufiike udi udisomeka masàlà à nyuunyi wa kayiba mu wèwè to, wamònu’s, bwalu òwò awu neàtuuke àmatè. Kí mmashikemù mùshindù ùtù masàlà àshikamù awu to. Mmasomeka cyanààna.

<sup>176</sup> Ndi mvùlùka mwaba wàkambà Davidi mwaba awu, mu Misambu 1 ne: “Yèyè neikalè bu mucì mukùna ku kaalà kwà misùlù yà màyi.” Nudi bamanye, kùdi dishiilàngana pankaci pàà kwikala mukùna ne kwikala mutèèka cyanààna, mushimika. Bu mùdi mucì wà lusànga wà kale, wàkakùnyibwa, mwikàle ùbweja miji mu buloba ne ùshimata bimpè. Katùpà kàà mucì kakesè kàà kale nkashimika mwaba awu, kwèna mumanyè ne cyàkàvwilà ncinyi to. Kakàyi ne miji. Kakàyi ne cishimikidi. Nwamònu anyi?

<sup>177</sup> Byenze bu mùdi bantu bakwàbò bàtù buumukila mu seminèrè anyi cintu kampànda, nwamònu’s. Kabàyi ne. . . “Èè, Docteur *Kampànda* ki wàkanjidila mèmè ewu mu mudimu wa bwambi.” Aci kacyèna ne cìdici cishintulula to nànsha ciikàle cinganyi.

<sup>178</sup> Kilistò ngudi mwenze bwà ùlediibwe mwómò amu, wamònu’s, wamònu’s, ku diitabuuja dyèbè. Wamònu anyi? Wèwè udi mufùkùlùdiibwe ne mulediibwemù. Ne paanyimà pàà wèwè mumane kulediibwamù, byòbi ebi ki bintu bìdiYe muswè bwà ùsàkidilè. Tùngùnuka wèwè ànu ne kubisàkidila. Mpindyewu tuyààyà twenda tupweka too ne kwinshì kwà mulongo.

<sup>179</sup> Mpindyewu nekwikalè cikwàbò cintu pa bìdi bìtàngilà dimanya edi, citùdi bafwànyine kwamba, dimanya dyà cijila. Nwamònu anyi? “Bible mu ditùkù edi wàjìmiji cidiYe muswè kwamba anyi?” Nwamònu’s, bóbò, bantu bààbùngì bàtu

bànwàmbila cyòci aci, ne Bible kèna ùswa kwamba menemene cyòci aci to. Piikalà Nzambi ùntàbaleela mèmè ewu, ne ùndongolola mu mpèkaatù wanyì, ne piikalabi ne ndi mwànà wa Nzambi, Yèyè's udi ùcyènza. Yèyè ùdi ùnwènza mùshindù awu, nwènù bânà bàà balùme ne [Katùpà kàà mukàbà wà mèyi munda mutupù—Muf.] bàà bakàji. Paùdi wenza cintu cibi, Yèyè ùdi ùkulongolola. Kàdi piikalabi ne Nzambi ùdi ùtàmbe kwikala ne dísù dikolè nàнку awu bwèbè wèwè sungasunga, Yèyè ùkutàbàleela ne ùkulongolola, Yèyè neàtàmbe kutàbàleela Dìyi Dyèndè mùshindù kaayi, dyòdi didi diikalè cileejilu cyèbè, didi diikalè Yèyè mwinè!

*Ku cibangidilu kwàkadi Dìyi, ne Dìyi dyàkadi ne Nzambi, ne Dìyi dyàkadi Nzambi.*

*Ne...dyàkavwijiibwa mubidi, ne dyàkasòmba munkaci mwètù,...*

<sup>180</sup> Dìyi ndibuuludiibwa dyà Yesù Kilistò, mùdi Bible wàmbe, Kilistò mwikàle mubuulula mu Dìyi Dyèndè. Nènku piikalabi mukutabàlèlèlè wèwè paùdi utùpa ku mikenji eyi, Yèyè ùkupiisha bwà ciinè aci, Yèyè mmutàmbe kutàbàlèlèla mukenji Wendè ùdi ùkupiisha awu mùshindù kaayi! Amen.

<sup>181</sup> Tùngùnuka's, wèwè mulùmyànà, kùngambidì mèmè abi bintu to!

<sup>182</sup> Mèmè ndi ngùtàbuuja dimanya dilelèlè, dyà kùdi Nyumà Mwimpè. Dimanya dyà kùdi Nyumà Mwimpè ditu misangu yònsò ditwa "amen" ku Dìyi. Paùdi upeta bintu ebi bidì bimwèka bu bidì bibèngangana, mu Bible, sòmbelà panshi ùbilonge, ne mu nyumà wa disambila mùshindù awu. Nènku katanci aka, Nyumà Mwimpè ùdi ùbanga kubwela mu cyalu. Paanyimà pàà katanci udi ubimòna binwangana, nènku ki wèwè wàcipeci awu. Wamònu anyi? Ki dimanya ndyòdi adi.

<sup>183</sup> Bàmwè bàà kùdibo bàdi bàmbe ne: "Èè, mpindyewu, Bible's mmwambe ne Yèyè ùdi umweumwe awu makèèlèlè, leelù too ne kashidi."

<sup>184</sup> Kàdi èkèleeziyà ùdi wàmbe ne: "Mu mùshindù kampànda, Yèyè ùdi umweumwe awu." Huh-huh! Huh-huh! Nwàmanyi kukàngula kaaba kàà dibwelela, mwaba awu mene. Nwamònu anyi? Èyowà's, mukalenge. To, mukalenge. Yèyè ùdi umweumwe awu. Èyowà's, mukalenge.

<sup>185</sup> "Yesù Kilistò ùdi umweumwe awu makèèlèlè, leelù, too ne kashidi." Kakwèna dishiùlàngana mu Yèyè to, nànsha kakesè. Yèyè ùdi ne mwoyi mu Èkèleeziyà Wendè, mwikàle wènza cintu cimwècimwè aci. "Mu katanci kakesè emu," bu mungàtèèdi cyòci aci kùkaadi katanci, "mu katanci kakesè emu bàà pa buloba kabèèna bàMmòna kàbidì to, kàdi nwènù nenùMmòne." Bwalu, Yèyè wàkamba ne: "Nèngiikalè neenù, munda mwènù mene, too ne kundekeelu kwà buloba." Kàbidì, Yèyè kwamba ne: "Byenzedi bìndi Mèmè ngènza nenùbyènzè pèenù." Kàbidì, Yèyè kwamba

ne: “Nèngiikalè Muci wà mvinyò. Nwènú nenwikalè matàmbà.” Ne ditàmbà pààdi ditu ne mwoyi ànu ku Mwoyi wà Muci wà mvinyò. Cyònsò cidì munda mwà Muci wà mvinyò cidì cipàtùkila ku ditàmbà. Butùmbi’s wè! Pa díbà adi: “Kilistò umweumwe awu makeèlèlè, leelù, too ne kashidi.” Didi dipàtùla Mwoyi wà Mukalenge Yesù Kilistò. Amen.

<sup>186</sup> Dimanya; kadiyi dyà pa buloba to (adi didi dilukakaja lungènyi). Mùshindù wònsò wà dimanya dyà pa buloba didi dilukakaja lungènyi. Nwamònu anyi? Kàdi diitabuuja kaditu ne dilukakakaja dyà lungènyi to. Nzambi mukubuulwile ne cintu *kampànda* necyènzeke, mwena maalu à mamanya yònsò pa buloba ebu mmufwànyine kukwambila ne: “Aci cidì cibèngangana. Kí ncfiwànyine kwenzeka to.” Nànsha nàнку, wèwè udi ucitabuuja. Nwamònu anyi? Èyowà’s, mukalenge. Kadyèna dilukakaja lungènyi to. Bible mmwàmbe ne: “Tudi tushimbula dilukakaja dyà ngènyi.” Kwèna ulukakaja lungènyi ne diitabuuja to. Diitabuuja kaditu ne dilukakaja dyà lungènyi to. Diitabuuja ditu dimanyè mwaba ùdidi disanganyiibwa. Diitabuuja didi dyènza cyenzi. Diitabuuja didi dikwàta dikwàcilamu. Kadyèna mwà kunyungakù to. Kakwena cidì mwà kudinyungishaku nànsha cimwè to. Nànsha ní ncinyi ní ncinyi cyambe *cikampànda*, *cikansanga*, *cikankènga*. Kadyèna dinyungakù to, nànsha kakesè. Didi dyòdi dishàala ànu mwaba awu, dindila, dindila, dindila, dindila. Kabyèna ne cidìbi bishintulula nànsha. Didi dishàala ànu mwaba awu.

<sup>187</sup> Nzambi wàkambila Noà ne bintu ebi nebyènzekè. Pèndè kuciitabuuja. Nwamònu anyi? Nzambi wàkambila Mòsà ne bintu ebi nebiikale mwà kwenzeka. Pèndè kuciitabuuja. Nzambi wàkambila bayiidi ne bintu kampànda nebiikalè mwà kwenzeka: “Bàndaayi kwàka ku Mpenta nwìndilè.” Kushàalabò ànu kuntwaku. Èyowà’s, mukalenge. Eyo.

<sup>188</sup> Mpindyewu, dimanya, mpindyewu, kadiyi dimanya dyà pa buloba to, kàdi ndimanya dyà ku Dyulu. Ne dimanya dyà ku Dyulu adi, pàdi Nzambi mwikàle mpokolo wa dimanya dyònsò, ne Nzambi ùdi n’Dìyi, pashiishe, wèwè ne dimanya dyà ku Dyulu, udi watabuuja Dìyi, nènku udi ulukakaja lungènyi pa cintu kanà cyònsò ànu ku Dìyi.

<sup>189</sup> Nènku cilumbu cyà citàdi cikaavwà èkèleeziyà musanganyiibwemù eci, anyi mèmè nguvwa musanganyiibwemù’s wè. Umwe wa ku bantu abu musangu kampànda, mu kantàntà kakesè kàa dintèeleja, ki uvwa mungambile. Wàmba ne, mèmè mvwa mwàmbe ne... “Kabàvwakù mwà kupeta bwalu bubì nànsha bùmwè to.” Ki pa nàнку bòbò kubanga bwà . . .

<sup>190</sup> Mèmè ne: “Èè, nàнку, piikalàbi ne kakwèna bwalu bubì to, kanwèna nundekelakù ku maci talàlà bwà cinyi?” Nwamònu

anyi? Nwamònu anyi? Ki mémè kutùngunuka, mmwambila Mifundu kampànda.

<sup>191</sup> Yèyè kwamba, mulùmyànà wa katanku awu mwikàle ne mucì wà mfwankà ku cyanza, yèyè ne: “Mukalenge Branham, mémè’s ntu mulongi wa Bible.”

Mémè ne: “Ndi ne disànka pàndì ngumvwa aci nànkù.”

<sup>192</sup> Yèyè ne: “Mpindyewu ndi muswè mmanyè diitabuuja dyà majimbu edi, udi ufucishangana mfranga bwà mishwalà yùdì utuminangana ayi, kaadiitabuuja kakesè kàà majimbu kàà disambidila mishwalà kàdi kuyitùminangana aku, twòtù ‘tululù tulaaba maanyì atu’, tùdì wèwè mwinyike ne: ‘ntululù.’” Yèyè ne: “Pashiishe ubifucishilangana mfranga.”

Mémè ne: “To, mukalenge. Ncìtu mbifucishilangana lufranga nànsha lùmwè to.”

Yèyè ne: “Ee, bwà diitabuuja dyà majimbu edi.”

<sup>193</sup> Mémè ne: “Wèwè ngudi ucibiikila ne ndiitabuuja dyà majimbu, mukalenge. Pèèbè’s wàngambidì ànu mu tusunsa tukèsè emu ne utu mulongi wà Bible.”

Yèyè ne: “Eyowa’s.”

<sup>194</sup> Mémè ne: “Nteelelaaku Byenzedi 19:11.” Dimanya’s! Ki kukwàcikaye ànu yèyè nkàâyendè mu buteyi ànu mu cyòcì aci, ukeba kuteeta bwà kushintulula cyena-bwalu. Mémè ne: “Pashiishe ntèèlèlaaku Yone 5.14.” Kàyì mwà kubitèèla to. Mémè ne: “Pashiishe Yakòbò 5.14.” Kàyì mwà kubitèèla to. Mémè ne: “Utu mumanyè Yone 3.16 anyi?” Nwamònu anyi? Dimanya, meeji matwè, byà pa buloba! Kàdi pàkaavwà . . .

<sup>195</sup> Yèyè ne: “Kadi, Mukalenge Branham, wèwè udi ukèba kulumbulula cilumbù eci ne Bible. Twètù tudi tucilumbulwisha ne mikenji yà ditùnga.”

<sup>196</sup> Mémè ne: “Mukalenge, mikenji yà ditùnga kayìtu miibakila pa Bible anyi? Dìbà adi’s ndi mu bwakàne.” Amen! Cyà bushùwà.

<sup>197</sup> Dimanya; kadiyi dyà pa buloba to. Dimanya dyà nyumà dyà Dìyì, kumanya cidì Nzambi mwambe, kwenza cidì Nzambi mwàmbe, ncyà bushùwà. Pashiishe wèwè ne cyòcì aci mwikàle kàbidì mwà kwitabuuja bintu byònsò ebi, bwà ne Yèyè ùdi umweumwe awu, ne bintu byònsò bìdì Dìyì dyàmbe ebi mbilelèlè, udi utwà ku kantu ne kantu kwònsò “amen.” Aci ncìmpè. Sàkidila aci ku diitabuuja dyèbè. Aci ncìmpè. Eyo.

<sup>198</sup> Muntu yèyè ùteeta kukwambila, wàmbe ne: “Bible ukaadi mujimije bukolè Bwendè. Kakùtu cintu pààci ne ndibàtiiza dyà Nyumà Mwìmpè to.” Huh-huh. Aci kucisàkididi to. Kacyàkukùmbanakù to. Necituukè cimatè. Mbyenze ànu bu kulamika diima pa lubwebwe, kadyàkushàalapù tootoo nànsha. Nedivingutukè.

199 Pashiishe bantu bàkwambila ne: “Kamwèna mùshindù wa kweyemena Bible leelù ewu to. Watàpa ntààlà wadimuka bwà mpindyewu. Kùyi kiitabuuja aci to. Kacyèna mwà kwikala cilelèlà to . . .” S’nukààdi bumvùmvwe cyà nàнку dîbà dyònsò. Kaadîyi kakesè aka kàà ne: “Kamwèna mùshindù wa kweyemena Bible aku.” Ee, wèwè—wèwè mwikàle ne aci mu meeji èbè, ku—kuteeci kucisàkidila to, bwalu kacyàkukùmbana to. Nzùbu mujimà neùpùkile ànu mwaba awu mene.

200 Bikèngela nzùbu awu àlamakajiwè ne nshàmendà wa Nyumà Mwîmpè. Ndi njinga kwamba ne mukwàtakaja pàmwè, nshàmendà mwinè udi umulamakaja awu. Nènku cintu cìmwècìmwè cidi cìcìkwàtakaja. . . Nwènù’s nutu bamanyè mùshindù. . .

201 Ndundu wa munda mulàmba ne soufre ùtu misangu yònsò ùlààla kupita citeetela cyà kale cilamika. Kaaluuya kakesè pàdiku ànu kàlenga citeetela cyà kale cidi cilamika pa ndundu wa munda aci, dyàkàmwè, bidi byènza ne ndundu awu ùdi ukwàta luuya ndambù, wèwè munyeemeshe ànu kaalùbilu kakesè, necìlamuke. Èyowà’s, mukalenge. Nwamònu anyi?

202 Nènku ki lutàtù ndwòlù alu lùdi naalù bantu bààbùngi leelù wa Ndaaya ewu. Bàdi bateeta bwà kulamika dimanya dyàbò pa dimanya dyà pa buloba, ne ndambù wa budimbu bwà kale bwà pa buloba, kàdi, pàkaadi mateeta àlwa anyi: “Èè, pàmwàpa mvwa mutùpakane.” Nwamònu anyi? Ki lupepèlè lupàtuka, ushààla mufwetèlèle mu tusunsa tukesè. Mbila yèbè yònsò yúvwà wela ayi ne ditupika muulu ne pànshì adi kabìciyi ne dikwàcisha kùdi to. Bantu bàkaadi bàkumòna wèwè mwalùkile cyàkàbìdi mu cijibajiba cìmwècìmwè aci. Nwamònu anyi? Ncyà bushùwà.

203 Kàdi wèwè mushààle mwaba awu ne bùngi bukùmbàne bwà luuyà lwà Nyumà Mwîmpè, mu mùshindù wà lùkuvwija wèwè ne ndundu wa munda awu nushààla cintu cìmwè. Ki cyòci aci. Wèwè ne ndundu wà munda nushààla cintu cìmwè. Paùdi ushààla mwaba awu too ne paùdi wèwè ne mulayi wònsò wà Nzambì nushààla cintu cìmwè, dîbà adi sàkidilàaku cyòci aci ku diitabuuja dyèbè. Kabìyi nàнку to, kucisàkididiku to nànsha kakesè.

Udi wamba ne: “Kamwena mùshindù wà kweyemena Dîyi to.” Kùdìdingi wasàkidila aci to.

204 Udi wamba ne: “Milayi yidìmu eyi, yà dibàtiiza dyà Nyumà Mwîmpè eyi, yàkafidiibwa ànu bwà bàpostòlò dikumi ne bàbìdi nkààyaabò,” bu mùdi èkèleeziyà mikwàbò yàmba leelù ewu amu, kùdìdingi wasàkidila aci to. Mwaba awu ki ùdi cishìmikidi cyàbò, cyupùkile cyònsò. Nwamònu anyi? Bu mùvwà Uziya, makeèlèlèlè dilòlò, pàakamònayè cishìmikidi cyà muntu ewu uvwayè mweyemene, cyupùke cyònsò, mutuucike ne nsudi,

kabyàkadi bîmpè to. Mpindyewu: “Ànu bwà bàpostòlò dikumi ne bàbìdì nkààyaabo, ànu bàpostòlò dikumi ne bàbìdì.”

<sup>205</sup> Mvwa muyè kwà Mwanèètù Wright mwàmwa... Ngeela meeji ne bàdì mwaba kampànda lwà mundekeelu mwàmwa. Dilòòlò kampànda, kùvwa mwambi kampànda mupwekemù, mêmè nguvwa wakula, kùvwa bayiishi bànaayi anyì bàtaanu bakungwila. Muiishi ewu kujúuka kàdì kwamba ne: “Mpindyewu, ndi njinga kunwàmbilaku cintu kampànda nwènù bakwètù bananga. Kaa, ngeela meeji ne nudi cisàmbà cilenga be.”

<sup>206</sup> Mêmè kwamba, ngambila muntu kampànda, mêmè ne: “Ki—ki mukwàbò nyèyè udi musòmbe mwaba wàwa nàka wàwa. Tàngila bîmpè.”

<sup>207</sup> Pa nanku, Junior Jackson, lwà paanyima apu, ùcìvwa anu ufuminaku ku dyakula. Ki yèyè ne... ùvwa ùyiisha pa ngàsà wa Nzambi. Kaa, ekelekele!

<sup>208</sup> Ùvwa ùsunsuma, mwindile. Ki yèyè kukàtamuka kwàka nàka ùteeta bwà kuumvwa. “Mpindyewu, ndi njinga kwamba ne Mukalenge Branham ewu, ki mêmè udi unwambila awu, mmufwìlakanyi ne Kilistò.” Ki kubangaye mùshindù awu, dilòòlò dijimà adi.

<sup>209</sup> Bàmwè bàà ku bayiishi bàkaavwa bàbanga... Mêmè ne: “Anji indilaayi. Mpindyewu, nwènù kanwèdimù dîyì to, bàna bèètù. Yèyè nyàwù ùdì ànu yèyè nkààyèndè kàdì twètù bùngì cyanààna.” Mêmè ne: “Mulekèlaayi ànu cyanààna bwà mpindyewu. Udiye mutwè munu’s mêmè.” Mvwa muswe bamunshiile, mêmè nkààyaanyi, ne mwoyi ùzùka, mu mushindu wà mêmè mupange ne cyà dyenza. Nwamònu anyi?

<sup>210</sup> Pa nanku, ki yèyè ne: “Mukalenge Branham mmufwìlakanyi ne Kilistò,” ki yèyè kutungunuka ne dyamba ne bintu byònsò, nudi bamanyè, ùlòla’s... Yèyè ne: “Nyewu wàmbi kaaba aka ne: ‘Dibàtiiza dyà Nyumà Mwímpè.’” Yèyè ne: “Bible mmwàmbe ne kuvwa bantu ànu dikumi ne bàbìdì bààkapetà dibàtiiza dyà Nyumà Mwímpè.” Wàkula bwà dyondopa dyà kùdì Nzambi ne: “Ànu bàpostòlò dikumi ne bàbìdì abu mbàvwà ne dyondopa dyà kùdì Nzambi.” Yèyè ne: “Twètù tudi twakula mwaba ùdì Bible wàkula, ne tupùwa mwaba ùdì Bible ùpùwa.” Mêmè kwindila too ne pààkamanàye kulàka mukana mwaba awu bu munda mwà cyàbìbìdì cijimà cyà dîbà nàнку awu.

<sup>211</sup> Mêmè ne: “Anji indila ànu kakesè cyanààna. S’ndi mufùnde bintu bùngì cyanààna mwaba ewu,” mûngàakambà, “anji mpèèshèku mpùngà bwà ngàdamune ku bîmwè byà ku byòbì abi.” Nènkù ndi mwenze ànu njuuka, ki mêmè ne: “Mukalenge ewu, nyewu wàmbi mùdìye ‘wàkula mwaba ùdì Bible mwakùle,’ mùtù èkéleeziyà wèndè wènza, ‘ne ùpùwa mwaba ùdì Bible mupùwe.’ Nwènù bònsò’s nwadyumvwidi. ‘Èyowà.’” Mêmè ne: “Mpindyewu, yèyè wàmbi ne ‘Kuvwa bantu ànu dikumi ne



bàbìdì bààkapetà Nyumà Mwîmpè.’ Wanyì Bible’s nyéyè ewu mwámbe ne bavwa lukàmà ne makumi àbìdì, dyanza dyà kumpàla adi.” Amen! Imànshà dimanya dyà mùshindù awu, nwamònu’s, òwàye yéyè ùteeta naadi adi.

212 Mémè ne: “Nànkù ndi ngeela meeji ne Pòlò kààkapeta yéyè Nyumà Mwîmpè to pààkambàye ne wàkaMupeta apu.” Nwamònu anyi?

213 Mémè kwamba ne: “Kwinshì mu . . . Pàvwà Filipo mupweke ne mukayìishe Beena Sàmaaleya. Bàkaavwa babàtìijibwe mu Dìnà dyà Yesù. Cìvwàku cìvwa ànu ne, Nyumà Mwîmpè kavwa mwanji kubàpwekela to. Ki kubìikidishabò Peetèlo ne Yone, bóbò kupwekakù ne kubàtentekelabò byanza, ki Nyumà Mwîmpè kubàpwekelaYe. Ngeela meeji ne abu bavwa ànu dikumi ne bàbìdì abu amba’s?”

214 Mémè kwamba ne: “Mu Byenzedi 10.49, pàvwà Peetèlò ùsanganyibwa kuulu kwà nzùbu, ne pààkamònyè cikèèna-kumòna bóbò bìikàle bènda bàya batàngile kwà Kòneeliyò apu’. Pàcìvwà ànu Peetèlo wàkula mèyì awu, Nyumà Mwîmpè kupwekela bàvwà bàtèèleja Dìyì abu.” Mémè kwamba ne: “S’ki Bible ùcìdì wàkula ewu. Èkèleeziyà wenù mwaba awu ùdì penyì?” S’mmushààdile mu byà difwikàkaja’s. Ncyà bushùwà. Nwamònu anyi?

215 Mémè ne: “Dyondopa dyà kùdì Nzambì, wèwè wambì ne: ‘Ànu bàpostòlò dikumi ne bàbìdì nkààyaabò mbàvwà ne dyondopa dyà kùdì Nzambì.’ Bible mmwámbe ne Stefanò wàkapweka ku Sàmaalèyà ne wàkiipata badémòns ne wàkondopa babèèdì, ne kwàkadi disànka dinène mu cimenga amu. Wa bwalu kàyì nànsha umwe wa ku dikumi ne bàbìdì abu to. Kàvwà mùpostòlò to. Yéyè ùvwa mulami.” Amen. Amen.

216 Mémè ne: “Ne Pòlò mwinè kàvwà nànsha umwe wa ku dikumi ne bàbìdì bàvwà mu nzùbu wa kuulu abu to, kàdì’s nyàwù ùvwa ne dipà dyà dyondopa.”

217 Mémè ne: “Anji tàngila ànu mapà à dyondopa miinè! Kacya ànu àtùngunuka, bidimu makumi àsàtù bimane kupita, yéyè ùcìvwà ànu mu beena Kolintò, mwikàle ànu ùteeka dipà dyà dyondopa pa kaaba kààdì mu Mubidi wa Kilistò.” Kaa, ekèlekèle!

218 Mpindyewu, dimanya dyà mùshindù awu dyùdì uyiila mu mukàndà kampànda adi, s’mbipìcìibwe ne wèwè mudimànshè ku diyaala’s. Fika ku edi dimanya. Pàdì Nzambì mwámbe ne: “Yéyè ùdì umweumwe awu makèèlèlè, leelù, too ne kashidi,” amba ne: “Amen.” Eyowa’s, mukalenge. Eyowa’s, mukalenge. Kì ng’ànù kùdì dikumi ne bàbìdì abu to; mbwà bwònsò. Paùdì upeta dii—diitabuuja dyà mùshindù awu, pàdì diitabuuja dyèbè dicitwa kantu ne kantu, “amen,” pashìishe wàmba ne: “Mmwòmò,” sàkìdilààku aci ku dyòdì adi.

219 Ciinâyi. Nebikèngele bwà twètù kulwijakaja, bwalu ndi ànu. . . Bidi byùmvwika ànu bimpè be bwà kwikala kacya ànu ngìmana mwaba ewu ngààkula pa byòbì abi. Amen. [Mwanèètù wa balùme mukwàbò udi wàmba ne: “Bidi bitùsànkisha be.”—Muf.] Èyowà’s. Ciinâyi. . . Twasàkidila.

220 Usakidile “didikànda.” Kaa, ekèlekèle! Nyewu twáfiki ku didikànda. Mpindyewu, wàpeci diitabuuja, dyàmbedi; bikèngela wikalè ne dyòdi adi, kumpàlampàla. Pashiishe udi usàkidila bukolè ku diitabuuja dyèbè, piikalabù bukolè bwà mùshindù wà mujaalame. Pashiishe udi usàkidila dimanya, piikalàdi dimanya dyà mùshindù wà mujaalame. Mpindyewu neusakidile didikànda.

221 Didikànda kî mbwena kwamba ne, “kulekela kunwà maala a kapyà” to, mwaba ewu, nànsha. To, to. Didikànda kadyèna diswa kwamba ne mbwanga bwà kwondopa dinwà dyà maala a kapyà to, mu ebu bwalu to. Edi didikànda ndyà Bible, didikànda dyà Nyumà Mwímpè. Aci cidi ànu lùmwe lwà ku nkùkà yà mubidi, kàdi didikànda ditùdi twètù twamba ndyà Nyumà Mwímpè. Mbwena kwamba ne, mùshindù wà wèwè kulama ludimi, kubènga kwikala mwena kabwabwa; mùshindù wà kukòntonona cilunji cyèbè, kùyi ubìnduluka musangu wònsò udi muntu ùkucyàmakana ku mèyi to. Kaa, ekèlekèle!

222 Balùmyànà wa yààya, bààbùngì bèètù’s netudishindè kumpàla mene kwà katùyi nànsha banji kubanga, kî mmwòmò anyi? Nwamònu anyi? Patwenza apa kî twètù kubanga kudikonka ne mbwà cinyi Nzambì kèna mu Èkèleeziyà Wendè, wènza bishìma ne maalu àvwàbo bènza pa ciibidilu awu. Èyowa’s, mukalenge. Nwamònu anyi?

223 Sàkidilà bintu ebi. Sàkidilà didikànda ku cyòci aci. Kaa, didikànda, mùshindù wà kwandamuna ne kalolo pàdìbo bakwambe bwalu ne cijì cicolè. Muntu kampànda wàmba ne: “Mona musumbà wà bansantu babùnguluki bàà mu malaba aba!” Mpindyewu kùzùnzuki ne kubangi kubunya mabòkò a mutèèlu to. Nwamònu anyi? Aci to. Kàdi akùlà ne dinanga dyà muntu wa difwànà dyà Nzambì, ne didikànda, ne kalolo. Mùshindù awu kî unùdi baswè kwikala anyi? Pàdìbo bàkuyòbola, kùyi uyòbolangana pèèbè to. Enzà bwà Yèyè ikalè cyèbè cileejilu.

224 Pààkambàbo ne: “Wèwè ní udi Mwànà wa Nzambì, enzàbi bwà mabwe aa àndamukè mampà,” Yèyè’s uvwa ànu mwà kwikala mucyènzè, bwa kuleeja mùvwàYe Nzambì. Kàdi Yèyè uvwa ne didikànda. PààkaMubiikilàbo ne, “Beelezebula,” Yèyè wàkambà ne: “Nènnùfwilè luse bwà cyòci aci.” Ncyà bushùwà anyi? BààkaMutùùla manza a myevu ku cibàngà, ne kuMutwilabò mate mwisù, bàmba ne: “Tùùlukà ku nkuruse!”

225 Yèyè wakamba ne: “Taatu, ùbàfwilè luse. Kî mbamanyè nànsha ciinè cidìbo bènza aci to.”

226 Pààbì's, Yèyè ùwà ne dipà adi, Yèyè's ùwà mumanyè maalu ònsò, bwalu munda Mwèndè mùvwà kaabujimà kàà Bunzambì mu mubidi. Bòbò's bàkaavwa baMumòne wènza bishimà, pa kwambila bantu bubì bùvwàbo naabù, ne bikwàbò byà mùshindù awu. Bòbò kuMujingila mukusu ku mutù nènku ewu, bàMuswika kwìsù, bàMutuuta dikombo mu mutù, bàmba ne: "Ambà cipròfetà tǔng, utwǎmbilè ne nganyì udi muKutuute. NetùKwitàbuuje." Nwamònu anyì? Yèyè ùwà ne didikànda.

227 Mpindyewu, wèwè naadi mùshindù awu, ùdisàkìdìlè ku diitabuuja dyèbè. Paùcìdì ànu utonoka ne wandamuna kùyi ne kaneemu to, ne ukòkàngana, ne ùbìnduluka, ne kutùngunuka ne kwenza maalu a lukutukutu, huh-uh, wèwè kwènàku ne. . . Kwèna mwa kusàkidila aci to, bwalu kacyàkusàkidiibwa to. Nwamònu anyì? Kacyàkubwelakananganaku to. Kwèna mwà kwangata kapese kàà ndundu, udi mumanyè's, bwà kukàlamika ku katùpà kàà cyamu to. Kabyàkukùmbanakù to. To, bikèngela kùkalè kanefùke, ànu mùtù ndundu amu. Nwamònu anyì? Nènku pàdì diitabuuja dyèbè ne didikànda dyèbè bishààla mùshindù wà mwomùmwe wà didikànda dyà Nyumà Mwimpè òvwàYe Yèyè naadi adi, dībà adi kaayi nebibwelakanangane Nèndè. Udi musàkidiibwe ku cyòcì aci.

Pàdì bukolè bwèbè bwikàle bu Bwèndè bukolè, dībà adi nebusakidiibwe ku cyòcì aci.

228 Pàdì dimanya dyèbè diikàle bu Dyèndè dimanya: "Ndi ndwa bwà kwenza diswa Dyèbè, Éyi Nzambi." Nwamònu anyì? Ne Dìyi dyà Taatù, Yèyè wàkacimuna démon ne démon yònsò. Maulu ne buloba nebijiminè, kàdi Dìyi kadyàkujìminakù to. Nwamònu anyì? Paùdì ne dimanya dyà mùshindù awu, nedìbwelakananganè ne diitabuuja dyèbè.

229 Paùdì ne mùshindù mujaalàme wà didikànda, mùvwàYe naadi amu, nedìbwelakananganè. Wèwè kuyi naadi to, mwikàle ne diitabuuja ànu dyà citùpà dikwàtakaja kùdì bantu, disaapùlùke, anyì didikànda dyà ne: "Kaa, s'bivwa bikèngela bwà mèmè kumubàngula's, kàdi—kàdi pàmwàpa bikèngela ndekele, bwalu mbafwànyine kumfùnda dìnà mu cibèjibeji bwà ciinè aci." Awu kí mmùshindù wà didikànda didìYe wàmba to. Wèwè kuudìdingikù wasàkidila adi to. Kadyàkukùmbanakù to. Kàdi mu bulelèlè, ne bupòlè bùdì bùfùmìna mu mwoyi wèbè, wèwè mwà kufwila muntu yònsò lusè, kushààla mupùwe, kulekela pèebè nànkù awu, wamònu's, pa dībà adi nedìbwelakanangane. Udi mwà kusàkidila aci ku diitabuuja dyèbè. Yoyòyò!

230 Kabyèna bikèmesha to pàdì èkèeziyà mwikàle ne mupùyà mwìpi. Kí mmwòmò anyì? Kabyèna bikèmesha to. Ndi mufwànyine kwamba ne: "Nyingàlàlaayi nùbàtìijiibwe, mùdì Bible mwàmbe, mu Dìnà dyà Yesù Kilistò." Kàdi Trinitaire muumishi wa maalu udi kàyì wìtabuuja aci to, neàmbe ne:

“Mufwilakanyi ne Kilistò wa kale wàwa. S’mmwena Dìna dyà Yesù. Mmwena ne ànu Yesù Nkàâyendè.” Dimukà, mulùmyànà, ncyèna mumanyè mùdi didikànda dyèbè mpindyewu ewu to. Wamònu anyi? Bwà cinyi kùyikù ulwa, wamba ne: “Twänji kuyiikilabi pàmwè pa bwalu ebu, Mwanèètù Branham. Ndi muswè kuumvwa dyumvwija dyà Cyôci eci?” Wamònu anyi? Pa nàнку pwekèlè kùneeku ùCitéèlèjè. Nènku dîbà adi nCitéèkiibwe ànu kumpàla kwèbè mene, kàdi wèwè wasa lwendu uya; netu—netufike ku cyôci aci mu tusuna tukese emu, ku “difwànà dyà Nzambì,” wamònu’s. Kàdi paùdi—paùdi ubìnduluka, ukèba bwà kutùpika ne byakùlàakula byà webè mmwènenù, huh-uh, aci—aci kî ncyôci to. Wamònu anyi? Kwèna mwanji kwikala ne didikànda dyà Bible paùdi wenza nàнку awu apu to; mùshindù wà kwandamuna mukwèbè. Nènku wèwè ne byònsò ebi, udi mwà kusàkidila cyôci eci ku diitabuuja dyèbè.

<sup>231</sup> Pashìishe, paanyimà pàa aci, ciinâyì, udi ujinga kusàkidila lutùùlù ku diitabuuja dyèbè. Pauùdi ne diitabuuja, “didi dilela lutùùlù,” mùdi Bible mwámbe. Wamònu anyi? Pa nàнку, eci ndutùùlù. Mpindyewu, ki cintu cidì cilondà ciikalà mwà kwibaka cipidi eci. Nudi bamanyè’s, Nzambì ùdi ne byà diibaka naabi byà bushùwà mu Nzùbu Wèndè.

<sup>232</sup> Nwamònu mùshindù utùdi ne mupùyà mwípi anyi, wèwè mwanèètù wa balùme, wèwè mwanèètù wa bakàji? Nwamònu anyi? Nudi numòna ne mbwà cinyi, mwaba utùdi anyi? Èyowa’s, mukalenge. Nwamònu anyi? Tudi ne butùmbi, tudi ne mbila ne bikwàbò bintu, mbwalu tudi ne diitabuuja. Kàdi patùdi tupweka ku ebi bintu *ebi*, Nzambì kèna mwà kutwibaka mu cipidi aci to. Nwamònu anyi? To. Kèna mwà kutùfikisha too ne kuulu mu mwaba wa mùshindù awu to. Tudi ne bintu bikwàbò byònsò ebi. Tudi tudishinda, tusenunuka naabi. Nwamònu anyi? Kèna mwa kwibaka Èkèleeziyà Wèndè to.

<sup>233</sup> Lutùùlù ku cinyi? Lutùùlù lwà mùshindù kaayi? Cintu cyà kumpàla, nkwikala ne lutùùlù kùdi Nzambì. Wèwè ne diitabuuja dilelèlè, dishùwashùwàlè, newikalè ne lutùùlù lulèlèlè ne lushùwashùwàlè, bwalu diitabuuja ndidi dilela lutùùlù. Pàdi Nzambì wàmba cintu kanà cyònsò, udi wèwè ucìitabuuja. Kwàjiki. Udi ne lutùùlù.

<sup>234</sup> Udi wamba ne: “Ee, ngàaMulòmbu bwà kungondopa makeelèlè awu dilòdòlò, kàdi nyewu nci di nsaama mu dindà emu ànu mwànyì ne kale.” Kaa, ekekèkè! Lutùùlù kaayi?

<sup>235</sup> Nzambì wàkambila Abraham, kàdi paanyimà pàa bidimu makumi àbìdi ne bìtaanu kakùvwakù nànsha kaacimanyinu to. Yèyè ùvwa ànu kacya wìtabuuja. Ùvwa ne lutùùlù kùdi Nzambì. Uh-huh.

<sup>236</sup> ÙMutèèkè Yèyè kumpàla kwèbè misangu yònsò. Yèyè ikalè cintu cidì cikucyàmananà kumpàla kùyaaya. Kwèna mwa kuMusambuka to, pa nàнку ùMutèèkè ànu kumpàla

kwèbè. “Yèyè ngudi mwambe nàнку awu, nènku necyènzekè.” Nwamònu anyi? ÙMulame kumpàla kwèbè. Ncyà bushùwà.

<sup>237</sup> Noa ùvwa ne lutùùlù. Èyowa. Noa ùvwa ne lutùùlù lulelèlè, lwà muntu wa difwàná dyà Nzambi. Nzambi wàkamba ne: “Nèmbutulè buloba ebu ku mvula,” nènku Noa kwanjiye kuyiisha munda mwa bidimu lukàmà ne makumi àbìdì, kumpàla. Lutùùlù lwà luyiila ne panshì. Kakùvwakù nànsha kaalumuma kanji kumata mu Dyulu to. Kakùvwa cintu nànsha cìmwè to. Ànu lupwishi kacya lwàmònangana, munda mwà bidimu lukàmà ne makumi àbìdì, kàdi yèyè ànu ne lutùùlù.

Nènku, Nzambi ùdi ùteeta lutùùlù lwèbè. Ncyà bushùwà. Nzambi ùtu ùbàteeta.

<sup>238</sup> Paanyimà pàà Yèyè mumanè kwambila Noa, ki mpindyewu Yèyè kwamba ne: “Noa, ndi muswè bwà wèwè kuya kumpàla ne kubwela mu bwàtù. Mèmè nènsakè nyama yilwe kubwelamu, Ndi—Ndi muswè wèwè ùbwelèmu. Bándilà mu cibambalu cyà kuulu, mpindyewu, bwà wamòna mwà kwikala utàngila pambèlu, ku dìdidiishi dyà kuulu. Mpindyewu, ndi muswè wèwè ùbwelèmu. Ndi muswe wèwè wàmibile bantu aba ne: ‘Maalaba, cìntù muyiishe munda mwà bidimu lukàmà ne makumi àbìdì aci necyùlè.’ Èyo, pwekèlè lwà mwinshì mwàmwa ùbàmbilè.”

<sup>239</sup> Cìmanyinu cyà kumpàla cyàkadi cinyi? Noà wàkabwela mu bwàtù. Kakùvwa mvùla to. Noa wàkadìlongolola, wàkavwàla nkooci wa mvùla, ne bikwàbò, bwà wàmòna mwà kutapa dìsù pambèlu, ku musangu ne ku musangu. Kudìlongololayè. Kàdi ditùkù dyàkalondà adi. . .

<sup>240</sup> Ndi ngìtabuuja ne ùvwa mwà kwikala mwambile famiye wendè, ne bakàji bàà bàná bèndè ne bwònsò abu, ne: “Kaa, ekèlekèle! Mààlabà nenùmonè cintu cinùtù kanùyikù banji kumòna kacya to. Bwalu, mu maulu mwònsò, nemwikale mufiike fitutu. Nekwikalè mikungulu ne mikenyi yèèla. Mwelè munène wà mvità wà Nzambi newùpenyè eku ne eku kwà dyulu. Neàpiishè musùmbà wa bangènzàmpèkààtù bàdi batùbènge, munda mwà bidimu lukàmà ne makumi àbìdì ebi aba. Nwènù tàngilàayi ànu cyanààna nùmonè.” Nwamònu anyi?

<sup>241</sup> Bàmwè bàà ku beena kwitabuuja bàà nkàcìnkacì, nudi bamanyè’s, biikàle bajinganangana ànu kumpenga aku kàdi kabàyi mwà kubwelaku to, nudi bamanyè’s. Bà—bàcìdi ànukù, nudi bamanyè’s. Pa nàнку bòbò—bòbò kuvwila lwà pabwípì apu, bàmba ne: “Ee, mukùlakàji ewu mmufwànyìne kwikala mubìnge’s, pa nàнку netùye kuntwaku tukindileku ndambù wa matùkù, anyi kwindila ndambù wa mèbà mu dìndà bwà kumòna’s.”

<sup>242</sup> Ditùkù dyàkalondà, pamutù pàà divuba difiike, ki dìbà kupàtuka diikàle dibànda ànu mùvwàdi dibànda kwònsò aku amu. Noa kutàpa dìsù pambèlu. Yèyè kwamba ne: “He, kakwèna divuba nànsha dìmwè to.”

243 Mulùmýànà mukwàbò kàdi kuseemena, kwambayè ne: “Aa, mêmè’s mvwa mumanyè ne wèwè ewu udi umwe wàbò. Udi umòna’s, s’nyàwù ukààdi ujingakanangana ànu mwaba ewu.”

244 “Ee, wàmfwakù luse’s, mukalenge. Ha-ha. Pàmwàpa mvwa—mvwa—mvwa ànu, udi mumanyè’s, ànu musalùke cyanàànà, udi mumanyè’s. Mu mùshindù kampànda, udi umòna’s. Ha-ha-ha.”

245 Kadi, Noa, ùvwa yèyè ne lutùùlù. Kwambayè ne: “Pìikalà bwalu ebu kabùyi bwenzèke leelù to, nebwènzekè maalaba.” Bwà cinyi? Nzambì nguwva mwambe nànkù.

“Yèyè mmukwambile aci dībà kaayi’s, wèwè Noa?”

246 “Kùkaadi bidimu lukàmà ne makumi àbìdì. Nyèwù nkàadi mufike too ne pànkaadi apa, nànkù ndi ànu ngìndila apa bwà mpindyewu.” Nwamònu aci anyi? Paanyimà pàà mutanci. . .

247 Tudi tusangana ne, Nzambì mmufike too ne patùkaadi apa, mwindile Èkèleeziyà, yèyè pèndè, kàdi Yèyè neikalèku. Kanùtácishi meeji to. Yèyè ngudi muMulayè.

248 Twindidì cikondo cyònsò eci bwà dibìikà dyà ku lufù. Nedìikalèku. Kutácishi meeji to. Nzambì ngudi mudìlayè. Indila ne lutùùlù. Pawàpona mu tulu, aci kacya-. . . Udi mufwànyine kubàkulakù kalù kakesè kumpàla kwà dyòdì kwenzeka, kàdi neùbiikè pa diinè dībà adi. Yèyè ngudi mudìlayè, wamònu’s. Kalù, wamònu’s, citùdì tubiikila ne nkalù kàà lufù aci, udi mumanyè’s. Citùdì twètù tubiikila ne ndufù aci, nkalù kakesè cyanàànà, anyi kulaàalà tulù mu Kilistò. Cintu ne nkufwà mu Kilistò kacitukù to. Mwoyi ne lufù kabyèna mwà kwikalakù byònsò pàmwè to. Nwamònu anyi? Citùdì tubàkula nkalù cyanàànà, kalù kàdi balunda bèètù kabàyi mwà kutùbiikila pèètù kumba kubiika to. Ànu Yèyè ki umwèpelè udi mwà kubiikila. “Yèyè neàbiikilè, ne mèmè nèmMwitàbè,” mwàkambà Yobò. Yobò mmulàale tulù mpindyewu kùkaadi bidimu binunu binaayi. Kutácishi meeji to. Yèyè ne—neàbiikè. Kanùtácishikù meeji to. Yèyè ùcidi ànu mwindile.

249 Noa kwindìlayè. Ditùkù diinàyi kupitàdì. Mvula ùdi aku anyi ùdi kunu. Bìdi ànu bîmpè. Bwalu nebwènzekè.

250 Ndi mwà kuumvwa Mandamu Noà useemena pabwîpì apu wàmba ne: “Papa, udi mutwìshìib-. . .?”

“Kwakulu mùshindù awu nànsha.”

251 Yèyè ùvwa ne lutùùlù, bwalu ùvwa ne diitabuujà. Èyowa’s, mukalenge. Ùvwa ne bukolè. Ùvwa ne dimanya dyà ne Nzambì ùvwa mubinge. Ùvwa ne didikànda. Yèyè kàvwa mubìndùlùkè, wàmba ne: “Ee, ncyèna mumanyè biinè byònsò abi ne bìdi bishi to. Ngàjimiji luumu lwànyì lwònsò pambèlu pààpa.” To, to. “Bantu kabàcyèna bàncyùka kàbìdì to. Mèmè’s nèmpatukè pambèlu pààpa mbangululè byònsò, ngènzè bipyabìpyà.” To, to. Yèyè uvwa ne lutùùlù. Nzambì ngudi mulaye. Nzambì neàcyènzè. Nzambì neàcyènzè, bwalu Nzambì ngudi mwàmbe nànkù.

252 Nènku ndi mwà kumòna mwanèndè wa balùme ùseemena kùdiye aku, wàmba ne: “Papa, udi mumanye. . .” Ùmutuuta cyanza pa mvyà yèndè mile ayi, nudi bamanyè’s. Wa bwalu ùkaavwa ne bidimu nkàmà, nudi bamanyè’s, musòmbe mwaba awu. Yèyè kwamba ne: “Ndi mumanyè ne wèwè ewu udi nkambwa mununu. Ndi—ndi mukunange, papa. Kàdi mbifwànyìnekù kwenzeka ne wikalè mutùpàkàne ndambù anyì?”

“Kaa, to. To.”

“Bwà cinyì?”

“Nzambi’s ngudi mwàmbe nàнку awu!”

253 “Ee, papa, s’ki matùkù àsambòmbò aa atùdi kacya ànu twasòmbe kuulu eku aa. Basòmbe kuulu eku muneemu mu ciibwàtù buneneci, cyà kale, cyùme ncyoncyoncyo cidi cisòmbe ànu mwab’ewu eci. Cyà bwalu cilaaba kamonya, munda ne pambèlu. Ne twètù tudi benze bidimu byònsò ebi ànu munkaci mwà dibwibaka. Wèwè pèèbè mwimàne ànu pambèlu pààpa uyiisha, too ne muwàvu kutoloka mvyà ne kutùuka dibàla. Kàdi ki wèwè ewu mpindyewu lwà kuulu eku, ùditacisha bwà kwamba cintu *kampànda*. Ne bantu pààbò’s ki kusekabò eku, baasa tùmata tubole ne bikwàbò bintu ku luseke lwà bwàtù. Tangila kwàka ùmonè cyùdi wenza. Mòna’s, udi mumanyè. . .”

“Ikàlàku ne lutùlù’s, mwanàanyi.”

“Wèwè udi mutwishìbwe anyì?”

“Mvula’s neàlokè!”

Ki mukaj’a mwanèndè ne: “Tààtù, udi mumanyè. . .”

“Mvula’s neàlokè!”

254 “Kàdi’s nyewu bidimu byònsò ebi nkacya ànu twindila. Tudi ànu tulongolola. Pèèbè wèwè ewu’s udi mutwàmbile ne mvula neàlokè, kùkaadi lumingu lujimà. Kàdi nyewu tukàadi munda emu, ne biibi byònsò bikànga, ki twètù aba tukàadi twàtwa eku twàtwa eku muneemu munda emu, muunya paawu ki kukènùkawù eku ànu bu pa kànà kakùlù.”

“Kàdi mvula’s neàlokè!”

“Wàmanyi bishi?”

“Nzambi’s ngudi mwàmbe nàнку!”

255 Mpindyewu paùdi ufika mu mùshindù awu, sàkidila aci. Kàdi wèwè kùyi mupete cyà mùshindù awu to, kùdìdingi—kùdìdingi wacisàkidila to. Kabyàkukùmbanakù to. Kabyàkukùmbanakù pa bìdi bìtàngila dyondopa nànsha. Kabyàkukùmbana pa bìdi bìtàngila cintu cikwàbò nànsha cìmwè to. Nwamònu anyì? Bìkèngela cisambakanangane ne cyamù cìmwècìmwè cidìci cibwelakanangane naaci aci. Ncyà bushàwù. Bìkèngela ucisàkidile. Lutuulu ku mulayi wa Nzambi.

Èyowa's, mukalenge. Noa yèyè wàkaciitabuuja. Kàbìdì ùvwa ne lutùùlù kùdì Nzambì, bidimu lukàmà ne makumi àbìdì.

<sup>256</sup> Mòsà, ùvwa ne lutùùlù kùdì Nzambì. Èyowa's, mukalenge. "Mòsà, ngùmvrè lubilà lwà cisàmbà Cyànyì. Ngàmònu lutàtù lwàbò. Ndi mpweka bwà kubàsungila. Wèwè ki ùngààtumà bwà kupwekamù."

<sup>257</sup> Ne dipangakana dikesè mwaba awu pankaci peèndè ne Nzambì, ki Nzambì kumuleeja butùmbi Bwèndè. Yèyè ne: "Ki mèmè uyààya ewu." Mmwenze ànu ùmòna butùmbi bwà Nzambì musangu ùmwè, nudi numòna's, pèndè ùmba ùpeta ne diitabuuja.

KwambaYè ne: "Cidì mu cyanza cyèbè aci ncinyì, Mòsà?"

Yèyè ne: "Dikombo."

Yèyè ne: "Dyèlà panshi."

Kwandamukadi nyòka. Yèyè ne: "Kaa, ekèlekèle!"  
Kubangaye. . .

<sup>258</sup> Yèyè ne: "Mwambulaaku, Mòsà. Pìikalàbi ne Mèmè ndi mukùmbàne kudyàndàmuna nyòka, Ndi mukùmbàne kumwandamuna cyàkàbìdì dikombo."

<sup>259</sup> Aa! Amen! Pìikalà Nzambì mukùmbàne kumpà mwoyi wà pànwapa ewu, Yèyè's mmukùmbàne kumpà Mwoyi wà nyumà! Pìikalàbi ne Nzambì ùvwa mukùmbàne kumpà dilediibwa dyà kumpàla, Yèyè's mmukùmbàne kumpà Dilediibwa dy cyàkàbìdì! Amen! Pìikalà Nzambì mukùmbàne kwondopa *eci*, ku dyondopa dyà kùdì Nzambì, Yèyè's mmukùmbàne kucibiisha kàbìdì ku lufù bwà butùmbi Bwèndè, ku ditùkù dyà ndekeelu. Aci's ncyà bushùwà.

<sup>260</sup> "Mèmè ndi mwà kwela dikombo edi panshi ne kudyàndàmuna nyòka. Ndi mwà kumwaluja kwandamukayè cyàkàbìdì dikombo. Mukwàcile ku mukìla aku."

<sup>261</sup> Mòsà kwololaye cyanza e kumukwata. Ndyòdì adi's, dikombo. Kubangaye kusakidila dimanya anu piinaapu. Nwamonu anyi?

"Ku cyanza cyèbè aku kùdì disaamà kaayi, mpindyewu, Mòsà?"

"Nkutupù."

"Cyèlààku mu dyâpà dyèbè amu."

<sup>262</sup> "Èyo. Kàdi bwalu bùdì bishi. . ." Citòòke tòò ne nsudi. "Éyi Mukalenge, tàngilààku ùmonè cyanza cyànyì!"

"Cìpingàjàku mu dyâpà dyèbè, Mòsà."

<sup>263</sup> Ûcìpingaja ànu mu dyâpà *nunku* anyi, cyòcì kwandamuka ànu bu. . .Ki kubangayè ànu kubìsàkidila *nunku*, dîbà adi, nwamònu's. Èyowa's, mukalenge.



264 Ki kupwekaye muntwamu. Nènku dipangakana dyà kumpàla...Kupwekayè muntwamu. Ùpàtuka kwàka wàmba ne: “Mukalenge Nzambì wàmbi ne: ‘Lekèlè cisàmbà Cyànyì cìye.’ Pàlò, ndi muswè ùmanyè bwalu ebu. Mèmè ngudi mulwè bu mwènàmpalà wà Nzambì. Wèwè udi ne cyà kuntùmikila.”

265 Ki Pàlò kwambayè ne: “Kutùmikila? Utu mumanyè ne mèmè ndi nganyì? Mèmè’s ki Pàlò. Nkutùmikila kaawèwè aka, kapika?”

266 Yèyè ne: “Anyi udi untùmikila, anyi ufwàfwa. Newènzè ciwàsàwà aci.” Bwà cinyì? Yèyè ùvwa mumanyè ciwàye wàmba. Ùvwa ne mudimu mumutùma nààwù. Ùkaavwa mupwekèmu. Ùvwa mwakùle ne Nzambì. Ùvwa ne diitabuujà. Ùvwa mumanyè pàvwàye.

“Kaawèwè aka uswa bwà mèmè nkukàtùmikilè? Mpàtùkilè mwab’ewu!”

“Kàdi imana nkuleeje.”

“Ndeejaaku cimanyinu.”

Kwelaye dikombo panshi; kwandamukadi nyòka.

267 “Mòna’s,” ki yèyè awu, “aku’s nkaadiyelè kakesè kàà beena màjìmbu! Vwilààyi bì apa kakesè. Vwilààyi bì apa, Yane, wèwè ne Yambèlè, elàayi makombo ènù awu panshi.” Kuèlabò panshi, ki wòwò kwandamuka nyòka.

268 Yèyè ne: “Mpindyewu, kaawèwè kantu cyanààna aka, ukàpweka pèèbè apa mutàngile kùndi, mèmè mwena Èjiipitù, pàlò mujimà wa Èjiipitù. Ukàlwa pèèbè apa ne kaadiyelè kèèbè kakesè kàà beena màjìmbu aku, kaadiyelè kèèbè aku,” nudi bamanyè’s, kubala kwà mu meeji. Nudi bamanyè cìndi muswè kwamba aci. Ndi ntèkemena ne ncyòci aci cinùdi nubala. “Lubùkù anyi cintu kampànda, nudi numòna’s, èyo, ukàpweka pèèbè apa ne byà nàнку awu’s.” Yèyè ne: “Ee, twètù’s tudi mwà kwenza cintu cìmwècìmwè cyùdi kaawèwè aka wenza aci.”

269 Mòsà ùvwa cinyì? Yèyè kàakamba ne: “Kaa, Mukalenge Pàlò, mfwileku—mfwileku luse, mukalenge. Nènshaalè mupika wèbè” to. To, mukalenge.

270 Wakiimana kamùngùlù. Amen. Wàkashààla ànu mwaba awu. Nzambì ngwàkamba, kàvwakù ne mpatà mu mwoyi wèndè to: “Ikàlè ne ditalala. Mèmè’s nènkuleeje cintu.” Pàudi mwenze ànu menemene cidiYe mwàmbe bwà kwenza, kàdi bimwèka ànu bu ne mbinyangùke; imàna kamùngùlù, angàtà lutùulù.

271 Mòsà kwambaye ne: “Udi mumanyè’s, pàndi mwibàkile pa cishimikidi aci, kùvwa lutùulù lutèekapù, nènku nèngìndilè ànu kwindila bwà kumòna cyènza Nzambì aci.”

272 Ki nyòka mikùlàkàji nyòyì ayi, yìdikokela eku ne eku, yìpwidila, yèlàngana tushibà. Katanci aka, nyòka wa Mòsà

kubanga: “Bikù, bikù, bikù,” ki kuyìbikula yònsò kuyipwekesha ne mu difù. Yèyè ùvwa ne lutùùlù.

Bàdì bìndilà Mukalenge, nebàvwijululè  
dikàndà dyàbò dipyadipyà,  
Nebàbandè ne mapwàpwa bu mukankù.

Aci ncyà bushùwà anyi? Nwamònu anyi? Èyowà.

Nebànyeeme kabàyi bàcyòka, bènda lwà  
makàsà kabàyi bàpùngila.

Nwamònu’s, wèwè indilà ànu Mukalenge. Angàtà lutùùlù.  
Nwamònu anyi? Èyowà’s, mukalenge.

<sup>273</sup> Pashìshe Izalèlèlè ùvwa ne cyà kupàtùdiibwa. Ki mìshindù minène yà dipangakana kulwayi, ki Mòsà kwindilayè.

<sup>274</sup> Pashìshe kubwelayè mu cipèèlè. Kùdi ntàntà ànu wa lwendu lwà matùkù àsàtù anyi ànaayi cyaààà. Kùdi ntàntà ànu wa kilomeetà makumi àsambòmbò ne yinaayi kuumukila mwaba ùvwayè mukòsòlwèlè awu, bitàngilàngàne menemene ànu ne mwaba wàkalwàbo kukòsòlwela cyàkàbìdì awu. Kàdi, Mòsà, mu cipèèlè amu, kwindilayè bidimu makumi ànaayi. Lutùùlù’s. Amen. Ncyà bushùwà. Kwindilayè bidimu makumi ànaayi. Kaa! Èyowà’s, mukalenge.

<sup>275</sup> Nènku bìvwa bìkèngela twètù pèètù kwikala ne lutùùlù muntu kùdi mukwèndè, twètù biinè. Nwamònu anyi? Mùngà musangu. . . Tutu tulwa—tutu tulwa bapange lutùùlù bikolè be kùdi bakwètù. Tutu twela meeji ne bìdì bìkèngela twètù kwikala bu Mòsà. Mòsà ùvwa ne lutùùlù kùdi cisàmbà. Mònaayi, s’ki cìvwà cibàpàngìshe bwà bòbò kuya dyàmwàmwa. Nwamònu anyi? Paùdì uteeta bwà kwenza cintu kampànda . . .

<sup>276</sup> Cileejilu, nkààdikù muteete bwà kufikisha tabernacle ku dyumvwa Mukenji ewu, bwà kumòna ne cidimba cyònsò cyà tabernacle cishaalè *Cyòci eci*. S’mbikolè bwà kucyènza. Ndi muditàcìshe bwà kwangata lutùùlù; mbidimu makumi àsàtù ne bisàtù ebi. Nwamònu anyi? Kwangata lutùùlù. Bakàji bacìdì ànu bàbebula nsukì yàbò, bìcìdì ànu byà mwomùmwè. Kàdi kwangata ànu lutùùlù. Nwamònu anyi? Kwangata ànu lutùùlù. Kwindila. Bìkèngela ànu nàнку. Wèwè kùyì naalù to, kùdìdingi wìbakila pa eci cìdì kwìnshì *eku* eci to. Ikàlà ne lutùùlù.

<sup>277</sup> Nànsha musangu mukwàbò, pààkajuukà musùmbà awu wà bantòmbòji bààkapangà lutùùlù abu, mu mùshindù wà ne bààkafikisha Mòsà ku dyenza cintu kampànda cyà cibì. Kàdi, nànsha nàнку awu, pààkafikàbì ku ditèètàngana dyà makàndà, cyenzedì cyàbò aci cyàkendesha Nzambì ku mwoyi. KwambaYè ne: “Tàpulukà naabò, Mòsà. Nèmbàshipè musùmbà wàbò mujimà awu, bwà kubangulula.”

<sup>278</sup> Yèyè kudyèla pankacì, kwamba ne: “Nzambì, kwenji nàнку to.” Ncinyì aci? Lutùùlù kùdi bantu bàvwa bàmutombokelà abu.

279 Ndi ndikonka ne twètù aba tudikù bafwànyine kwenza nàнку anyi? Pawikalà kùyi mwà kucyènza to, kùdidingi wìbakila pa *eci* to, bwalu kacyèna—kacyèna cishintuluka to, udi mumanyè nàнку. Mùshindù awu ngùvwà cyà kumpàla cibwelakanangane mu *eci*, ne ki mùshindù ùdì cimwè ne cimwè cyà ku byòbì abi ne cyà kubwelakanangana. Cyanààna, kwàkufika ku cipidì cyà cisòmbedi cyà Nzambi udi ne mwoyi aci to, paùdì kùyi ne lutùùlù, lutùùlù, muntu ne mukwèndè. Éyo.

280 Bânà bàà beena Ebèlù bàvwa ne lutùùlù. Cyà bushùwà, bàvwa naalù. Nzambi ùvwa mubàlayè, mubămbile ne: “Kanwinaminyikù lupingu nànsha lùmwè to.” Kàdi bôbò bàvwa ne lutùùlù. Bàakamba ne: “Nzambi wetù twètù ùdi ne bukolè. Kàdi, nànsha nàнку, katwàkwinaminakù lupingu lwèbè alu to.” Lutùùlù, mumanyè *eci* ne, Nzambi neàmubiishe ku lufù mu matùkù à ndekeelu.

281 Mwoyi ewu kawèna ne bwà nsongo bwinè to, twamb’eku twamb’eku. Nwamònu anyi? Nzambi neàwùbiiishè ku lufù mu matùkù à ndekeelu. Kàdi pàkaadibi ne nkwinamina kwà lupingu kampànda, twètù katwàkucyènzakù to. Mpindyewu, netùpe Kaayisa cyà Kaayisa, kàdi, pàkaadi Kaayisa ùkabwelakana ne Nzambi, Nzambi ki udi kumpàla.

282 “Nzambi mmwâambe ne: ‘Kanwinaminyi lupingu alu to.’ Ne mèmè ncyàkucyènza to. Nzambi wetù twètù mmukumbàne kutùsüngila. Yèyè kayi mutùsüngile to, ncyàkwinaminakù lupingu alu nànsha.”

Yèyè ne: “Mbîmpè’s, cikùtù cyà kapyà’s ncyòci cyàcya.”

283 “Èè,” mwàkambàye, “kaa, ngeela meeji ne, mvùla mukolè neàlokè bufùku ebu àkàjì mè kònsò.” Kàdi kàyì ànu mulòke to. Ànu lutùùlù lumònàngàne.

284 Bucya mu dindà, pààkabàpàtulàbo ne kubàfikisha kumpàla kwà tubàdi, ki Nebukandaneesa udi musòmbè mwaba awu awu. Kwambayè ne: “Mbîmpè’s, nwènù balùmyànà, nukàadi badìlòngòlòle bwà kùmvùluka ne mèmè ki mfùmù wenù anyi?”

“Ncyà bushùwà. Wèwè kola ànu booboobo bu muswàswà bu nyindu bu cyamu cyà mu ditanda’s, Éyì mfùmù wà yààya.”

“Mpindyewu inàmìnaayaaku lupingu lwànyì.”

“Kaa, to.”

285 “Èè, nwènù’s nenwòshikè nùlungulè. Nudi bantu bàà lungènyi. Nudi ne meeji matwè. Nutu batùkwàcishe bikolè. Nutu dibènesha bwà bukalenge bwètù. Kanwènàayikù mwà kuumvwa ne ncyèna muswè bwà kwenza cyòci *eci* anyi? Kàdi nyèwù ndi mwelèshe díyì dya patòòke mwab’ewu, ne bìdì bikèngela dyènjiibwe. Ncyèna muswè kunwèla muntwamu to. Kaa, balùme wè, mbwalu kaayi bwinè ebu’s bunùdì naabù?”

286 “Ndi mumanyè ne abi bìdi byùmvwika bîmpè be ku maci. Kàdi, Nzambi wetù twètù mmukùmbàne kutùsùngila. Kàdi nànsha byòbì nànkù. . .” Bàvwa ne lutùùlù.

287 Ki kubangabò bènda bàbànda ne cibùmbà. Kubangabò batàngilangana. “Bìdi ànu bîmpè. Mbîmpè.” Biikale ne lutùùlù. Beela cidya cìmwè, Nzambi ùdi aku anyi ùdi kùnu. Bìdya bìbìdi, Kàyikù to. Bìdya bìsàtù, bìdya bìnaayi, bìdya bìtaanu, batùngùnùke ànu bènda bàya, Yèyè kàyì ànukù to. Ki kwelayè cidya kubwela ne mu cikùtù cyà kapyà. Bàvwa ne lutùùlù. Kàdi Yèyè ùvwa mwômò amu. Nwamònu anyi? Ànu ndambù mukùmbàne wa kapyà kubàlengakù, bwà kwosha ànu myonji cyanààna yìvwa mìbàsawike ku byanza ne ku makàsà ayi. Kàdi mmwenze ànu ùdyata makàsà panshi pàà cikùtù cyà kapyà nùnkù ewu anyi, ki Yèyè ewu. Nwamònu anyi? Bàvwa ne lutùùlù.

288 Danyèlè byà mwomùmwè. Danyèlè ùvwa ne lutùùlù. Cyà bushùwà. Kàvwa mwà kulekelakù to. To, mukalenge. Wàkenza cinyi? Wàkunuzulula madìdiishi awu ne wàkasambila, nànsha mùvwàbì amu. Cìvwa mmushìngà wà Nzambi. Yèyè ùvwa ne lutùùlù. Wàkindila Nzambi, mumanyè ne Nzambi ùvwa mukùmbàne mwà kushààla mulamàte ku Dìyì Dyèndè. Kumwelabò mu bwinà bwà ntambwe, bàmba ne: “Netulekele ntambwe yìkudyè.”

289 Yèyè ne: “Bìdi ànu bîmpè.” Ùvwa ne lutùùlù. Bwà cinyi? “Èè, nyèwù nkààdi mwindile ntàntà mwinè yònsò awu, mwindile Nzambi. Byòbì bikèngela bwà mèmè kwindila kàbìdi ndambù mukwàbò wa binunu byà bidimu, nèmbiikè ku lufù mu ditùkù dyà ndekeelu. Pa nànkù, ngàngate ànu lutùùlù, ngìndilè.”

290 Pòlò ùvwa ne lutùùlù. Ùvwa naalù cyà bushùwà. Tàngilàayi numòne cìvwa cikèngela bwà Pòlò kwenzayè. Nwènu bàdi bàmba bwà lutùùlù's wè!

291 Netwàmbè cinyi bwà beena mpenta abu? Bu mùvwàbò ànu bapete mudimu mubàtùma naawù ne: “Nwìndilè too ne,” nwamònu's, “nwìndilè too ne panwàvwàdikiibwà ne Bukolè.” Too ne dìbà kaayi? Bòbò kabààkeelakù alu lukonko to lwà ne: “Nebìikalè too ne dìbà kaayi?” Bààkapeta bòbò ànu dyandamuna ne: “Nwìndilè too ne.”

292 Bòbò kubànda kuulu aku bàmba ne: “Èyo, balùmjànà, pàmwàpa mu tusunsa dikumi ne tùtaanu kubangila ku mpindyewu Nyumà Mwîmpè neàtùpwekèle ne netùpetè mudimu wètù wà bwambi.” Tusunsa dikumi ne tùtaanu kupìtatù, ùdi aku anyi ùdi kùnù. Ditùkù òmwè kupìtatì, nyaanyaanya; àbìdi, àsàtù, ànaayi, àtaanu, àsambòmbò, mwandamutekète.

293 Bàmwè bàà kùdìbo bàvwa bafwànyine kwikala bàmbè ne: “Hee, kanwènakù nwela meeji ne tukààdi baMupetè anyi?”

“To, to, to, to.” Ki mùdìbi. To. Ncyà bushùwà.

294 “Ebi’s mbipicìibwe ne nwênù bapàtùke’s, balumyànà.” Dyabùlù ne: “Nwênù—nwênù—nwênù’s nudi bamanyè ne nukààdi bamanè kupèta cinùdi nukèba aci. Ndaayaaku’s, nùbangè mudimu wênù wà bwambi.”

295 “To, to, to. Katwèna banji kuMupeta to, nànsha. Bwalu, Yèyè mmwàmbe ne: ‘Nekulwe, cìikalà mwà kwenzeka mu matùkù à ndekeelu: Ne mishiku yìdi yìkukuminà ne mu myakulu mikwàbò ki mùshindù wùngàakulà ne bantu aba, ne Diikisha dìmvwà mwambe adi ndyòdi edi,’ nwamònu’s, Yeshàayi 28.19.” Mmwàmbe ne: “Ki—ki Yèyè ewu, nwênù—nwênù nenùMùpetè panwìkalà. . . Mòna’s, netùmanyè pààlwàYe apu. Netùmanyè pààlwàYe apu. Netùcimanyè ne: ‘Mulayi wà Taatù.’” Ki kwandilaye matùkù citèemà. Ki pashiishe mu ditùkù dyà dikumi: “Tuvwamù.” Bàvwà ne lutùùlù, bwà kwindila.

296 Mpindyewu, wèwè ne lutùùlù lwà mùshindù awu alu, paanyimà pàà Nzambi mumane kukupèèsha mulayi ne wèwè muwùmòne mu Bible ne: “Ngwànyì mèmè,” dìbà adi windilè. Dìbà adi, wèwè ne lutùùlù lwà mùshindù awu, ùlùsàkidilè ku diitabuuja dyèbè. Nènku udi umòna mùdi wenda ubànda mpindyewu amu anyi? Udi wenda ubànda too ne *apa* mpindyewu. Eyo. Kalonda kàà dìbà kàdi kanyùngulukà ànu kunyùnguluka, kòkò pààkù’s, kí mmwòmò anyi? Eyo. Eyo. Sàkidilàaku aci ku diitabuuja dyèbè.

297 Misangu yònsò wikàle ànu uMutèeka Yèyè kumpàla kwèbè, mwikàle uvùluka ne, Yèyè ngwàkalaya. Wàkalaya awu, kí mmèmè to. Wàkalaya awu, kí mpaasàtà, Mwanèètù Neville to. Kí mmwambi kampànda mukwàbò, wàkalaya to. Kàvwà nsaserdòse kampànda anyi paapà to. Kàvwà mmuntu kampànda wa pa buloba to. Nzambi ngwàkafila mulayi, ne Nzambi mmukùmbàne kushààla mulamate ku cyònsò cyàkalayaYe. Eyo. Wèwè ne diitabuuja dyà mùshindù awu, dyà kumanya ne Nzambi ngwàkacilaya! Udi wamba ne: “Mwanèètù Branham, ndi nsaama. Ndi njinga dyondopa bibi be.” Údítabè’s. Ndipà dikupèèsha, èyowà’s, mukalenge, bu wèwè ànu mwà kwitabuuja. “Èè,” mùdi wamba, “s’ndi mwitabuuje mwitabùùjilemù.” Nànu pwàku bwalu abu mwoyi. Kwàjikì. Bwalu abu bwàmanyi kujika. Nwamònu anyi?

298 Ikàlà ne lutùùlù, pawìkalà ne lutùùlù. Wèwè kùyì naalù to, neùbùmbuke ku Nzùbu ewu, wamònu’s. Necibyànkulè bikwàbò byònsò byà kwòkò abi panshi, cintu cimwèpelè aci. Bikèngela wikalè ne cyòci aci. Kucisàkididi to, bwalu, necishimbule nzùbu webè pawìkalà kùyì ne lutùùlù to, pawìkalè kùyì ne bukolè bwà kusàkidila ku diitabuuja dyèbè dyùdi wamba ne udi naadi adi. Nènku wèwè kùyì ne diitabuuja to, kàdi uteeta bwà kutèekapù bukolè, necyùpule diitabuuja dyèbè. Wamònu anyi? Udi wamba ne: “Ee, mpindyewu, indilà kakesè. Pàmwàpa byònsò ebi nntùpàkànyì, nànsha bishi. Pàmwàpa Nzambi kèna

Nzambì to. Pàmwăpa Nzambì kàtukù mene to.” Wamònu’s, necicibule cintu aci bitùpà bibidì. Wamònu anyi?

<sup>299</sup> Kadi wêwè ne diitabuuja dishùwashùwàlè, nènku ùteekèpu bukolè bushùwashùwàlè, pashiishe dimanya dishùwashùwàlè, pashiishe didikànda dishùwashùwàlè, pashiishe lutùùlù lushùwashùwàlè. Wamònu anyi? Udi munkaci mwà kubànda wenda ulonda mushoonyi. Mbímpè.

<sup>300</sup> Ciitànù, sàkidila difwànà dyà Nzambì. Kaa, ekèlekèlè! Difwànà dyà Nzambì didi ne cyà kusàkidiiibwa. Difwànà dyà Nzambì didi dyumvwija cinyi? Ndi mukebe mu nkòngamyâkù yinaayi anyi yitaanu nciyiku nànsha mwà kupeta civwadi dyumvwija to. Ndekeelu wa byònsò, mèmè kupweka mwà Mwanèètù Jeffries mwàmwa, twètù kucipeta mu—mu nkòngamyâku kampànda. *Difwànà dyà Nzambì* mbwena kwamba ne “kwikala bu Nzambì.” Kaa, ekèlekèlè! Paanyimà pàa wêwè mupete diitabuuja, bukolè, dimanya, didikanda, lutùùlù, pashiishe kwikala bu Nzambì. Yoyöyò!

<sup>301</sup> Udi wamba ne: “Mèmè ncyèna ne mùshindù wa kwenza nàнку to, Mwanèètù Branham.” Kaa, èyowà’s, wêwè’s udi ne mùshindù wa kwenza nàнку.

<sup>302</sup> Anyishaayi nnùbadilèku ànu ndambù wa Mifùndu mwaba ewu, kasunsa kàmwè cyanàànà. Maatàayi 5.48. Netwàngatè ewu nùнку bwà tumòne mudiwu wùmvwika, Maatàayi 5.48, ne kumòna ní ùdi ne cyà kwikala bu Nzambì. Nudi bamanyè ne Bible ùdi wàmba ne: “Nudi banzambì.” Yesù ngwâkamba nàнку. Bwà cinyi? Bukolè bwònsò, bintu byònsò bidì munda mwà Nzambì abi, bidì munda mwènù. Maatàayi 5.48: “Ikàlaayi. . .” Yesù ngudi wakula ewu, mu disànkà edi.

*Nàнку ikàlaayi b-a-p-w-à-n-g-à-n-e, (Ncinyi aci?)  
bapwàngàne, ànu mùdi Taatù wenù. . .mu dyulu  
mwikàle mupwàngàne.*

<sup>303</sup> Ukàadi mubànde too ne *apa* mpindyewu, kumpàla kwà wêwè kulòmbiibwa bwà kucyènza. Bikèngela bwà bintu byònsò ebi bìsàkidiibwe dyàmbedi. Pashiishe paùdi ubànda mwaba ewu, Yèyè mmukulòmbe mpindyewu bwà wikalè mupwàngàne, difwànà dyà Nzambì, bânà bàà balùme ne bàà bakàji bàà Nzambì. Ncyà bushùwà. Bintu biine búngibi bìndi mufwányine kwamba pa bwalu abu’s wè!

<sup>304</sup> Tùbuululàayi mu Efèsò 4, bwà tujandule mwab’ewu ne, mu Mukànda wa Efèsò ne, ncinyi cidiwu wàmba bwà cintu eci, wòwò pàawù, pa mùshindù ùvwàbi bikèngela bwà twètù—mùshindù ùvwàbi bikèngela bwà twètù kwenza. Efèsò 4, nshapità mwi4, kubàngila ku mvnsà wa 12. Efèsò 4, kubàngila ku mvnsà wa 12. Èyo. Tùbangilàayi mwaba ewu ku mvnsà wa 11.

*Ne yèyè wàkapà bakwàbò, bàpostòlò; ne bakwàbò,  
baprófètà; . . .*

305 Nudi bavùlùke dilòòlò dyà makèèlèlè anyi? Kwidikiji bwà kwangata mudimu wà muntu mukwàbò to. Nwamònu anyi?

*...ne bakwàbò, batangadiki; ne bakwàbò, bampaasàtà...ne bakwàbò, balongeshi;*

306 “Bwà difikisha dyà Nzambi ku bupwàngàne anyi”? Ki mùdìwu wùbadiibwa anyi? [Disangisha dìdì dyàmba ne: “To.”—Muf.] Bupwàngàne bwà cinyi? [“Bansantu.”] Bansantu mbanganyi? Bajidiibwe abu’s. Amen. Bàdì babangile lwà kwinshì eku abu.

*...difikisha dyà bansantu ku bupwàngàne, bwà dyenza dyà mudimu wa bwambi (mudimu wa bwambi wa Yesù Kilistò), bwà diibaka dyà mubidi wà Kilistò (bwà diibaka, diWàsà too ne kuulu, diibaka), too ne...*

*Too ne patwàfikà bônso ku bwobùmwe bwà diitabuuja, ne...dimanya dyà Mwànà wa Nzambi, ne ku muntu mupwàngàne, ku ditwishibwa, (kaa, ekèlekèle), ku cipimu cyà cipidì cyà kaabujimà kàà Kilistò:*

307 “Bapwàngàne,” bìdì bikèngela difwànà dyà Nzambi. Bikèngela wèwè kusàkidila ku diitabuuja dyèbè, difwànà dyà Nzambi. Wamònu’s, udi ubangila kwinshì eku, ne bukolè. Pashiishe uya ku dimanya. Pashiishe uya ku didikanda. Pashiishe uya ku lutùlù. Mpindyewu udi pa difwànà dyà Nzambi. Difwànà dyà Nzambi! Kaa, ekèlekèle! Dìbà dyètù didi ànu dyènda diya’s. Twànji tùmonebi. Kàdì’s nutu bamanyè cìvwà difwànà dyà Nzambi dyùmvwija. Nukàadi bimbimbè musambu ewu ne:

Kwikala bu Yesù, kwikala bu Yesù,  
Pa buloba ndi njinga kwikala bu Yèyè;  
Mu lwendu lwanyi lwónso lwà mwoyi  
kuumukila pa buloba too ne ku Butumbi  
Ndi ndòmba ànu bwà kwikala bu Yèyè.

308 Ki difwànà dyà Nzambi ndyòdì adi. PààkaMutàpàbo dipi luseke lùmwè lwà ditàma, Yèyè wàkafila lukwàbò. PààkaMwambàbo méyi à nkàbukàbu, Yèyè kààkaakulakù to. Kààkapingajakù cipendu ku cipendu to. Nwamònu anyi? Ne difwànà dyà Nzambi, mwikàle ùkèba cintu ànu cimwèpelè: “Mèmè ndi ngèza misangu yònsò ànu cidi cisànkisha Taatù.” Nwamònu anyi? Èyowà’s, mukalenge. Misangu yònsò. Ki difwànà dyà Nzambi ndyòdì adi. Nwamònu anyi?

309 Paanyimà pàà wèwè mumanè kuumuka *apa*, mufike *apa*, mufike *apa*, mufike *apa*, mufike *apa*, mpindyewu ukàadi ubwela mu cipidì mu kaabujimà mpindyewu cyà mwànà wa Nzambi. Kàdì bikèngela wikalè ne *eci*, kusangisha ne byònsò *ebi*, ne wèwè mwine kwèna nànsha mwà kubanga to pawikalà kùyì mupete *eci*.

310 Mpindyewu vùlùkaayi nyuunyi mufiike mwikàle ne masàlà à nyuunyi wa kayiba awu. Kanùmupù mwoyi to. Nwamònu anyi? Kudìdingi wacisàkidila pawikalà kùyì mulediibwe menemene cyàkàbìdì to. Bwalu, wèwè, kabyàkukùmبانakù to, ne kwèna—kwèna mwà kwenzaku bwà kukùmبانabì to. Nebifike ku *eci*, anyi *eci* apa nunku, necyùpùkilè mwaba kampànda.

311 Kàdi paùdì upweka kwìnshì *eku*, nkuci mushùwashùwàlè mulediibwe cyàkàbìdì, dìbà adi kwèna usàkidila cintu nànsha cimwè to. Cyòci ncìdì cidisakidila kùdì wèwè, wamònu's, cyènda cìbànda, èyo, cyènda cìya bwà kafika too ne mu bupwàngàne mpindyewu. Èyo.

312 Pashìishe, cisambòmbò, tùsàkidilàayi, Bible mmwambe apa ne, kusàkidila dinanga dyà bwànà bwètù. . .dinangangana dyà bwànà bwètù. Mpindyewu, aci ncyà cìmpè, apa mene, cisambòmbò, mwandamutekète. Èyo. Kusàkidila dinangangana dyà bwànà bwètù. Èyo. Patùdì tufika ku aci, dinangangana dyà bwànà bwètù, wèwè udi uditeeka pa kaaba kendè, mu bwalu abu. Mpindyewu udi wamba ne. . .

313 “Mwanèètù mmungenzèle mpèkatù,” mwàkambà Peetèlò. “Nebikèngelè bwà mmufwilè luse,” yèyè ne, “misangu mwandamutekète ku ditùkù anyi?”

Yèyè kwamba ne: “Makumi mwandamutekète misangu mwandamutekète.” Nwamònu anyi?

314 Dinangangana dyà bwànà bwètù. Mpindyewu, nudi numòna's, mwanèètù yèyè mupangakanangane nèèbè ànu byà menemene ebi, kwikadi wàpanga lutùùlù kùdìye to. Wamònu anyi? To. Wamònu anyi? Ikalà ne kalolo kùdìye. Ndaaku, nànsha bishi.

315 Muntu kampànda ùvwa wàmba, ànu àbìdì aa, ne: “Mmunyi mùdì mwà kwitabuuja bintu ebi mùshindù wùdì ubiitabuuja ewu, kàdi mucikàlè ànu uya kùdì beena Assemblées de Dieu, ne ba-Unitaires, ne bakwàbò bònsò abu?” Pashìishe tèèkaaku, wamònu's, dinangangana dyà bwànà bwètù. Wamònu anyi? Wamònu anyi? Mwikàle utèkemena, ne dìngà ditùkù, wamònu's; mwikàle nendè ne lutùùlù, wamònu's; mwikàle ne didikanda, mwikàle umutwàla; dimanya, bwà kuumvwa bìdìye yèyè wìtabuuja, uvùluka ne, ki bìdì pèndè mu mwoyi wèndè, ki byòbì abi; bukolè, mu wèwè mwine, bwà kubùlekela bupàtuka ne kalolo, ne bupòle, kùdìye; mwikàle ne diitabuuja dyà ne dìngà ditùkù Nzambi wàdyàkumubweja. Nwamònu anyi?

316 Dinangangana dyà bwànà bwètù, cintu cyà mwandamutekète. Ùmwè, ibìdì, isàtù, inaayi, itaanu, isambòmbò, mwandamutekète. [Mwanèètù Branham ùdì ùtuuta bintu ku cibàsà misangu mwandamutekète—Muf.] Nwamònu's, cintu cyà mwandamutekète. Nènku, mpindyewu, udi wenda ulwa.



317 Cintu cidi cilondà, dîbà adi, kusàkidila luse, lùdi lwikàle dinanga. Ki dibwe dyà mùsongà ndyòdi adi. Dimwè dyà ku matùkù àdi panshì aa, mu èkèleeziyà . . .

318 Mpindyewu, bu nwênù mwà kuswà, biikàle bimanya pa mukàbà wa mēyi, ne myaba mikwàbò yònsò ne, ncyèna ndongesha bwalu ebu bu ne ndilongesha dyà nshindameenu to, cîndi njinga kwamba mpindyewu eci. Kàdi ndi ànu njinga kunùleeja ne, ku dikwàcisha dyà Nzambi, cidi bwalu ebu mu bulelèlè, ne, Bible wa kumpàla ukààdikù Nzambi mufunde ùvwa n’Cidiminanzaji mu dyulu. Cidi cibanga ne virgo. Cidi cijika ne Leo ntambwe. Nènku pangàabwelà mu Cìtampì aci Cìsambòmbò ne cyà Mwandamutekète, nenùjandulè ne, pàakakàngùdiibwa Cìtampì cikwàbò aci, cimanyinu cyà mu Cidiminanzaji cyà kiine kaaba aku cìvwa nkànsèrè, mishipa micyamàkàne. Nènku aci ncikondo cyà kànsèrè citùdi ne mwoyi mpindyewu eci, cibuuulula. Ne cintu cidi cilondele cìvwa Cìtampì aci cikùtùlùle, Cyàkabuulula Leo ntambwe, Dilwa dyà cyàkàbìdi dyà Kilistò. Wàkalwa, musangu wà kumpàla, kùdi virgo; Ùdi ùlwa, musangu ùdi ùlondà, Leo ntambwe. Nēmfikishè bwalu ebu too ne ku . . .

319 Mpindyewu, ncyèna mumanyè ní ngàpetakù dîbà mu dîndà emu’s. Nèngénzè ne mwànyì mwònsò, bwà kunùleeja ne bibàndilu ebi bìdi mu bipaapu byà musàkà, ànu menemene, Bible mwibìdi uvwa Nzambi mufunde. Enòkà ki wàkabifùnda, kàdi kubitèekayè mu cipaapu cyà musàkà.

320 Nènku mwisàtù, Nzambi ùtu misangu yònsò muvwijiiibwe mupwàngàne ànu mu mwisàtù, pashiishe Yèyè kudivwija Yèyè mwine Dìyi Dyèndè.

321 Mwab’ewu, mpindyewu, nwavùlùkaayi ne, mu cipaapu cyà musàkà . . . Ngeela meeji ne bààbùngì bàà kunùdi nwênù bàsàlaayi nukààdikù bafike mu Ejipitu. Cipaapu cyà musàkà kacyèna ne mùsongà kumutù to. Kacyakacya kacitù cyànji kwikalakù naawù to. Di—Dibwe dyà Scone, ne bikwàbò byònsò bìdìbo naabi, kàdi pààbi’s . . .

322 Wèwè mwikàle ne kabèji kàà ndola umwe mu mpaaya, tàngila pa kabèji kàà ndola aku, neusangane ne, lwà kuulu ku dyàbalùme aku, kàdi ne mukanku mwikàle ne dibèndelà dyà Àmèrikè. Ne mbambèpu ne, citampì “cyà États-Unis.” Luseke lukwàbò, kàdi ne cipaapu cyà musàkà, ciikàle ne dibwe dinène dyà mùsongà ne dîsù dyà muntu. Mbambe ku lwine luseke elu ne: “Cìtampì cinène.” Èè, piikalàbi ne edi ki ditùnga dinène, bwà cinyi cìtampì cinène eci kaciyikù cifwànyine kwikala cìtampì cyàdi dyòdi cyà ditùnga? Nzambi ngudi ubàfikisha ku difila bujaadiki, nànsha bòbò bayè penyì.

323 Mwva nyiikilangana ne ngàngàbukà kampànda musangu mukwàbò, yèyè ùvwa ànu ùnyoobesha be, pa bìdi bitàngila dyondopa dyà kùdi Nzambi. Tuvwa biimànyine mu mùsèèsù. Yèyè ne: “Mukalenge Branham, wèwè’s udi ànu ufila cibwejàkàji

mu mitù yà bantu.” Yèyè ne: “Kakùtu dyondopa nànsha dimwè to, ànu dyà ku manga à baamingàngà.”

<sup>324</sup> Kungenzekelabi ne nkùdimukè, ntapè dísù ku cimanyinu cyèndè civwà ku kàshinyi, ciikàle ne nyòka awu mukùdika ku mucì. Mémè ne: “Pa nànkù, s’mbipiciibwe ne wèwè muumùshe cimanyinu cyàcya pa kàshinyi kèbè, dībà adi, bwalu cimanyinu cyèbè wèwè mwine ncidì cifila bujaadiki bwà ne Nzambi m’Mwondopi.”

<sup>325</sup> Ngàngàbukà mulelèlè ùdi wìtabuuja aci. Abu mbangàngàbukà bàà mafi. Èyowà’s, mukalenge. Nyòka mukùdika ku mucì! Mòsà ngwákabàndisha nyòka awu ku mucì. Yèyè wàkamba ne: “Mémè ki Mukalenge udi ukwondopa ku màsaamà ebe ònsò.” Nènku bàvwa bàtàngila nyòka awu, bwà dyondopa dyà kùdi Nzambi. Kàdi aba bóbò bàdi bàfila bujaadiki búbènga aci; kàdi cimanyinu cyàbò bóbò biine pàaci’s ncidì cifila bujaadiki bwikale búbènga cìdìbo bàmba aci. Yoyòyò!

<sup>326</sup> Muneemu emu, ditùnga dyètù edi, bàmba bintu bidìbo bàmba abi, kàdi biikàle bàseka bintu ebi, pàdi mfranga yàbò bóbò biine, lupetu lwàbò, biikàle bifila bujaadiki bwà ne citampì cyà cibwàshìbwàshì cijimà n’Nzambi. Nudikù bamòne dísù didì diimànyìne lwà kuulu kumutù kwàci aci aku adi, pa kabèji kàà ndola umwe apu anyi? Ki citampì cinène aci.

<sup>327</sup> Kabàvwakù banji kucitèeka pamutù pàà cipaapu cyà musàkà aci to. Kabàvwa mwà kuumvwa ne mbwà cinyi to. Dibwe dyà mùsongà bààkadibènga, Mutù awu, Kilistò. Kàdi neDilwe, dìngà ditukù.

<sup>328</sup> Mpindyewu, mu kwibaka, bukolè. . . Mu kwibaka kwà nzùbu munène ewu, mu kwibaka kwà cipidi eci, nwamònu’s, cidi cibanga ne dibwe dyà cishìmikidi; diitabuuja, bukolè, dimanya, didikanda, lutùùlù, difwàna dyà Nzambi, dinangangana dyà bwàna bwètù. Mpindyewu bìdi byènza cinyi? Pashìshe bìdi bìndila Dibwe dyà mùsongà, didì diikàle dinanga, bwalu Nzambi ndinanga. Nènku Yèyè ngudi ukòntonona, ne Yèyè ki dikànda bwà cyònsò cyà ku bintu ebi. Ncyà bushùwà. Èyowà’s, mukalenge.

<sup>329</sup> Ànu mwòmò *emu*, ànu mwòmò *emu*, nudi numòna ne, lwà munkàcìnkacì emu, ndi mutèèke midimu yònsò eyi mwòmò emu, ne apa tuumavwala tukesè tùdì tùlwa etu. Ncinyi aci? Nyumà Mwìmpè mwikàle ùpweka, ùpicila kùdi Kilistò, nwamònu’s. Nyumà Mwìmpè! Nyumà Mwìmpè ùdi kumutù kwà byònsò *ebi*, ùlamakaja byòbì ebi kaaba kàmwè, wìbaka (cinyi?) Èkèleeziyà mupwàngàne, bwà Dibwe dyà mùsongà diMwelè mùsongà.

<sup>330</sup> Nceyèjiibwe kàbìdì cinyi? Ncimwènèshìibwe mu Bikondo Mwandamutekète byà Èkèleeziyà, ne baamisànjeelà mwandamutekète bàà Èkèleeziyà.

<sup>331</sup> Byàkabangila paanyimà *apa*. Èkèleeziyà wàkaashiibwa penyì bwà musangu wà kumpàla? Èkèleeziyà wa mpenta

wàkaashiibwa penyi bwà musangu wà kumpàla? Kùdi Pòlò Munsantu, mu Efèsò, mütòotò wa Cikondo cyà Èkèleeziyà wa Efèsò, Efèsò.

<sup>332</sup> Cikondo ciibídi cyà Èkèleeziyà cívwa n’Seemùnà. “Bukolè.” Irénée, muntu munène wákatwà Èvànjeeliyò wa Pòlò nyama ku mikòlò awu.

<sup>333</sup> Cikondo cyà Èkèleeziyà cyàkalondà cívwa m’Peegàmò, úvwa Martin. Martin nguvwa muntu munène wáakashààla. Pòlò, Irénée, Martin.

<sup>334</sup> Pashiishe kulwaku Colomban mu Twatilà. Nudi bavùlùke anyi? Ncyòci eci, cizòdiibwe ànu mwaba *wàwa* mene. Colomban. Paanyimà pàà Colomban. . . Bikondo byà Mídimà kubwelabi muntwamu.

<sup>335</sup> Pashiishe kulwakù Sàadi, mwikàle umvwija ne *mufwè*. Luther. Àlèluuyàh! Pashiishe cinyi? Ncinyi cyàkalwà paanyimà pàà Sàadi, Luther?

<sup>336</sup> Pashiishe kulwakù Filadèlèfiyà. “Difwànà dyà Nzambi.” Wesley, cijila! “Mwakàne ùdi ne mwoyi ku diitabuuja,” mwákambà Luther. Dijidiibwa kùdi Wesley.

<sup>337</sup> Pashiishe kulwakù dinangangana dyà bwànà bwètù, mu Laòdikiyà. Nènku tudi twitabuuja ne Mukenji munène wà dimwènèka diibídi dyà Eliyà, mu ditùkù dyà ndekeelu awu, newütangalake pa buloba.

<sup>338</sup> Mònaayi, Bikondo Mwandamutekète byà Èkèleeziyà, bibàndilu mwandamutekète. Nzambi munkaci mwà kwibaka Èkèleeziyà Wendè, ncyenze bu muntu umwèpelè ùbwela mu muntu nkààyà, ùdiibàka Yèyè mwine. Butumbi, Bukolè bwà Nzambi, biikàle bipwekela mu eci, biCilamakaja pàmwè. Ki bwà cinyi, beena Mpenta bààkiipatà ba-Luthériens, bààkiipatà beena Wesley ne bikwàbò abu, ki mbamanyè cidibo bàmba to. Nudi numòna’s, bóbò bàvwa basòmbèle mu eci citùpà cyà ntempèlù. Ki mùdibi ne, bantu bakwàbò bàdi mwà kubànda too ne pa mwaba kampànda ewu kàdi kudishinda. Kàdi kùdi citùpà cishùwashùwàlè cyà cyòci aci, citungunuka ne kwenza bwà nzùbu awu àmwekè. “Nèngààlujululè,” mùdi Mukalenge wàmba.

<sup>339</sup> Nudi bavùlùke *Mucì Mukàji-Musèla* anyi? Nudi bavùlùke diyiiha pa *Mucì Mukàji-Musèla* anyi? BààkaWùdya too ne kwinsàhì, kàdi Yèyè wàkawùsonza. Kupetabò matàmbà à cyena màngumba; Yèyè kuàsónza. Kujuulabò èkèleeziyà mukwàbò, matàmbà à cyena màngumba; Yèyè kucisónza. Kàdi mwoyi wa Mucì awu wákatungunuka ne kwenda kukola. “Kàdi pa díbà dyà dilòlò nekwikalè Bukènkè.” Nwamònu anyi? Ki pa díbà adi pàlwalwà Kilistò, Nyumà Mwímpè. Yesù ùdi ùpweka ùdishikika Yèyè mwine ku Mutù wa Èkèleeziyà pa díbà adi, ne Yèyè neàbiishe Èkèleeziyà ewu ku lufù, mwikàle Mubidi Wendè Yèyè mwine. Munda *amu* ki mùdi Mubidi.

340 Nènku mùshindù ùdi Nzambì muswè bwà twétù tükolè bu muntu nkààya, ke mùshindù awu ùdiYe mufikishe Èkèleeziyà Wendè ku dikola. Cikondo cyònsò cyà Èkèleeziyà, Ùdi ùshààla Èkèleeziyà umwèpelè munène. Nwamònu anyi?

341 *Aba* bantu kabàvwa babàlòmbe civwàbo balòmbe *aba* nùnkù to. *Ewu* kabàakamulomba civwàbo balòmbe *ewu* nùnkù to. Nwamònu anyi? Kàdi Yèyè mmwibàke Èkèleeziyà Wendè too ne kuulu mùshindù ùmwèùm wè awu. Mmwibàke Èkèleeziyà Wendè—Wendè too ne kuulu mùshindù ùmwèùm wè ùdiYe munkacì mwà kwibaka bantu Bendè. Pashìshe Peetèlò mwab'ewu ùdi wàmba, dyàmbedi, bintu mwandamutekète: diitabuuja, bukolè, (nwamònu's, byènda bìbànda), dimanya, didikanda, lutùlùlù, difwànà dyà Nzambì, dinanga dyà bwànà bwètù, kusàkidila dinangangana dyà bwànà bwètù, ne pashìshe dinanga dyà Nzambì. Nyumà Mwímpè, Kilistò mu mupersona wa Nyumà Mwímpè, ùlwa pambidi pèèbè, mu dibàtiiza dilelèlè dyà Nyumà Mwímpè, nènku wèwè mwikale ne makolè ònsò aa matwà cìtampi munda mwèbè. Dìbà adi, Nzambì mmusòmbèle mu Tabernacle kampànda, udibo babiikila ne Nzùbu, Tabernacle udi ne mwoyi wa cisòmbedi cyà Nzambì udi ne mwoyi.

342 Pàdi muntu mwikàle ne bintu byà mùshndù ewu, dìbà adi Nyumà Mwímpè ùdi ùlwa pambidi pèndè. Nànsha byòbì ne, udi mufwànyine kwakula mu myakulu, udi mufwànyine kutentula dipà kanà dyònsò cidì Nzambì naacì aci. Udi mufwànyine kwenza aci. Kàdi pàcidì ànu makolè aa kàyi mabwele munda mwèbè to, wèwè ùcidì ànu kule ne cishimikidi cilelèlè, cishùwashùwàlè cyà diitabuuja. Kàdi pàdi makolè aa àkolelamù, ne wèwè musàkidile eci ku cyàcyà, dìbà adi udi lupìngù lùdi ne mwoyi. Udi lupìngù lùdi ne mwoyi, lwikàle lùnyunga.

343 Kàdi, nudi bamanyè's, ba—bampàngaanù, bàtu bôbò bàpòna mikookwela kumpàla kwà lupìngù kampànda, nzambì mudifwànyikijila. Nènku mu mùshindù wà didifwànyikijila awu bàtu biitabuuja ne nzambì mudifwànyikijila awu ùdi ùbàndamuna. Aci's mbumpàngaanù. Aci's ncyena Loomò. Bàtu biinamina bansantu bàà mishindù yònsò ne bintu bikwàbò byònsò. Nènku bàtu ne Munsantu Cecilia, nzambì wa lubànzà, ne bintu byàbùngì bishiilèshiilàngàne byà mùshindù awu. Bàtu biinamina byòbì abi, ne mu bushùwà bwà bwalu biikàle babiitabuuja mu mùshindù wa didifwànyikijila. Ncimfwànyì kaayipù—kaayipù's we, cyà Nzambì mulelèlè udi ne mwoyi.

344 Kàdi patùdi twétù, kabìyi byà didifwànyikijila to, kàdi tupòna mikookwela kumpàla kwà Nzambì udi ne mwoyi, bukolè bùdi ne mwoyi, dimanya didì ne mwoyi, lutùlùlù lùdi ne mwoyi, difwànà dyà Nzambì didì ne mwoyi, Bukolè bùdi ne mwoyi bwikàle bùfùmina kùdi Nzambì udi ne mwoyi, ciikàle civwija muntu udi ne mwoyi ùshààla cimfwànyì cidì ne mwoyi mu cipidi cyà Nzambì. Cidiye wènza ncinyi? Bintu bimwèbimwè

byàkenzà Yesù abi; wènda mùshindù ùmwèùmwè wàkendàye Yèyè awu, wènda bintu bimwèbimwè byàkenzàye Yèyè abi. Bwalu, kí ncintu cyà didìfwànyìkijila nànsha. Kùdi bulelèlè kampànda bùdì bùjaadikà.

<sup>345</sup> Nudi nuumvwa cìndì njinga kwamba aci anyi? Nudi numòna mùdì makolè aa, bintu byà diibaka naabì ebi, biikàle byènta cimfwànyì pàmwè ne baamisànjeelà bàà Èkèleeziyà, ne bikondo byà Èkèleeziyà amu anyi? Mpindyewu, òmwè dyà ku matùkù àdì panshi aa, netwàngatè ùmwè ne ùmwè wà ku myàkù eyi, kuyìlonga mu ndòndò, nènku tùleejè ne bidì bijaadika bwalu ebu. Bidì byènda byònsò cyàpàmwè. Cyà bushùwà. Nwamònu anyi? Kaa, ekèlekèle! Mùshindù mwìnè ùdìbì bilenga's wè, nwamònu's, pa kumòna cidìbì—cidìbì byènta.

<sup>346</sup> Mpindyewu, awu ki Nzùbu udi Nzambì ùsòmbelamù; kí nanzùbu mwikàle ne ngonga munène, ne kàleyì katùmbùke kaasa kuulu ku mùsongà to. Nwamònu anyi? “Kàdi Wèwè wàkandongolwela Mèmè Mubidi,” Mubidi ùdì Nzambì mwà kusòmbelamù, mùdì Nzambì mwà kwendela, mùdì Nzambì mwà kumwèna, mùdì Nzambì mwà kwakwila, mùdì Nzambì mwà kukwacila mudimu. Amen! Cyamù cyà mudimu cidì ne mwoyi cyà Nzambì, Nzambì mwikàle wèndela ku makàsà àbìdì, mu wèwè. Butùmbi's wè! “Makàsà à mwakàne mmalombola kùdì Nzambì,” Nzambì wèndela mu wèwè. “Bwalu nudi mikàndà mifùndilangana, yidì bantu bwònsò bàbala.” Nènku Mwoyi ùdì mu Kilistò wòwò mwikàle munda mwènù, nenùkwamè Mwoyi wàkawkàmà Kilistò awu.

<sup>347</sup> Ànu bu múnkaadi mwambàmbe's. Patula màyi adi mu mucì wà péches, nènku bu wèwè mwà kuàsambulujà, ku dyela dyà mashi mu mijilu, mu mucì wà pommes, mucì wà pommes awu's mmufwànyìne kukwàma ma-péches. Bushùwà's. Neyà bushùwà ne mmufwànyìne kwenza aci. Nànsha matàmbà miikàle ne mmwènekèlu kaayi, ùdì ne màyi à mucì wà pommes munda mwàwù, nwamònu's, anyi à mucì kaayi wònsò. Nwamònu anyi? Pàtula mwoyi wàwù awu mu mucì wà pommes awu, ùwùpatule wònsò, ne ùwèlè ne—ne cipòmpa cyà màyi à mucì, ne uzololoje màyi à mucì wà péches ùèlè mu mucì wà pommes. Cidì cyènzekà ncinyi? Kawàkukwàma kàbìdì ma-péches to. Nwamònu anyi? To, mukalenge. Kawàkukwàma kàbìdì ma-péches to. Mwoyi wà mucì wà péches wòwò mubwele mu mucì wà pommes, nànkù's wè, kawàkukwàma kàbìdì ma-pommes to. Newùkwame ma-péches, nwamònu's, nwamònu's, bwalu ùdì ne mwoyi awu munda mwàwù.

<sup>348</sup> Èè, ùtwàngatè twètù aba, bàdì katùyì cingà cintu to ànu cilòwòlowo cyà cisuku eci, bantu cyanààna, nwamònu's, ne kakùyì cintu cyà nsongo mu twètù to, bwalu tudi bònsò bafwè mu mpèkaatù ne mu matomboka. Tudi bònsò mu ngiikàdìlù wa mùshindù awu. Ne pashìshe twètù, twètù biinè, tudi mwà kupòna mikookwela, kudìfila mu kaabujimà, too ne pàdì Nzambì

wàngata kandundu Kèndè kàà dyelangana naakù mashi, Dîná dyà Yesù Kilistò, bwalu: “Kakwèna dîngà Dîná mwinshì mwà Dyulu dîdì muntu mwà kusùngìdiibwayè ku dyôdì to,” nènku usambuluja Mwoyi wa Kilistò ùwèla munda mwètù. Dìbà adi tudì ne diitabuuja dyà mùshindù *ewu*, diitabuuja òwà naadi Kilistò. Ne diitabuuja dyà Kilistò kadìvwa dyashila pa Bàfaalèsà abu, anyì Bàsàdokà, anyì mu tunyingu twàbò, mbidìkà yàbò, ne ngeesu yàbò, ne dibisukula dyàbò to. Dìvwa dyashila pa Dìyì dyà Nzambì, amen, menemene, mu mùshindù wa ne Kilistò ùvwa Dìyì, Dìyì dyàkavwijiibwa mubidi. Nènku bu twètù mwà kufika ku dyediibwa dyà mashi à mu mijilu ku Bukolè Bwèndè, mu mùshindù wà tufwà ku ngeelelu wa meeji wètù twètù biinè, ne diitabuuja dyètù dilwa diitabuuja dishùwashùwàlè, àlèluuyàh, dìbà adi Mwoyi wà Kilistò ùdì wèdiibwa munda mwètù ku dyela dyà mashi mu mijilu. Tudì tulwa bifùkiibwà bìdì ne mwoyi byà Nzambì, cisòmbedi cidì Nyumà Mwìmpè mwà kutùminamù mabènesha Èndè àdì èla nsèsà awu, ne tudì biikàle mu cipidì cyà Kilistò.

<sup>349</sup> Yesù wàkamba ne: “Kì mbifùndiibwekù anyì? Nwènu nwàMpiìshi, pàndì ngàmbe ne: ‘Ndi Mwànà wa Nzambì.’ Kì mbifùndiibwekù, ne: ‘Nudi banzambì.’ Mikenji yènù nwènu biinè kayènakù yàmbe nànkù anyì?” Bu Mòsà, bu Eliyà, bu baprófetà bàvwà ne nsòmbelu wa mutàmbe kuseemena pabwipi ne Nzambì abu, mu mùshindù wà ne Nzambì ùvwa ùdisambuluja ànu Yèyè mwinè ùbwela munda mwàbò. Nènku bàvwa bàakula, kabàyi bòbò biinè to, kàdì Nzambì. “Kanùdyèlèdì meeji bwà binùdì ne cyà kwamba to, bwalu kí nwnwènu bàdì bàakula to. N’Taatu udi musòmbèlè munda mwènù; Yèyè ngudi wakula.” Mèyi èndè kí ngèndè yèyè mwinè to, bwalu, mwoyi wèndè, yèyè mmufwè.

<sup>350</sup> Wèwè mufwè, udi upatula mashi mu muntu, umwela bwanga bwà kàyì ùbola to. Lutàtu lùdì ne, bàabùngì bàà kùdìbo kabàtukù babèlè bwanga bwà kabàyi babola to. Wèwè mupàtùle mashi mu muntu awu, kwèndè’s kwàjiki. Nènku cintu cimwèpelè cyùdì ne cyà kwenza cidì ànu kwaluja mashi makwàbò munda mwèndè; bwà kwikalayè cyàkàbìdì ne mwoyi. Bu mùdì mupàtùle mashi èndè.

<sup>351</sup> Nènku mpindyewu tudì beele Mashi à Yesù Kilistò munda, nwamònu’s, nènku aci cidì cilela diitabuuja dyà Yesù Kilistò, bukolè bwà Yesù Kilistò, dimanya dyà Yesù Kilistò, didikanda dyà Yesù Kilistò, lutùulù lwà Yesù Kilistò, difwàna dyà Nzambì dyà Yesù Kilistò, dinangangana dyà bwànà bwètù dyà Yesù Kilistò, ne dinanga dyà Nzambì, didì Yesù Kilistò. Yèyè ùdì Mutù ne ùdì ùkukòntonona wèwè. Ne makàsà èbè ki cishimikidi ciinè, diitabuuja. Amen! Mukòntònyiiibwe kùdì Mutù, bikèngela...?..S’ki bwalu mbwòbù abu. Kì muntu mupwàngàne wa Nzambì nyèyè awu, mpàdiye ne makolè aa.

<sup>352</sup> Dìbà adi, Nzambì, mwikàle uleeja mpàla wa Èkèleeziyà Wèndè bu Mukàjì-Musèla, muntu mukàjì. Nzambì ùdì

ùleeja mpàla wa Èkèleeziyà Wendè bu Mukàjì-Musèla. Ne mùshindù ùdiYe ùfikisha muntu ne muntu nkààyà ku diikala mwan'Èndè wa balùme, bwà kubwelayè mu Mukàjì-Musèla awu, Yéyè mmupicishile kàbìdì Mukàjì-Musèla mu bikondo ebi, [Mwanèètù Branham ùdi ùtapa mapi ku cibàsà cyèndè cyà kufundila aci misangu mwandamutekète—Muf.] too ne pààbwejàYe Èkèleeziyà ewu mujimà mu *eci*.

<sup>353</sup> Makàsà àànyì adi ànyunga. Bwà cinyi? Bwalu mutù wànyì ùdi wàmba nàнку. Mpindyewu, kaèna mwà kunyunga bu cyanza cyànyì to, bwalu ôwò mmakàsà àànyì. Luther kèna mwà kwenza bintu bitùdì twétù benze to, anyì ba-Méthodistes kabèena mwà kubyenza to, bwalu bòbò bàvwa cingà cintu. Nwamònu anyi? Makàsà adi ànyunga bwalu mutù ùdi wàmba nàнку. Kàdi mutù kawèna wàmbakù ne: “Mpindyewu, nwènù makàsà, shààlaayi cyanza. Wèwè dicitì, shààla mèsù to.” Nwamònu anyi?

<sup>354</sup> Kàdi, mu cikondo ne cikondo cyònsò, Nzambi ùtu mutèèke bintu ebi mu Èkèleeziyà Wendè, ne mmutèèke citembelu pa kuleeja ne muntu nkààyà yònsò ikalè ne bintu ebi, ikalè ne ngiikadilù eyi bu yèndè yéyè. Nènku *ewu* Muntu, pàakùmbananganàbi cishiki, ng'Èkèleeziyà wa Nzambi uyààya mu Dyambwibwa awu. Nènku *ewu* muntu, pàakùmbananganàye cishiki, mmusadidi wa Nzambi, mu Èkèleeziyà wa Nzambi, wìkala mwà kuya mu Dyambwibwa. Butimbi's we! Nwamònu cìndi njinga kwamba aci anyi? S'ki bwalu mbwòbù abu. Ki cintu cyònsò mu kaabujimà ncyòci aci.

<sup>355</sup> Muntu nyéyè *ewu* ulwa, Pòlò, wènda ùtèèka cishimikidi. Irénée kubangaye kupòngolwelapù *eci*. Wàlondù pèndè kulwa kupòngolwelapù *eci*. Wàlondù pende kupòngolwelapù *eci*. Wàlondù pèndè *cyàcyà*, ne *cyàcyà*, ne *cyàcyà*, ànu nàнку too ne pàdìbi bifika ku cikondo cyà ndekeelu. Kàdi ncinyì aci? N'Nyumà umwèumwè awu.

<sup>356</sup> Nyumà umwèumwè udi musòmbèle munda mwànyì awu, ùdi wàmba ne: “Nwènù byanza, olòlòkaayi nùkwatè kashèètè kàka.” Nyumà umwèumwè awu wàmba ne: “Nwènù makàsà, elààyi cidya.” Nudi numòna cìndi njinga kwamba aci anyi?

<sup>357</sup> Dìbà adi, cipidì cijimà cyà buumùntù bwèbè ncilombola ne cikòntonona kùdì bintu biinè ebi, kàdi kaciyèna mwà kukòntònonyiibwa mu kaabujimà to pàdici kaciyi ne ngiikadilù eyi yònsò nkòong nànsha.

<sup>358</sup> Kacya nukàadikù buumvwe bwalu ebu anyi? Mpindyewu anyìshaayi nnwàmbilè cyòci *eci*. Nènku shààlaayi menemene. . . Tèèkaayi bwalu ebu mu dicitì dyènù didi diteeleja adi. Nwamònu anyi? Bukole bwà munyòòlolò mpa dinungu dyàwù didi ditàmbe kuteketa adi. Aci ncyà bushùwà. Kawèna ne bukole butàmbe bwà dinungu dyàwù didi ditàmbe kuteketa adi to.

<sup>359</sup> Bintu *ebi* nànsha byòbì biibaka bikolè munyi, *eci* nànsha ciibaka munyi; piikalàci ne dinungu ditekète, pa dyòdi adi ki

pàdici cikòsekela. Ne kacyèna ne bukolè butàmbe bwà dinungu didi ditàmbe kuteketa adi to. [Mwanèètù Branham ùdi wènzà kutangija bantu ku dizòla dyèndè didi ku cibàsà cyà difundila adi—Muf.] Mpindyewu pawikalà naabi, wamba ne udi ne *eci*, *eci*, *eci*, kùyi ne *eci* to, mwaba awu ki ùdici cikòsekela. Wèwè ne *eci*, kàdi kùyi ne *cyàcyà* to, mwaba awu ki wàkòsekèlaci. Wèwè ne *eci*, kàdi kùyi ne *cyàcyà* to, necikoseke. Ne *eci*, kàdi kùyi ne *eci* to, necikòseke. *Eci*, kàdi kùyi ne *eci* to, necikòsekè. Nwamònu anyi? Nènkù wèwè kùyi. . . Kwèna mwà kwikala ne *eci* kùyi ne *eci* to.

<sup>360</sup> Nènkù paùdi ulàmbula buumùntù bwèbè bwònsò nkòong, díbà adi kaayi Nyumà Mwímpè ùdi ùpòngoloka munda mwèbè, mu makolè aa, ki paùdi ushààla tabernacle udi ne mwoyi. Díbà adi bantu badi batàngila bàmba ne: “Wàwa kadi ki muntu udi mùle tètè ne bukolè, dimanya (mwitabuuje Diyì), didikànda, lutùlù, difwànà dyà Nzambì, dinangangana dyà bwànà bwètù, mùle tètè ne dinanga dyà Nyumà Mwímpè. Monaayi, nyèye wàwa, wènda wèndakana.” Ncinyi aci? Cipidi cidi beena bupidya mwà kutàngila kwamba ne: “Kàdi ki mwena Kilistò wàwa. Ki mulùme nyèye wàwa, anyi mukàjì, udi mumanyè bìdiye wàmba. Kacya kanwènakù banji kumòna muntu mwikala ne kalolo, ne bupòle, ne difwànà dyà Nzambì mumutàmbe to.” Udi mutwìbwe cìtampì. Cìtampì citu cidileeja nseke yònsò yìbidì. Nànsha uya nànsha ulwa, udi umòna cìtampì mùshindù ànu ùmwèùmwe awu. S’ki bwalu mbwòbù abu. Nwamònu anyi? Pàdi mulùme anyi mukàjì mwikàle ne *eci*, ki pàdi Dibwe dyà mùsongà dipweka òmutwà cìtampì dimubweja mu Bukalenge bwà Nzambì, ki cidi Nyumà Mwímpè.

<sup>361</sup> Díbà adi Diyì, dyùùmukila *Apa*, didi diDimwèneshila mu umwe ne umwe wa ku bantu aba, nwamònu’s, ne didi divwija Muntu mukùmbànàngàne cishiki ewu Tabernacle wa Nzambì udi ne mwoyi, cileejilu cyà bwena Kilistò, ciikàle cyènda ne ciikàle ne mwoyi. Cìvwà Kilistò aci, ki cidi bantu aba, bwalu Mwoyi Wèndè udi munda emu. Bòbò badi munda mwà Kilistò. Ne mwoyi wàbò mmufwè ne musokoka mu Kilistò, kupicila kùdi Nzambì, ne mutwà cìtampì mwómò amu kùdi Nyumà Mwímpè. Kolintò wa Kumpàla 12. Ncya bushùwà. Nwamònu anyi? Udi wèwè mwine udibala bu mufwè, díbà adi udi mulediibwe ku diitabuuja. Pashiishe bukolè ne bikwàbò bintu ebi bìdi bisàkidiibwa kùdi too ne paùdi ulwa cimfwànyì cyà Nzambì cipwàngàne, cidi ne mwoyi. Mbilenga anyi?

<sup>362</sup> Ne pashiishe Nzambì, ku cyòci aci, mmutwàle kàbidì Bikondo Mwandamutekète byà Èkèleeziyà, bwà kuleeja bibàndilu mwandamutekète bìdiYe mutwàle, mwikàle wìbaka muntu nkààyà Wèndè umuvwija mu cimfwànyì Cyèndè, Yèyè wìbàkì Èkèleeziyà mukùmbànàngàne cishiki mu cimfwànyì Cyèndè. Nènkù ku dibìika dyà ku lufù, Mubidi mukùmbànàngàne mujimà ewu netjuudiibwè bwà kwikalawù



ne mwoyi kashidi pàmwè Nendè, bwalu m'Mukàji-Musèla. Nwamònu anyi? Nànku aci cidi cyàngata cikondo ne cikondo cyònsò, cikondo ne cikondo cyònsò cidi cilwa aci.

<sup>363</sup> Nènku kùdi byàbúngì bìdi bilòmbiibwe, nwavùlùkaayi. Nudi bavùlùke cidi Pòlò mwámbe mwaba ewu mu Ebèlù 11 emu anyi? Anyìshaayi nnuhadilekù cintu kampànda kumpàla kwà twètù kwoya mwab'ewu, kasunsa kàmwè cyanààna. Ne pashìshe nwènù. . . Cidi cyènza ne nùdyúmvwè mu mùshindù wà dikèma pàndì. . . misangu yònsò, pàndì mbala cyòci eci. Ndi ngàngata Ebelu 11, ne ndi mbangila ku mvensà wa 32.

*Ncinyi ckwàbò, ncinyi ckwàbò cingàmbà? Bwalu dibà ndifwànyine kunkèèpa bwà kunulondela bwà Gidèòna, . . . bwà Baalaka, ne . . . Shimìshòna, ne . . . Yafètè; . . . Davidi. . . ne Samwèlè, . . . bwà baprófètà,*

*Bàvwà ku diitabuujà bavwije makalenge mwìnshì mwà bukòntononyi bwàbò, bavwije bwakàne, bapete mulayi, bakànge mukana mwà nyamà yà ntambwe,*

*Bajime lwonji lwà kapyà, bapàndùke ku mwelè wà mvità, ne bumùshùbwe ku butekète e kuvwijiibwa bàà bukolè, balwè ne bukitù bubàndile mu dinyeema, banyeemeshe. . . bilwìlu byenyi..*

*Bakàji bàakapeta bafwè bààbò babìshùbwe ku lufù: . . . bakwàbò bàakapìcila mu dikèngeshiibwa, bóbò kukèngeshiibwa, kabàyi bìitaba disungidiibwa to; bwà bààmòna mwà kupeta dibùshùbwa dyà ku lufù ditàmbe bwìmpè:*

<sup>364</sup> Lwà kwìnshì eku emu. Nwamònu anyi? [Mwanèètù Branham ùdi ùbàtàngija ku dizòlà dyèndè dìdì ku cibàsa cyà difùndila adi—Muf.] Eyo.

*Ne bakwàbò bàakapeta mateeta. . . bàakasekiibwa ne lwonji lwònsò. . . batuuciibwe ne mfimbù, èyowà, kàbìdì. . . nkanu. . . bùlokò:*

*Bàakaashùbwa mabwe, bàakakòshùbwa bitùpà ne ma-scies, bóbò kuteeciibwa, bóbò kushipiibwa ne. . . myelè yà mvità: bàakalalakana bìikàle bavwàle bisèbà byà mìkòòkò ne bisèbà byà mbuji; babànyenge bintu byàbò byònsò, ne babàbweje mu lutàtu, ne babàkèngeshe;*

*(Bóbò bàvwà pànwàpa kapàyi pabàkànyine:). . .*

<sup>365</sup> Wamònu's, mu tubòko amu, wamònu mu Bible webè.

*. . . bàakalalakana mu bipèlè, ne mu mìkùnà, ne mu meenà à nyamà ne mu nyòngòlò yà buloba.*

*. . . bònsò aba, bamane kupeta bujaadiki bwìmpè ku diitabuujà, . . .*

366 *Apa!* [Mwanèètù Branham ùdi ùbàtàngija ku dizòlà dyèndè didì ku cibàsà cyà difùndila adi—Muf.]

*...bujaadiki bwîmpè ku diitabuuja, kabààkapeta mulayi to: (Nwamònu anyi?)*

*Nzambi mwikàle mutùlongòlwèle twètù cintu kampànda cyà citàmbe bwîmpè, bwà bóbò kabavwijiibu bapwàngàne twètù katùyiku to.*

367 Nwacyũmvù anyi? Bantu bàfwilè aba, emu *emu*, bwalu bwàbò mbulàale kutùdì ne bóbò biine mbatwìndile twètù. Pa nànkù, bidi bikèngela Èkèleeziyà *ewu* àfikè ku bupwàngàne, bwà kumònayè mwà kuvwija dibiikà dyà ku lufù. Ne bóbò bàdi mwinshi, misùukà yidi mwinshi mwà cyoshelu ayi, mindile bwà Èkèleeziyà ewu àfikè ku bupwàngàne Bwèndè, bwà pààlwà Kilistò cyà bushùwà.

368 Nènku Èkèleeziyà ewu, nudi numòna's, ùdi wènda ùshàala mutàmbe bukesè, mu bukèèpèlè. [Mwanèètù Branham ùdi ùbàtàngija ku dizòlà dyèndè didì ku cibàsà cyà difùndila adi—Muf.] Mmutàmbe kusongoloka kupita aci, kàdi ànu bwà kufùnda lwàlwa luseke mwaba wàwa, nwamònu's. Mbibànde bikafike too ne ku lusongo lwà kashingì. Mu mùshindù wà ne, Èkèleeziyà, mu bukèèpèlè amu, bikèngela àbwele mu kaaba kampànda too ne pààshààlaye mu mùshindù ùmwèumwè wà mudimu wà bwambi ùvwà *eci* cishiye, bwalu, pàapinganà Dibwe dyà Mùsongà edi . . .

369 Didi ne kantu bu kampaaya kakesè *apa*, mwikalàdi mwà kulwa kusombela ànu mwómò amu menemene, pa cipaapu cyà musàkà cyà ciibidilu. Kacyèna ànu mùsongà ùdi musòmbe eku ne eku kwà lusongo to. Nkaamubàngùbangu kakesè, nènku bikèngela disombè mwaba awu, bwalu didì dipòngolola màyi.

Nènku pààlwàdi, bikèngela Èkèleeziyà ewu ikalè musongoloja.

370 Byònsò ebi, mabwe makwàbò à mu cipaapu cyà musàkà aa, mmatèekiibwe mu mùshindù mupwàngàne wà kùyì mwà kupicisha kapaaya munkaci mwàwù to, à bujitu bwà binunu byà kilò, matèekiibwemù. Mùshindù mwine wàkaabàndishàbo kwine kuulu kwàka, kî mbamanye to. Kàdi's byàkiibakiibwa.

371 Nènku lwà kuulu *eku*, pààlwà cyà bushùwà Mùsongà wà cipaapu cyà musàkà, cipaapu cyà musàkà cyòci ciine, Mubidi wà Kilistò bikèngela wikalè musongoloja. Kabiyi ànu twitabàayi anyi dilongesha kampànda, anyi cintu kampànda cikwàbò citùdi bapicilemù to. Nebikèngelè kwikalaci cifwàngàne ànu menemene ne Kilistò, mu mùshindù wà ne, pààlwàYe, Yéye ne mudimu wà bwambi awu nebiiikalè bakùmbànàngàne ànu patapata. Nwamònu anyi? Dìbà adi Dyambwibwa nedilwe, lwendu lwà kuya Kwètù.

<sup>372</sup> Tàngilàayi mwaba utùdì twètù tusanganyiibwa ne mwoyi mpindyewu, mu Laòdikiyà, mùvwà èkèleeziyà mwikàle cikondo cyà èkèleeziyà citàmbe bubì citùbo kacya bààpeta. Mu Bible, tudi tusangana ne, ki cikondo cimwèpelè cyà èkèleeziyà civwà Nzambì usanganyiibwa pambèlu pàà èkèleeziyà, ùkòòkola, ùteeta bwà kwalukila mu nzùbu Wendè sungasunga. Twitabàayi ne màngumba bikaavwa mene biMwipàte mu èkèleeziyà Wendè sungasunga. “Mònaayi, Ndi mwimàne ku ciibi nkòòkola. Muntu yèye ne nyòòtà ne munzùlùle ciibi, Mémè nèmbwelè, ndyè nendè didya dyà dilòòlò.” Nwamònu anyi? Ki cyòci eci, mu eci cikondo cyà èkèleeziyà. MbaMwipàte pambèlu ku kakesè ku kakesè, ne mwálubi kwenzeka ne *apa* bààMwedì pambèlu kashidi. Kabèèna kabìdì naaCì bwalu to.

<sup>373</sup> Mpindyewu nudi numòna leelù ewu kutùyaaya. Nànsha mùkaadi ndekeelu mwine wa Cikondo cyà Èkèleeziyà cyà Laòdikiyà mushààle ànu wa mmwènekeli wa kwìsùkwìsù, mu mùshindù wà ne cyòci ne cyena Kàtòlikè, ciine cidi cicikosolole lwà munda *emu* aci, mbibange kudisanga ne kudishiya cintu cimwè bilwè mu èkèleeziyà ùmwèpelè munène. Ne nsangilu wa maèkèleeziyà, cidi ànu cintu cimwècimwè cidi cyena Kàtòlikè aci.

<sup>374</sup> Kùdi dishiilàngana ànu òmwèpelè, bu bòbò mwà kutàmba ciine aci, ndyangata dyà kòòmunyò. Ki cintu cimwèpelè mu dyòsèzè cidi—cidi—cidi cìpangishà cyena Kàtòlikè ne cyena Mishònyì bwà kudisanga ncyòci aci, ndyumvwija dyà cidi kòòmunyò. Èkèleeziyà wa Kàtòlikè ùdi wamba ne: “Mmubidi.” Kadi èkèleeziyà wa Mishònyì yèye wamba ne: “Ncimfwànyì cyà mubidi awu.” Kàtòlikè ùdi ufùka misà mwimànyinepu. Misà yòyi, yidi ne, bàdi bàngata nkòòmunyò, batekemene ne mbafwidìibwe luse. Mishònyì udi yèye umwangata ku diitabuuja, beela Nzambì twasàkidila ne, mu nkòòmunyò, mbafwidìibwe luse. Mishònyì ùdi wamba ne: “Tudi bafwidìibwe luse.” Kàtòlikè ne: “Tudi ne ditèkemena ne tudi bafwidìibwe luse.” Misà ne nkòòmunyò. Bàdi bàcibiikila bòbò ne mmisà; twètù tudi tucibiikila ne mmèsà à Mukalenge. Misà nkutèkemena kwà ne bìdi nàнку, kàdi kuMwela twasàkidila bwà ciine aci. Nwamònu anyi? Nènku ki cintu cimwèpelè cidìbo kabàyiku mwà kupetelanganapu ncyòci aci. Nebàpetangane.

<sup>375</sup> Kaa, cimweka cilenga be. Necìdisàngè, bwà kusaka... Necì—necisakè bònsò... Èè, Bible’s mmwàmbe ne: “Ne nyama eyi yàkapà ndumbà awu bukòòkeshi bwàyi,” nwamònu’s, midisange pàmwè. Nwamònu anyi? Ànu menemene cyàkambà Bible ne nebènzè aci, ki kucyènzabò mpindyewu eku. Cidi munkaci mwà dyenda dyanzeka, mu lumingu lwine elu. Kì mbyenze bu ne ndi cilumbu ne beena Kàtòlikè to, anyi mene ne beena Mishònyì biine to.

<sup>376</sup> Nwènu ba-Méthodistes ne ba-Baptistes, ne bààbùngì bèènu

nwênù beena Mpenta, pàdi èkèleeziyà yènù mikabwele mu nsangilu ewu wa maèkèleeziyà, pìbàkishibu nzùbu awu munène wa bitàlù mu New York mwàmwa apu, wa nsangilu wa maèkèleeziyà awu's, bidi ànu mwomùmwè ne mu Matùnga Masanga ne bikwàbò. Bâteeta kusanga cyena Mishòònyì cyònsò pàmwè.

<sup>377</sup> Mpindyewu, beena Kàtòlikè bàdi ne lungènyi mu cintu aci, nènku nebàvwijè Paapà Jean wa makumi àbìdi ne mwisàtù awu, anyì wa makumi àbìdi ne mwibìdi, nànsha ní ngwa yìngà, ùdi ùteeta, mu mùshindù wà panshìpanshì, wa didìpwekesha, bwà kufikisha diitabuujà dyònsò dyà Mishòònyì ne diitabuujà dyà Kàtòlikè ku diitabuujà dimwèpelè, ànu menemene cidì Bible mwàmbe ne nebènzè aci. Ki bwalu mbwòbù abu's. Ne beena Mishòònyì bàkapiika ku ciine aci, kumina ndòbo, nshinga, too ne cidiiidi.

<sup>378</sup> Bwà cinyì? Bwà cinyì? Bwalu kabèèna ne bintu *ebi* to. *Dimanya*: “Dìyì ndilelèlà.” *Lutuùlù*: “Aba bàdi bìndilà Mukalenge.” Nwamònu cìndi njinga kwamba aci anyì?

<sup>379</sup> Bu cìvwà mwèpiskòpò wa ba-Méthodistes awu mwàmbe ditùkù adi, pàvwàbo bapicìshe cyòci aci. Ne muntu yònsò mmumanyè aci, mùshindù kaayi, cìvwà cicìsonsòle ciine aci, bâteeta bwà kwenza ne disambila kampànda diikalè dyà kusambila mu èkèleeziyà, anyì mu tùlaasà. Nènku biikàle bàkèba. . . Ngeela meeji ne cìvwa mmukàndà wa masambila wa ba-Presbytériens, anyì cintu cikwàbò kampànda, nènku baledi kuya kafùnda ci—ci—cilongelu aci ku tubàdi bwalu kabàvwa biitaba disambila adi bwà kudisambilabo mu tùlaasà nànsha. Nènku mwèpiskòpò wa ba-Méthodistes ewu ùvwa mukùlumpè wa lungènyi, yèyè kjujuuka kuulu e kwamba ne: “Mbibi.” Yèyè ne: “Aci cidì cibèngangana ne dìyì dikùlù dyà ditùnga.” Ùkaavwa muumvwe minungànyì pa bwalu abu. Yèyè kwamba ne: “Bu mùdi mu èkèleeziyà wetù wa ba-Méthodistes,” yèyè ne, “bààbùngì bèètù bàtu ànu bààkulaakula misangu yònsò bwà cilèndwishì cyà Hollywood, kàdi nànsha nànkù's byà pa lukàmà makumi citèèmà ne bitaanu byà bantu bàtu bàyamu bwà kubandila cyòci aci.”

<sup>380</sup> Bwalu bùdi cinyì? Mbashiye *eci* ku luseke. Ncyà bushùwà. Bashiye cyàcyà ku luseke.

<sup>381</sup> Mvwa ngàakula ànu apa mu nzùbu emu, ditùkù adi, ngambila mwi—mwi—mwimikila majitu wa umwe wa ku èkèleeziyà mitàmbe bunène ya ba-Méthodistes yidiku mu Falls City, umwe wa ku èkèleeziyà yidì mitàmbe kwikala yà nyumà yà ba-Méthodistes yidiku mu Falls City. Ndeaja ne, cikondo cyà ba-Méthodistes ncìdi cìlwa citwàngàne ne cyètù cikondo mwaba wàwa, cyà beena Mpenta. Ki yèyè ne: “Mu St. Louis, Missouri, mbènze ditaata, kùkaadi ngondo yisàtù anyì yinaayi, bòbò kujandula bwalu.” Muntu awu ùdi mwà kwikala musòmbe

kaaba aka mu dindà emu. Èè, yêyè's mmwenji wa makumi à byà dyasa naabi nzùbu udi wibaka nzùbu ewu, utùlongolwela citanda eci. M'Méthodiste wa mu Main Street, mutùye yêyè, mùvwà Mwanèètù Lum mwikàle mpaasàtà ne bakwàbò. Pa nàнку tudi tusangana ne, mu cyôci aci, ngeela meeji ne cìvwa mmakumi mwandamutekète ne byà mu njila pa lukàmà byà ba-Méthodistes mu ditaata kampànda, diikàle ne, mmwènu mucinka wa mu St. Louis, ùvwa uleeja ne ba-Méthodistes makumi mwandamutekète ne byà mu njila pa lukàmà bàtu bànwà mfwankà, ne makumi àsambòmbò ne mwandamukùlù pa lukàmà bàà kùdìbo bàtu bànwà maala à kapyà. Méthodiste wa bushùwà ewu! Kàdi cìvwa cikèmeshà cìvwa ne, pààkenzàbo ditaata adi, anyi dicinka pankaci pàà balùme ne bakàji; bakaji, bàvwa makumi mwandamutekète, makumi mwandamutekète ne byà mu njila pa lukàmà, pàvwàku bu makumi àtaanu à balùme pa lukàmà. Bakàji bàtù bànwà mfwankà ne maala bàvwa bapìte balùme ku búngì. Makumi mwandamutekète pa lukàmà, makumi mwandamutekète ne byà mu njila pa lukàmà, bakàji bapìte balùme ku búngì.

<sup>382</sup> Kàdi mpindyewu bu twètù mwà kuya ku Dilongesha dyà Bible dyà pa divwàlà dyà tùpùtulù, ne dibebula dyà nsukì, ne bintu byà mùshindù awu, nwamònu's, ku difwànà dyà Nzambì, bakàji bàlaka mukana bàmba mùdìbo ne difwànà dyà Nzambì ne cijila? Manaya à twarta ne bikwàbò, beena kabwabwa, beena làbàlàbà, kabàyikù mwà kukumbana mwà kulama ludimì lwàbò bóbò biine. Ludimì lwàbò bóbò biine lùlàbakana lwikàle ne kabwabwa, batwa eku batwa eku. Kàdi citwàmbà ncinyi bwà balùme? Manàya à twarta, manàya à golf, bàpàtuka kwine aku bavwàle bu bàdi kabàyi bavwàle, bavwàle tulàmbà twà mmwènekelu wa bukooya, ne bakàji abu kacya ànu bààlamakanangana naabò kuntwaku. Kabyèna bikèmesha to!

<sup>383</sup> Nwamònu cilukabatà cidìbo balukile muyiishi awu, muyiishi wa mu màlokò, mu dindà emu anyi? Èyowà's, mukalenge. Mémè ncyèna ngiitabuuja ne muntu awu mmupiiile mu bwalu abu to. Mbyènze cinyi? Mmwaneètù awu. . . Ncyèna mvùluka dyèndè. . . [Muntu mukwàbò ùdi wàmba ne: "Dan Gilbert."—Muf.] Èyowà. Dan Gilbert, muyiishi wa mu màlokò. Pààbwedi muntu awu lùbilu kushipa Dan, kwènji ndambù wa ngondo, ne mpindyewu mukajèndè nyàwù ùkaadi pa kulela. Mu bushùwà bwà bwalu, Dan mmufwè, kabèena mùshindù wà kwela mpindyewu mwànà wa mu dibòko awu mashi mu mijilu to. Mukàji awu ùdi wàmba ne Dan ùvwa mumukwàte ku bukolè mulaale nendè, ne ngwendè yêyè. . . "Ne mwànà awu ngwa Dan." Cintu cyà mùshindù wa. . . Mémè ncyèna ncìitabuujakù to ànu bu mùndì ncìyikù ngiitabuuja ne ci—ne ci—cikòlolo cìtu ne masàlà à nkudimba. To, mukalenge. Ndi mémè ngiitabuuja ne mmafi. Ndi ngiitabuuja ne Dan Gilbert ùvwa muntu wa Nzambì. Ne ndi ngiitabuuja ne ncilukabatà cyà dyabùlù.

384 Bu cintu aci cìvwàbo bateeta kwenzeja bantu pa bìdì bitàngila masambila awu aci. Mwèpiskòpò wa kale wa ba-Méthodistes—wa ba-Méthodistes awu ùvwa ne meeji matwè makùmbàne bwà kuumvwa cyôci aci. Bu yèyè mwitabe, bu cyôci aci cidìdinge ànu ciitàbùbwe, aci's cìvwa ànu cintu cisonsola kùdì cintu cikwàbò. Ncyà bushùwà.

385 Ànu bu mùdì bwalu ebu bwà disungulujangana dyà mu Sud mwàmwa edi, s'ncintu ànu cìmwècimwè aci. Mémè ndi ngùitabuuja ne bìvwa bìkèngela bantu biikàle badishikàmine. Ndi ngùitabuuja ne ditùnga edi ditu ditwa budishikaminyi nyama ku mikòlò. Ncyèna ndyula Mukalenge Kennedy bwà pàvwàye mutùme bàsàlaayi kwòkò aku to. Nànsha nàнку, mémè ncyèna mu—mu “mwena new deal,” ne ncyèna Démocrate to. Mémè ncyèna Républicain to. Ndi mwena Kilistò. Pa nàнку ndi. . . Kàdi ncyèna ngùitabuuja cyôci aci to. Ncyèna ngùitabuuja ne bantu bafìike bàvwa ne cyà kupàana bwanaàbutè bwàbò ku cintu cyà lukutukutu bu nàнку to, nànsha nàнку. Cìvwa—cìvwa nkasumbù kàà cidìidì kàà ba-Républicains. Mashi à Abraham Lincoln àkapeèsha bantu abu budishikaminyi bwalu yèyè ùvwa muntu wa difwàna dyà Nzambi. Ngeela meeji ne bìvwa bìkèngela kushàalabò nànsha bakwàte ku kasumbù kààbò kàà cidìidì piikalàbo bajinga kwenza masungula.

386 Kàdi nyawu nzwàmabila cintu cìmwèpelè, mwànà wa balùme awu kàvwa mwômò amu ànu bwà aci, bwà bilongelu byàbò to. Mwànà wa balùme awu's mmwena ntanda. S'mmwena Àmèrikè. Budishikaminyi ebu's mbwà bònsò. Dikòbà dyà muntu kadyèna ne cyà kushintulula dishiilàngana dyèndè to. Twètù bònsò. . . “Nzambi,” mùdìbi byamba, “ku muntu umwe, wàkenza mashi ónsò, matùnga ónsò.” Twètù bònsò tudi umwe. Kàdi, mwànà wa balùme awu, s'ùvwa mùsàlaayi. Yèyè's nkòlomù. Wàkalwà mvità bwà cidì cijaalàme. Ùvwa ne bukenji bwà kuya mu kàlaasà. Aci ncyà bushùwà. Kàdi's ùvwa ne bilongelu byàbùngì kùvwàye mwà kuya.

387 Ki cintu ncyôci aci. Wèwè muswè kulondesha bwalu abu, ncintu cyà lukutukutu cyà cyena màngumba cyà matùkù àdì panshì apa aa, ki cidì cisonsolà bwalu abu. Bwà cinyi? Bàdi benza bwà ne tukàndà twà masungulangana twà bantu bafìike atu bàtùumusha kùdì ba-Républicains bààtùtùma kùdì ba-Démocrates, kàdi bàdi bàpàanyisha bwànaàbutè bwàbò mu kwenza kwà nùнку. Mbulelèlè ànu bwètù bwà menemene ebu. Nyumà Mwimpè kèna mwab'ewu. . .

388 “Ewu udi ne lungènyi.” “Ewu udi ne dimanya.” Menemene. Ànu mùdì èkèleeziyà ewu, mu cikondo cyà mpindyewu eci, mwikàle ùdìpàanyisha yèyè mwine. Kanwènaayiku mwà kumòna cìikalà mwà kwenzeka anyi?

389 Kì mbwalu to nànsha bakwàte eci pa mikàbà yà mèyì. Ki cyôci cilwalwà eci. Uh-huh. Eyowa. Bwalu budi cinyi? Màmù

wanyi mukùlakàjì uvwa ànu ne ciibidilu cyà kwambamba ne: “Pèesha dyabulù bìdì bu byèndè.”

<sup>390</sup> Kùdi muntu ùmwèpelè udi mwenze cintu cìmwèpelè cìdì cyà meeji, n’Castro wa kwinshi kwàka awu. Èyowà’s, mukalenge. Yèyè mmupweke ànu kwinshi kwàka. Ne ba-capitalistes pààbò bàvwa ne myenge yònsò ne byònsò bìvwa...kwàka bàtu pa cipiminu cyà ngòlò, bu mùdì États-Unis. Cyàkenzàye ncinyi? Yèyè kusùmba mikàndà yà mpetu yònsò ayi. Yèyè kupeta mfranga mu mùshindù wònsò ùvwàye mwà kupeta awu. Cyènjìye pashishe ncinyi? Kutentulaye lupetu alu, ne kulushintula. Kulupingajaye mu bantu. S’ki cintu cìmwèpelè cìdì ditùnga edi difwànyine kwenza.

<sup>391</sup> Nuvwaku batèeleje cisanji cyà *Life Line* dindà dikwàbò adi anyi? Mòna’s, nudi bamanyè’s, mbyenze ànu bu wèwè mwikàle usùmbisha mikàndà yà mpetu pa ngòlò. Mikàndà yà mpetu mmimana kwangulula. Nènku ebu bukalenge bùdiku mpindyewu ebu bùdì bùtùùla mfranga bwà cinyi? Bwà mfranga yà bitàdì bìikalàbo mwà kufucisha paanyimà pàà bidimu makumi ànaayi kubangila ku mpindyewu. Bwalu bwà ditùnga edi mbutùùke. Aci nisanji cyà *Life Line* cyàkwila mu Washington, DC, cyàmbila ditùnga dijimà. Mfranga ya bitàdì, yidìbo batùùla, badyènzeja bwà kusùmba bulundà bwà matùnga meenyi...Èè, s’bàdì ànu bàyààbanyinangana cyanààna nànsha nànku. Kanwènaayiku pèènu numòna anyi? S’ki cyòci aci menemene ciikalàbo—ciikalàbo mwà kwenza. Nwamònu anyi? Ncinyi ciine aci? Mpindyewu, ditùnga edi dyòdì dikùlùke, cintu cìmwèpelè cìdìdì mwà kwenza nkukuluka. Cintu cìmwèpelè cìdìdì mwà kwenza nkubwela mu lukòtà.

<sup>392</sup> Ki cintu cìmwèpelè cyà meeji cyà kwenza, nkushintulula lupetu. Kàdì bòbò kabààkucyènzakù to, mu bukalenge bùdiku mpindyewu ebu. Èkèleeziyà wa Kàtòlikè wa cyena Loomò ngudi ne ngòlò yònsò wa pa buloba mu byanza. Nènku cyènzà bàà mu ditùnga edi nkudisumbisha: “Bantu babanji aba,” ne bakwàbò, “bàà pa buloba,” bu mùdì Bible mwàmbe. Nebènzè cinyi, kumpàla kwà kujimijabò, Cyapù cyà Mfwankà cyà Brown ne Williamson, pàmwè ne bònsò’s mbeena Kàtòlikè, twamb’eku twamb’eku, ne bikwàbò bintu byònsò ebi, cyènzàbo ncinyi? Nebiitabè cyòci aci, ne nebàngatè mfranga ya kùdì Loomò, ne dìbà adi ditùnga dyàmanyi kupàànyisha bwànààbute bwàdì bwine. Loomò ùdì ùdìtwa nyama ku mikòlò. Èyowà’s, mukalenge. Neàdìtwè nyama ku mikòlò. Nènku bàdì munkacì mwà kupeta ndambù mukùmbàne wa mikenji mpindyewu, biikàle bapeta ndambù wa bantu mukùmbàne mu nyungulukilu wabò, bàbàbweja mu nzùbu wèndè wa mudimu. Tàngilàayi cìdì Mukalenge Kennedy ulòmba.

<sup>393</sup> Nènku panwàmònu cyòci eci, ditùkù adi, kabicyena bikèngela kabìdì kwela tukàndà twà masungula to. Dyela dyà tukàndà twà masungula didi ne mushinga ku cinyi? Nyàwù

ne, bāmanyi kucifūnda mu cibèjibeji, kucijaadika kumpàla kwà bōnsò, kàdi kubènga bwà kwenza ní ncinyi ní ncinyi pa bwalu abu. Nyāwù ne, bājaadiki patòòke ne māshinyi ònsò à mu ditūnga dijimà àkàāvwa mamananà kulongolola, bwà ne mbasungule Mukalenge Kennedy ku disungula dyà mafi. Bible kī mwambekù ne yēyè neapitè ku diibila anyi? S’ncyà bushùwà, masungulangana à mafi. Mpindyewu, ncyèna ndwisha kasumbù kàà cidiidi kàà ba-Démocrates anyi mene kàà ba-Républicains to, kàdi cindi ndi nteela ànu maalu a mu Bible. Disungulangana didi ne mushinga kaayi? Bòbò nyawu bamanè kumanya ne wapita nkampànda.

<sup>394</sup> Mbanganyi bàdi bavùlùke bwalu bwà ku tudyombà twà ku ntèlèviziyò buvwà buleeja bakàji bàbìdi biimàne? Umwe kwamba ne: “Mémè nēngèèlèlè Mukalenge. . .” Anyi, mukàji mwena Mishònyì wamba ne: “Mémè nēngèèlèlè Mukalenge Kennedy.”

Bòbò ne: “Bwà cinyi?”

<sup>395</sup> Yēyè ne: “Bwalu ndi ngeela meeji ne yēyè mmuntu wa meeji matwè kupita Mukalenge Nixon. Yēyè neikale Mfùmù wa ditūnga mutàmbe bwimpè.”

<sup>396</sup> Pashiishe awu ne: “Ewu mmukàji mwena Kàtòlikè. ‘Wèwè newèlèlè nganyi kakàndà?’”

<sup>397</sup> Yēyè ne: “Mémè ndi mwena Kàtòlikè, mwena Kàtòlikè wa cyena Loomò, mwena Kàtòlikè udi uneemeka bìdiye wamba.” Yēyè ne: “Nènku mémè nēngèèlèlè Mukalenge Nixon.”

“Bwà cinyi?”

<sup>398</sup> Yēyè ne: “Bwalu, ndi ngeela meeji ne Mukalenge Nixon neikalè Mfùmù wa ditūnga mutàmbe bwimpè bwalu mmwibidilàngane bikolè ne maalu aa. Mmutàmbe kumanya communisme bikolè.” Mukàji awu ùvwà mwambe cyà mafi.

<sup>399</sup> Mémè ndi ne *Ma- . . .* cidibo bàbìkila ne: *Malelela À Diitabuuja Dyètù*, mukàndà wa beena Kàtòlikè wà mutàmbe kwikala wà mushinga mukolè ùdiku muntu mwà kusumba. Nènku mbambemù ne: “Kwòkò kwikàle mwena Kàtòlikè pa dibèji dyà bàdi bafile mpàla bwà masungulangana, mwikàle ufwilakana ne mwena Mishònyì; mwena Kàtòlikè yēyè mudìdinge ànu mwelèle mwena Mishònyì àwu kakàndà, bàdi bāmwpata mu bwobùmwe bwà èkèleeziyà wa Kàtòlikè.” Ncyà bushùwà’s. “Kàdi kwòkò beena Kàtòlikè bàbìdi bāfwilakana nkwasà umwe, nebāsungule mwena Kàtòlikè udi mutàmbe kwikala wa lulamatu kùdi ‘èkèleeziyà maamù’ nènku bāmwelèlè tukàndà.”

<sup>400</sup> Nudi numòna mùshindù kaayi, ku diibila adi, cidibo bateeta kwenza anyi? Bààbanya mfranga, bwà kusumba’s. Bwa cinyi? Badi bateeta bwà kubinyanga. Ki cidibo benza, nènku ditūnga’s ndinyanguke. Nènku ncinyi aci? Bìdi pa cipiminu cya ngòlò.



Nènku èkèleeziyà wa Kàtòlikè, balombodi abu, bôbò's mbàdi ne ngôlo wa buloba bujimà. [Muntu mukwàbò ùdi wàmba ne: “Ndola miliyàlà binunu lukàmà ne makumi àsambòmbò ne mwandamukùlù.”—Muf.] Miliyàlà binunu lukàmà ne makumi asambombo ne mwandamukùlù. Kadi's ki bwalu abu. Biikàle bamupingaja ànu pa cipiminu cyà ngôlo, nenku nwènù nulama ànu nzùbu yènù ne bikwàbò, kàdi biikàle bantu bàà èkèleeziyà wa Kàtòlikè. Ditùnga dikaadi dyà èkèleeziyà wa Kàtòlikè. Cintu cyònsò mu kaabujimà bàkaadi bacibàkule ànu mwômò amu mu mùshindù awu, ku lupetu lwàbò bôbò. Bible kèna wàmbakù bwalu abu anyi? Ki cimfwànyì ncyôci aci cidi Bible ùtùzòlela's.

<sup>401</sup> Cìndì nteeta kwamba, mwanèètù wa balùme, leelù ewu. Nebàmbè ne: “Ki cyàmuvwija èkèleeziyà mulenga ncyôci aci. Neàsangishe cyena Mishòònyì kaaba kàmwè.” Cidi cimwèka cimpè bwà mèsù à musunya, kàdi dimanya dyà pa buloba ebu ndikùtākana ku mèsù kwà Nzambì.

<sup>402</sup> “Nènku byàkasànkisha Nzambì, ku—ku dikùtākana dyà diyiisha, bwà kusungila bàdi bajìmine,” ku mudimu wà Nzambì, uvwaYè mutèeke mu Èkèleeziyà Wendè, bwà kwibakila Èkèleeziyà pa ngiikàdilù yà nyumà eyi kabiyì pa cintu kampànda cidi citàngilà buloba nànsha.

<sup>403</sup> Peetelo mmwàmbe ne: “Nènku bwalu nudi bapàndùke ku dinyanguka dyà pa buloba didi difùma ku lukùkà lwà mfranga, ne lukùkà lwà bisànkasanka, ne masànkà, ne didyà, ne dinwà, ne lukùkà lutùdi naalu. Nudi bapàndùke ku byòbì abi. Ne mpindyewu nudi biibàkiibwe mu bintu bidì bitùlamà ne mwoyi. Èkèleeziyà ngùndì ngàmbila maalu aa,” mùdiye mwàmbe. Ki bwalu mbwòbù abu's. Nukààvwakù babibalè anyi? Nukààvwakù babyümvwè anyi? Nuvwa babyümvwè patwàbibadi kaaba aka mu Peetelo Mwibidì emu anyi? Tèelejaayi ànu cidìye wàmba apa, mùshindù ùdìbì bifùndiibwe bilenga byà dikèma muntwemu, mùdiye—mùdiye ùbyàmbe. Eyo. Mutèèlèjaayaaku mpindyewu pàdiye wàkula apa. Eyo.

*Peetelo, Simona Peetelo, musadidi ne mùpostòlo wa Yesù Kilistò, kùdi aba bàdi. . . bapete diitabuuya dyà musinga mukolè dyà mvomùmwe ne dyètù twètù ku bwakàne bwà Nzambì ne Musungidi wetù Yesù Kilistò:*

*. . . ditalala bi—binùvudijùbwe ku dimanya dyà Nzambì, ne ku Yesù Kilistò Mukalenge wetù,*

*Bu mùdi—mùdi bukolè bwendè bwà bunzambì bwikale butùpe bintu byònsò. . .*

<sup>404</sup> Mbanganyì bààpyànà buloba ne bintu byònsò? [Muntu mukwàbò ùdi wàmba ne: “Bansantu.”—Muf.] Cyà bushùwà. “Bitàngila. . .” Eyowa. Bìmpè.

*. . . bidì bitàngilà mwoyi ne difwànà dyà Nzambì, ku dimanya dyà ewu udi mutùbùkile ku butùmbi kutùtùma ku butùmbi:*

*Ku byôbi ebi nkutùdi twètù bapèèbwe ku milayi minènaanènààlè. . . ne yà musinga mukolè: bwà ku yôyi eyi nwamòna mwà kwikala baabanyanganyi bàà ngiikàdilù wa bunzambì, bamane kupanduka ku dinyanguka (Tèèlejàayi aci.) didi pa buloba ku lukùkà.*

405 Lukùkà lwà mfranga, lukùkà lwà bintu binène, lukùkà lwà dimanyika, bintu ebi mbifwè bwà mwena kwitabuujja. Katwèna tubicyuka nànsha. Ntenta anyi kazùbuzubu, bwà cinyi bündi mwà kutàcisha meeji; kwikala ne mwoyi anyi kufwà, kutùkina mu màyi anyi kufwà mu màyi? Cintu cidì cikoka yànyi ntèmà ncyôci eci, Bukalenge bwà Nzambi. Ní ngashààla mulame nzùbu wanyi, ní ngashààla mulame famiye wanyi, ní ngashààla mulame ní ncinyi cyònsò, nshaale mulame Kilistò, ditèkemena dyètù dyà Butùmbi.

406 Ungiibake too ne kuulu, Éyi Mukalenge, umbweje mu *Cyôci* eci. Kilistò ikalè wànyi Mutù, mwikalè ùkwàcila mudimu kùndi mèmè. Pa cishimikidi cyànyi, diitabuujja dyànyi didi mu Yéyè adi, enzaku bwà bukolè, dimanya, didikanda, lutùlù, difwàna dyà Nzambi, ne dinangangana dyà bwàna bwètù, bikwacilè mudimu munda mwànyi, Éyi Mukalenge, ki dyànyi disambila. Ncyèna ntàcisha meeji to; ngiikale ne mwoyi anyi mufwè, ntùkinè mu màyi anyi mfwe mu màyi; dingumba, anyi kaciyi dingumba; ne mulunda, anyi ncíyi ne mulunda. Cyôci aci cikwatè mudimu munda mwànyi, enzaku bwà bukolè bwà Kilistò, dimanya Dyèndè, bituutè nkoka, bwà ngâpetakù mùshindù wà kulongesha bakwàbò.

407 “Bwalu Nzambi mmutèèke mu Èkèleeziyà, bàpostòlò, bapròfetà, balongeshi, bampaasàtà, ne batangadiki, bònsò abu bwà dipwàngaja ne dibwejamù dyà makolè ònsò aa, bwà bupwàngàne abu bwà Dilwa dyà Mwàna wa Nzambi.” Dyònsò dyà ku mabwe aa ncintu cyumusha ku Dyòdi adi. *Eci* ncintu cyumusha ku Edi. Bwònsò bwà ku makolè aa mbwà munda Mwèndè Yéyè, ne adi àpòngoloka àpàtuka munda Mwèndè, àpweka àpicila mu bóbò abu. Amen.

408 Tukààdi díbà nkànkalà. Díbà dyònsò edi dìyaaya penyi? Amen. Nudi baMunange anyi? [Disangisha didi dyàmba ne: “Amen.”—Muf.] Nudi biitabuujje aci anyi? [“Amen.”] Tèèlejà, mwàna wetù.

409 Mwanèètù wa bakàji Kidd ùvwa wàmba mu dindà emu ne: “Mwanèètù Bill, ncyèna mumanyè ní ngâpeta mùshindù wà kukumòna cyàkàbidi.” Aci kàdi kwambaci kunshipa’s. Nwamònu anyi? Yéyè ùdi wèla meeji ne ùkaadi ukulakaja, ne yéyè mwine’s wàkulakaji. Ntu mulòmbè Nzambi bwà àmulamè yéyè ne Mwanèètù wa balùme Kidd, bàashàalakù ntàntà mule.

410 Anyishaayi nnwàmbilè, katwèna bamanyè ne netwikale tupetangana muntu ne muntu too ne ku díbà kaayi to. Ncyèna mumanyè ne mèmè ewu nèngikalè neenù too ne ku díbà kaayi to.

Bidi mwà kwenzeka ne Nzambi ambiikilè bwà mèmè kuumuka pa buloba. Bidi mwà kwenzeka ne Yèyè ambiikilè nye ku budimi bukwàbò bwà bwambi. Bidi mwà kwenzeka ne Yèyè akubiikilè wèwè mwaba kampànda. Katwèna bamanyè to. Kàdi, tu—tupetaayi eci. Katùlekedì eci citùpicila ànu pamutù nàka to. Twàngatàayi cyôci aci.

411 S'ncyôci aci, mu Bible. S'ncyôci eci, cikumbànàngane ne bintu bikwàbò byònsò. Kàdi bu nànsha ne mvwakù ne dîbà dyà kucyènza's wè! Kamwena mùshindù wà kucyènza mu ditùkù dimwèpelè to. Nudi bamanyè nàku awu. Kàdi, ndi mwà kuswikàkaja cintu cyònsò mu kaabujimà!

412 Tàngilàayi, patwàkajikija ne diyisha adi, nwàkamòna cyàkenzà Nyumà Mwimpè ku cimanu kwàka, kí mmwòmò anyi? Mbanganyi bàvwàpu mwine musangu awu? [Disangisha dîdi dyàmba ne: "Amen."—Muf.] Nwamònu anyi? Cyà bushùwà's! Mmutuuluke ànu nàka, kuzòla cintu ànu cyôci cìmwècìmwè aci, Mwanjèlò wa Mukalenge awu.

413 Nwamònu's, ncilelèlè. Kanùlekedikù cinùbàfuka to. Nwacikwataayi ne manza àbìdì, bânà wetù. Kwàtaayi cintu aci ne manza àbìdì. Vùlukàayi, ibàkilaayi pa diitabuua dyènù, bukolè, dimanya, lutùlù!

414 Mpindyewu, apa, ngeela meeji ne mvwa ne kabèji mwab'ewu, pàngìikalà nciyi mukàmacishe ní mpenyi pàmvwà nyiisha apa. Nkòkò aka mwab'ewu. Twasàkidila, mwanèètù. Twasàkidila, wa manza tètè. Panwikala baswè bwà—bwà kutapapu dîsù, bwà kumòna ní kudiku cintu kampànda mwab'ewu cinùdì mwà. . . Pàmwàpa ncitembelu cìmpè ndambù kupita cidì kwàka cyàcyà, bwà nwamònakù mwà kutentula bìmwè bintu byà ku cyôci eci. Nèncilamikè ànu kuulu eku ne tusonso, nènkù bulelèlè nenwikalè mwà kwenza kukùtapa dîsù ne—ne kucituuta ku cyamu.

415 Nènkù ndi muswè bwà nùcyàngàtè nùcilonge, ne nucifwànyikije, ne pashìishe nwènzè maalu bilondeshile cyôci aci. Kucilongu ànu nàka, kucifwànyikiji ànu nàka to, kàdi wènzè maalu bilondeshile cyôci aci pawàcilonga. Ucyàngàtè bu cyèbè wèwè ne meeji matòòke ónsò. Kwambi ne: "Èè, bivwa bingenze disànka be pa kucitèeleja to." Bivwa bingenze pàànyi disànka, mèmè. Kàdi kucitèeleja, ne pashìishe kucyàkidila, mbishìilàngàne. Nwamònu anyi? Nwamònu anyi? Mbishìilàngàne. Nwamònu anyi?

416 Kudi mikìiyà mwandamutekète bwà kwenza cipidi cyà Nzambi. Kùdi Bikondo byà Èkèleeziyà Mwandamutekète, mu byòbì abi mmùdì Nzambi mufikishe Èkèleeziyà ku mwine mushingà ewu. Nènkù Yèyè mmupete baamisànjeelà mwandamutekète bwà kucyènza. Kùdi mwandamutekète, mwandamutekète, mwandamutekète. Nwamònu anyi? Mwandamutekète ùdì—ùdì nombà wa Nzambi wa dyoya nendè,

ne isàtù ùdi nombà mupwàngàne wa Nzambi. Pa nàнку, kùdi isàtù, ne mwandamutekète yisàtù. Pa nàнку, mu dyenza dyà makumi, mu maalu à nyumà, ku Dîyi, ku bujaadiki bwà Nyumà Mwîmpè, byònsò abi mbijikije cintu cyònsò mu kaabujimà. Tucilongàayaaku.

417 Ku diitabuuja dyètù tusàkidilaayi bintu ebi, dîbà adi, bwà twamòna mwà kupeta mùshindù wà kufika mu cipidì cijimà cyà Kilistò; biikàle baswikakaja pàmwè kùdi dinanga dyà Nzambi, diciinà dyà Nzambi, kaneemu kàà kuneemekangana munda mwà myoyi yètù muntu ne mukwèndè, kaneemu kàà mu ndondo kàà tuneemekangana muntu ne mukwèndè, dinangangana dyà bwàna bwètù bu bânà bèètù bàà balùme ne bânà bèètù bàà bakàji, kakuyiku maalu a ciipanshi to, kakuyiku cingà cintu to ànu bukezuke bwà nsòmbelu wa Nyumà Mwîmpè. Nwamònu anyi? Kusòmba pàmwè, kwikala mwena Kilistò. Kwenda ne diitabuuja. Kwenza bwà bukole bwà Nzambi bwikalè butuuta nkoka munda mwèbè; kwenza bwà dimanya dyà Nzambi, pàkaadibi bikafika ku disunguluja dyà maalu mîmpè ne maalu mabì. Pàdi dyabùlù ùkuleeja cintu cidi kaciyi cyà mu Mifundu menemene, kuseemena kule naaci. Ncyà bushùwà.

418 Ndi mwà kudifwànyikijila ne bàpostòlò abu kabàvwa bènzakù maalu bu twètù to. Bàvwa bòbò bàya eku ne eku, misangò mikwàbò bantu bàà dyakula dikesè menemene, too ne pàvwàbò bàbànda mu cyambilu. Bàvwa bàbwela ne bènza cìvwàbò ne cyà kwenza aci, pashùshe bàpàtuka. Èyowà's, mukalenge. Bàvwa ne ngulu. Bàvwa ne bukòlè. Kabàvwakù bòbò ne makòkyanganyi ne bantu to. Bàvwa bamanyè pàvwàbò biimànyine. Kwàjiki. Bàvwa bamanyè uvwàbò biitabùùje. Bàvwa ànu batùngùnuke ne kwenda mu Nyumà. Bènza ànu . . .

419 Ànu mùmvwà ngàmba dilòlò adi amu. Dishikula ànu dikesè dyà mutù, ki cyònsò cìvwà cikèngela Nzambi kwenza, nènku cintu nànsha cimwè kaciyiku mwà kubiimanyika to. Kabàvwa beela mpatà anyi balonga, anyi bànungana anyi bàdyàbakeena mutùtù twètù twenza amu to, bwà ne bìvwa bikèngela kwenza *cikampànda* anyi *cikansanga*. Bàvwa baya ànu kumpàla kàdi kucyènza, nànsha bìshi. Dishikula ànu dikesè dimwèpelè cyanààna dyà mutù dyà Nzambi, bwalu mbutùùkè, ànu piine apu. Mbwa cinyi? Mmunyi mùvwàbò bamanya ne ndishikula dyà mutù dyà Nzambi? Bàvwa ne makòlè ònsò aa munda emu, mishingà yònsò eyi. Nènku dishikula dikesè dyà mutù dyà kumpàla dyà Nzambi diikàle difwànyikija ne kantu ne kantu kaa *eci*, ne Dîyi Dyèndè. Bàvwa bàmanya ne cìvwa n'Dîyi dyà Nzambi, nènku bàvwa bàasa lwendu baya. Kabìvwa bikèngela kuditàcishabo mu meeji bwà cingà cintu to. Pàvwà ànu Nzambi wàkula, bàvwa baya. Tudi twètù twakula . . .

420 Nzambi ùdi wàkula neetù, kàdi twètù netwàmbè ne: “Èè, netubange's. Netùmonè ne tudi mwà kusòmba Nsòmbelu ewu.”

Katanci aka anyi, muntu ùkubìndulula. Èè, bushùwà's, awu's n'dyabùlù.

421 Bivwa bikèngela nwènu kumòna mùvwàye ùteeta bwà kumpangisha disangisha edi mu dindà emu's. Bivwa bikèngela bwà wèwè kulabulakù cyà nàncu aci musangu kampànda. Kaa, luse wè! Bikèngela mèmè kulwà mvità munsangu wònsò wùndi ànu nteela ne kùdi disangisha. Ne byòbi bikèngela bwà mèmè kuya kasambidila mubèedi kampànda, ne muntu kampànda wa ùpunga ne lufù ne kàyì musùngidìbwe to, nekùlwe mabiikila à ku tèlefonè makumi àsàtù mu tusunsa dikumi, piikalàbo ne mùshindù wà kubiikila lùkàsàlùkàsà mùshindù awu, bwà kumpangisha. “Kaa, Mwanèètù Branham, bikèngela wènzè *cikampànda*.” Kàdi's nkwàkù kùdi musùkà mufwàne kujimina. Cyà bushùwà. Èyowà's.

422 Dilòòò dikwàbò, kumbiikilabò mu mwaba kampànda. Nsongààlùmè kampànda, ntu muyiikile nendè lwà kwìnshì eku mu ní ncinyi apa, mu makàjiinyi à byàkudyà kùkaadi ndambù wa bidimu. Ùkaavwa mushààle kanwàyì wa maala à kapyà. Mvwa mumanyè mwànà wa balùme awu, mwànà wa maalu mimpè, kàdi mwikàle ngènzàmpèkààtù. Nèku ki mamwèndè kubiikilayè. Ngeela meeji ùvwa mubiikile Doc misangu bu yìbìdì nàncu awu. Mèmè. . . Kubiikilabò, ki kubiikilabò Billy, ki—ki ndekeelu wa byònsò mukenji awu kumpetawù. Nèku mukenji awu mmwenzè ànu ùmpeta, bwà kwamba menemene, kacya ncìvwakù mwanji kupeta mvità bùngì nàka to kacya bàndela, bwà kufika ànu mwine mwaba ùvwa mwànà wa balùme awu.

423 Nèku pàngàkafikàku, mwànà awu mukwàte ne byà luse kàciyiku mwà kummanya to. Ki yèyè awu, mulaadika mwaba awu, lungènyi lujìmine, ne mwikàle ànu wenza eci wenza eci. Tatwèndè uteeta kumutuuta cyanza, wàmba ne: “Munanga wanyì.” Nèku muntu awu udi ne bidimu makumi àtaanu, wìpacila ku makumi àtaanu ne cìmwè. Kàdi mwikàle wàmba ne: “Munanga wanyì,” *cikampànda*, ne “shààla talalàà.” Kàdi ùvwa ùteeta bwà kujuuka. Tubòkò twèndè tukesè twà kale atu tushààle bunène *ebu*. Nsongààlùmè awu ùvwa ne kànsèrè bùngì cyanààna mu mùshindù wà ne yèyè mwine ùkaavwa ànu kànsèrè pa kànsèrè. Munda mwèndè mwònsò mùkaavwa ànu ne kànsèrè. Nànsha mashi èndè ònsò à mu mijilu àkaavwa ànu kànsèrè, byònsò. Nèku ki yèyè awu, ùteeta bwà kujuuka, ne mwikàle wènzà eci wenza eci mùshindù awu.

424 Mèmè kumukwata ku cyanza, kwamba ne: “Woodrow, Woodrow, s'mMwanèètù Branham ewu.”

425 Papa wèndè kwambaye ne: “Kwèna mumanye anyi? Ewu's m'Mwanèètù Bill. Woodrow, ewu's m'Mwanèètù Bill.”

Ùvwa wenza ne: “Uh. Huh. Uh-uh-uh.” Mùshindù *awu*.

426 Ki papa wèndè kutàngilaye kàdi kwamba ne: “Billy, udi mulwè dibà dimanè kupita ndambù.”

Mémè ne: “Kakùtu kwanji kwikalakù dībà ditàmbe kwikala dipite to. Yéyè awu ùdi mwab’ewu.” Mvwa mupete mvità.

<sup>427</sup> Ki dībà adi nsongààlùmè mikwàbò, nsongààlùmè mikwàbò kàbìdì, bangènzàmpèkààtù’s, yìvwa miimàne mwaba awu, yìmwè yà ku balelà bèndè. Mémè kwamba ne: “Nudi numòna’s, nwènù nsongààlùmè, dilongòlòlaayi, bwalu nenùfikè pa kaaba aka. Nenwìkalè ne cyà kupweka kufika too ne pa kaaba aka. Nwamònu anyi? Pàmwàpa kaciyi ku kànsèrè aka—aka to. Nudi bafwànyine kupàfika ku cingà cintu, lwà pambèlu pààpa mu cibeeba mwàmwa, utuuka mashi too ne paùdi ufwà, anyi cintu kampànda. Nenwìkalè ne cyà kukùfika.” Twètù kuyiikila naabò.

<sup>428</sup> Mvwa mwindile bwà kumòna cìvwà Nyumà wàmba bwà kwenza. Kacya ànu ngìndila’s. Katanci aka anyi, mémè kuumvwa dishikula dikesè dyà mutù adi. “Mutentèkèlè byanza.”

<sup>429</sup> Mémè kunyùngùluka, mémè ne: “Nwènù bònsò inyikaayi mitù yènù.” Bònsò bwàbò kwinyikabò mitù, nsongààlùmè yìbìdì anyi yìsàtù yìvwà munda amu ayi.

<sup>430</sup> Mémè kumutentekela byanza. Mémè ne: “Mukalenge Nzambi, enzaku bwà nsongààlùmè ewu amanye cìikalàye mwà kwenza, kumpàla kwà yéyè ne cyà kusambakeena ne cintu eci. Nyéyè ewu ùpunga ne lufù. Démon ewu nyèwù mumushiye mu bwalu bukolè, ne ki yéyè ukàadi uya ewu. Ne yéyè mwine nyèwù maala àmufikishì ku lufù, nènku nyèwù mufike mu mùshindù ewu. Ndi ndòmba bwà Wèwè wikalèku nendè luse.” Nènku pàngàakamanà kumusambidila, pàakacyàbu mu dindà s’ùkaavwa musòmba, ùyiikila ne papa wendè.

<sup>431</sup> Busty Rogers, wa bwena...Bàvwa bambiikile lwà ku lùpitaadi eku, kì nkwanji kwenza matùkù to. Mvwa mupatuke muye kuntwaku ditùkù adi, paanyimà pàà mémè mumanè kuyiisha mu Milltown mwàmwa mùvwà Georgie Carter mwànà awu mwondòpiibwe amu. Nwènù bònsò nudi bavùlùke bwalu abu. Nènku mwómò amu pàvwà Mwanèètù Smith, muyiishi wa ba-Méthodistes awu, mwámbe ne: “Kwòkò kwikalè ànu muntu, mubàtìijìbwe mu Dìna dyà Yesù Kilistò, àpàtukè mu nentà wanyi emu,” mùshindù awu. Lwà ku Totten Ford kwàka, mwikalè ngenza disangisha adi kwine aku. Kàdi, kaa, kumpiishayè mu byònsò binùdì pèènù bafwànyine kwelela meeji abi. Ncyàkaakulakù dīyī nànsha dīmwe to; mémè kutùngùnuka ànu ne bīmvwà ngèza. Mvwa ne mudimu muntùma naawù. Mukalenge kundeejaye cikèènà-kumòna. Kùvwà mwànà wa mùkòòkò lwà kuntwaku, mukàlamine mwaba kampànda mu cipèèlà. Nwènù bònsò nudi bavùlùke cikèènà-kumòna aci, nwènù bònsò. Ngeela meeji ne nudi bacivùlùke. Nudi bacivùlùke anyi? [Disangisha dīdī dyamba ne: “Amen.”—Muf.] Cyà bushùwà. Mbìmpè. Nènku mvwa nya ngènda mpìcila mwaba wa cipèèlà awu, ngènda nkèbangana naawù.

432 Mémè kuya ku Totten Ford. Mwanèètù Wright wàwa mmumanyè. Twètù kukuya, katùmanyi cyà kwenza to. Mvwa musùmbe kashèète kakesè kàà ditèèkela nsàbangà, ku cìcyelè cìmwè cyà meeyà dikumi. Mvwa mwikàle nya bwà kupàtuka kuyakù, bwà kwimanakù ne kuyiisha mubànde pa kabàsà aku. Kwambaye ne ùvwa ùbànda, too ne ku lusongo lwà kakùna aku, bwà kukenda mushinga kampànda. Mémè kamufilakù. Kùvwa èkèleeziyà munène wa kale wa ba-Baptistes musòmbe kwine aku, munda mutupù. Mukalenge kungambila ne: “Imànyinà mwaba awu.”

433 Mémè ne: “Ntùùlwilè mémè ànu mwab’ewu, Mwanèètù Wright.” Mémè kwimana. Yèyè kutùngùnuka wènda ùbànda kàdi kwalukilayè.

434 Mémè kuyaku, kàdi ncìyi mùshindù wa kuunzulula ciibi to. Mémè ne: “Mukalenge, Wèwè mwikàle mu bwalu ebu, Wèwè mwikàle muswè bwà mbwele mu èkèleeziyà ewu, nkàngwilaaku ciibi.” Mémè kushààla musòmbe mwaba awu munkacì mwà kwela meeji.

435 Mémè kuumvwa muntu wènda ùlwa; kuseemenayè, ne kwambayè ne: “Wetwàwù? Nènkwbabilè,” ne, “udi muswè kubwela mu èkèleeziyà anyi?”

Mémè ne: “Èyowà’s, mukalenge.”

Yèyè ne: “Ndi ne nsapì mwaba ewu.”

436 Mémè kukùtula disangisha. Lumingu lwà kumpàla, ànu kutupu kwètù eku. Dilòòlò dyà kumpàla adi, mvwa ne kaadisangisha kàà, Mwanèètù Wright ne famiye wèndè. Katancì aka anyi, ku ndekeelu wa lumingu, kamuvwa nànsha mùshindù wà kwimanyika bantu mu lupangu amu to, bikolè. Kàdi mwànà wa mùkòòkò awu kàvwa ànu mwanjì kulwa to. Mwanèètù Hall kusungìdiibwaye mu ciine cikondo aci, mpaasàtà udimù mpindyewu awu, bôbò bônso abu. Ncìyi ànu mwà kupeta kùvwà mwànà wa mùkòòkò awu to. Paanyimà pàà cikondo kampànda, mu Église de Christ, mwàmwa lwà kwìnshì kwà kakùnà, kànà kàà bakàji aku kashààle bidimu citèemà ne ngondo mwandamukùlù kakàyi kanyunga to, kalààdika pànshì kuntwaku. Ki kòkò aku. Nwènù bônso nudi bamanyè bwalu abu. Èyowà’s, mukalenge.

437 Nèнку mu mapingaja amu pàvwà Busty Rogers, nkòlomù munène wa kafyondo awu mwimàne mwaba awu...Mémè kupàtuka mwaba awu. Nèнку mwaba awu ki disangisha dyà Mwanèètù Smith didì diimane kwàka dyàdya bwà kunsekabò, bwà kungeelulwilabò adi, bwalu mvwa mbatiiza mu Dìnà dyà Yesù. Mémè kupàtuka kubwela mu màyi à bitocì à Totten Ford, mùvwàbo ne...[Katùpà kàà mukàbà wà mèyi munda mutupù—Muf.]...mbànda ne kasùlù aku, kàvwà kènza mutooyi mukolè wà kacya. Balami bàbidì kupàtùkabò naanyi.

438 Mémè kwamba ne: “Ndi mwimane mwaba ewu mu mapingaja emu bwà kuleeja mpàla wa Mufùndù wà Cijila wà Nzambi.” Mémè ne: “Ndi mbala mu Bible emu mwaba wàkambà Peetèlò ne: ‘Nyingàlalaayi, muntu ne muntu wa kunùdi, nùbàtìijibwe mu Dìna dyà Yesù Kilistò bwà dilekelediibwa dyà mpèkaatù wenù.’” Mémè kukùdimuka, kufila Mukàndà kùdi umwe wa ku balami abu.

439 Mémè kupàtuka kwàka, kwamba ne: “Ewu yònsò udi muswè, udi unyingalala ku mpèkaatù wendè awu, bùdiye naabù mbwà kulwa.” Mémè kubwela mu màyi amu. Mémè kwamba ne: “Kùndi mémè mbimwèke ànu bu ne Banjèlò mbasòmbe pa ditàmbà dyònsò dyà mucì patùdi twakulangana apa, biikàle bàbandila.” Kaa, ekèlekèle! Katancì kàngàmbì kubàtiiza ànu bantu bàbìdi anyì bàsàtù aka anyì, disangisha dyèndè kàdi kucimukadi dyònsò nkòong, bakàji bàvwà bavwàle nkanzu milenga ya swà abu, babwela mu màyi amu, bènda bèela mbilà mikolè. Mémè kubatiiza disangisha dyèndè dyònsò nkòong mu Dìna dyà Yesù Kilistò. Nudi bamanyè bwalu abu. Ndi ne fòtò wa cyòci aci. Ki mùvwà bwalu nàнку.

440 Cìvwa ncinyi? Kusakidila ku bukòlè bwèbè. Nwamònu anyi? Lekà bwalu’s. Nzambi ngudi mumanyè mwà kubyèna. Nzambi ngudi mumanyè mwà kufikisha maalu awu ku dyenzekawù. Lekela bàmbè ànu byònsò byàswàbo kwamba abi. Kabyéna ne cìdìbi bishintulula to. Wèwè tùngùnuka nda ànu kùyaaya.

441 Busty Rogers mwimane mwaba awu, pààkamònaye aci, yéyè ne: “Nàнку ngítàbùùji bwalu ebu ne mwoyi wànyi wònsò.” Ki kubwelaye mu màyi, ne bilàmbà bilenga bivwàye muvwàle abi, kubàtìijibwayè mu Dìna dyà Yesù Kilistò.

442 Kukaadi bidimu bu bisàtù anyi binaayi, kumbiikilabò lwà kwinshì eku mu lùpitaadi lwà mu New Albany. Ki yéyè awu, ùpunga ne lufù, ne kànsèrè, kamudyè ne penyi. Bangàngàbukà bàvwà bàmba ne pàvwà bufùku bùcya yéyè kàkupicisha dindà ne mwoyi to. Kwambabò ne: “Ùdi ùpunga ne lufù mpindyewu.” Bòbò ne: “Ànu wèwè mulwè dyàkàmwè.”

443 Mémè kupweka ku cibambalu aci, pangàapwekiku, bwà kwimana mwab’awu ne kusambila. Yéyè ne: “Billy, nyawu kudi mwanzankòngòlò mwenze cijèngù mu ditumba mwàmwa.”

444 Ki mémè kukùdimuka, bwà kutàngila. Mémè kwamba ne: “Busty, ncipungidi. Kwàkufwà to. Cipungidi cyà Mashi cidi cìkusungila.”

445 Mémè kumutentekela byanza, kwamba ne: “Mukalenge Nzambi, mùshindù mwine ùdi cikeena-kumòna cyàcya ciikàle cijaadika ne Wèwè udi mwab’ewu. Cipungidi Cyèbè, ncyà ne: ‘Ku mibùndàbùndà Yèndè tudi bondòpiibwe.’” Mémè kumutentekela byanza, ki yéyè kusangala ànu mwaba awu. Kumutùmabò pambèlu.



446 Nènku kùkaadi bidimu bu binaayi anyi bitaanu, bidimu bu binaayi nànkù, bìdiye ùlòba ùbànda ùpweka ne musùlù ne bikwàbò, kacya ànu wàshìdimba. Nènku mwaba uvwa kànsèrè kàsanganyibwa nseke yònsò pa muminu too ne mu cìfù awu, kàkaavwa kawuvwije cikudì, pàkaadi dipondo dinène ne dishilè. Bangàngàbukà, bankòlomù bàà mu lùpitaadi alu, bàvwa bamwambìle ne bàvwa ne dyondopa dyà ne cobalt òvwa mwà kukòka cyòcì aci, bwà kumòna mwà kupwekesha byàkudyà byàbùngì musangu ùmwè. Úvwa ne lutàtu lukolè bwà kumina byàkudyà byàbùngì, bìvwa bìkèngela kwikalayè ànu ùdya bitekète bitekète. Ki kuyaye bwà kwenzabò ciine aci. Mémè ncìvwa mumanyè ne yéyè ùvwàku to.

447 Nènku pàakamupandàbo, kujandulabò ne byàkamufikisha ku dipaluka, ki kubwelayè mu kòmà. Byòbì kumutekesha luseke lùmwè mùshindù awu. Nènku cintu cìmwèpelè cìvwayè pèndè mwà kwenza cìvwa ànu kudila ne kaadiyì kapàte. Ki yéyè kwangata crayon, *nùnkù* ewu, mwikàle wènza, “eyi, eyi, eyi.” Ke ùteeta bwà kufùnda, ùzakalala *nùnkù* ewu, ne cyanza cìvwa cìshààle ne bukòlè aci. Luseke lwèndè lwà dyàbakàjì, lwikàle lutalàle. Ki kufùndàye, ne cyanza cyèndè aci ne: “Yesù ùdi ùsùngila, 1900 ne bikampànda.” Kabàvwa mwà kucyùm vwa to.

448 Pa nànkù mpindyewu pàmbì mukàjèndè ne: “Mwanèètù Branham, ncyèna mumanyè cìdiye ùswa kwamba apu to.”

449 Mémè ne: “Mandamu Rogers, cìdiye ùswa kwamba ncyà ne, cìvwa mmu cidimu cyà 1900 ne byà mu njila, mwàkasùngidiibwayè ne mwàkabàtìjiiibwayè mu Dìna dyà Yesù lwà kwìnshì kwàka. Aci ki cidì ne musinga bwà mpindyewu. Kèna ùciina bwà kufwà to.”

450 Mémè kwamba ne: “Mukalenge Nzambì, lamàku mwoyi wèndè. Ndi ndòmba nànkù, mu Dìna dyà Yesù, bwà Wèwè kulama mwoyi wèndè.” Mémè kumutentekela byanza. Kòmà kumuumukaye. Dipaluka kujikadi. Nènku kujuukaye mu bulààlu amu. Patùdi twakulangana apa ùdi wèndela kuulu, wènda ùfila bujaadiki.

451 Sàkidila ku diitabuuja dyèbè, bukòlè; sàkidila ku bukòlè bwèbè, dimanya; ku dimanya dyèbè, didikanda; ku didikànda dyèbè, lutùùlù; ku lutùùlù lwèbè, difwànà dyà Nzambì; ku difwànà dyèbè dyà Nzambì, dinangangana dyà bwànà bwètù; ku dinangangana dyèbè dyà bwànà bwètù, Nyumà Mwimpè, nènku Kilistò neàlwe. Bwalu, ànu lwà mwìnshì Mwèndè amu menemene. . . Nyumà Mwimpè n’Nyumà wa Yesù Kilistò udi ubwela mu Èkèleeziyà, bwà kumwènesha makolè awu. Kaa, ekèlekèle!

Mònaayaaku pàkaadi dìbà, dìbà dikumi ne ibidì ne tusunsa dikumi ne tùtaanu.

Ndi. . . munange, ndi muMunange  
Bwalu Yéyè wàkannanga kumpàla,

Lwà kwinshì *eku*, kumpàla kwà wêwè kwikala cintu kampànda.

Ne wàkampetela... (Wàkenza cinyi?)...  
lupàndù

Pa mucì wà Kàlvariyo.

Mmunyi mûndi *eci*? Bwalu Yêyè wàkannanga, kumpàla.

Ndi muMunange, ndi muMunange

Bwalu Yêyè wàkannanga kumpàla (Ki  
kabingilà nkôkò aku.)

Ne wàkampetela lupàndù

Pa mucì wà Kàlvariyo.


<sup>452</sup> Ndi ndaya, mu dindà emu, kùdìYe, ne mwoyi wànyì wònsò, ne, ku dikwàcisha Dyèndè ne ku ngàsà Wendè, ndi ndòmba bwà ngiikalè nkèba ku ditùkù ne ku ditùkù, ncìyì ndekelakù to, too ne pàngààfikà ku dyumvwa ùmwè ne ùmwè wà ku mishingà eyi ùpòngoloka mu kaacipidi kàànyì kakesè kàà kale aka, too ne pàngiikalà mushààle dimwènèshibwa dyà Kilistò udi ne mwoyi. Bwalu, Yêyè wakashààla mpèkaatù mufwànàngane nàànyì, bwà mémè nshaalè . . . nshaalè bwakàne bwà Nzambì, mufwànàngane Nendè. “Yêyè wàkangata kaaba kàànyì; Mukalenge, enzàku ngàngatè Kèndè Yêyè mpindyewu.” Bwalu, kiipacila kààkafwìdilàYe nkôkò aku. Mbanganyì bàdì baswè kulaya cintu cìmwècìmwè aci, ku ngàsà wa Nzambì? [Disangisha didi dyàmba ne: “Amen.”—Muf.] Ne mitù yètù miinyika mpindyewu, ne byanza byètù byela muulu.

Ndi . . .

<sup>453</sup> Ndi ncilaya, Mukalenge, èkèleeziyà ewu nyewu ùcilaya: “Cipidi cijimà cyà Yesù Kilistò!”

Bwalu Yêyè wàkannanga kumpàla

Ne wàkampetela lupàndù

Pa mucì wà Kàlvariyo. 

62-1014M Cipidi Cyà Muntu Mupwàngàne  
Branham Tabernacle  
Jeffersonville, Indiana États-Unis

CILUBA

©2016 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)